

LUCAS JESUCRISTO ENIRUEMO ILLA RAFUE CUIAFUE

Lucas Teófilomo cartana orede

¹⁻⁴ Teófilo, cue isiruiga nabai. ¿Nigacino? Omo bie cartana oredicue. Cai motomo birui diga rafue jai suide. Jesucristo rafuena omo cueticue. Naimie billa mei, diga comini naimiemo suide rafuena ciodimaci. Iena llocana jiai jaidimaci. Naimacimona bie rafue raise uiñoticue. Bie rafuena fidianona, damierie iena jai cuetimaci. Bie rafuena jiai jai cacadio. Bie rafuena cue raise uiñua jira, uanaicinona o raise uiñollena, bie cartana jai cueticue. Iese birui cue comeci jitaide.

Jusiñamui jaienici Juan Bautista micori jeicillena llua rafue.

⁵ Jesucristo nia jeicifñenia, Zacarías illa facaise Herodena mameciredede illaimadi. Judea railla eniruena sedade. Zacarías Jusiñamui diga ñairaima. Abías raillasie facaimo duillamona, Jusiñamui jofomo maijuide. Naimie aidi Elisabet. Naiñaiño jaie ite usumadi Aarón micori. Aarón micoridi Jusiñamui diga nano ñairaima.

⁶ Jusiñamui mona iaímaiaí mare, nana naimie lloga uaina raise iaímaiaí inua jira.

⁷ Naiñaiño oiniñona jira, uruenidiaímaiaí. Jiai jai uaicima iaímaiaí.

⁸ Zacarías facai ite comini maijia facaise ia, Jusiñamui jofo dine naimie maijiaide.

9 Nainomo naimie maijia, caimare soride ra fo jobaillena, naimiena fetodimaci. Naimaci finouilla isoi, jobaillanona daní Jusiñamui diga ñairaini naimiena fetodimaci. Iemei naimie fo jaide.

10 Fo jailla mei, naie caimare soride ra boa fa-caiseconi, Jusiñamui diga naimie ñaiano, ailluena comini Jusiñamui jofo ecimo itimaci.

11 Ieconí caí Nama Jusiñamui jaenicidi naie ra boano nabeimo Zacaríamo bairede.

12 Naimiena ciuanona, Zacarías jacinaitaite.

13 Jaenicí naimiemo llote:

—Zacarías, jacinaiñeno. Jusiñamui o jiacinona jai cacade. Iemona o ai uruesite. Himana jocoite. Juan o jitalle naimie mamecidi.

14 Iemona o começi caimare iite. Iobitio. Ailluena comini naimie jeiciari iobitimaci.

15 Jusiñamuimona naimie jamai bue isoineitimiena jaite. Jifaitate rana jiroñeite. Naimie jeiciamona Jusiñamui Joreño naimiena namataite.

16 Caí Nama Jusiñamui dibeimo ailluena Israel cominina naimie itataite.

17 Jusiñamui jitaillacinona finocana jaite. Eliamo Jusiñamui Joreño jaie siño uai illa isoi, naimiemo iite. Jusiñamui rafuena naimie lluamona, damierie, naimaci jaiagai isoi, Jusiñamuina ñnoitimaci. Ailluena Jusiñamui uaina jai ñnoñedimaci; ia damierie birui ñnoitimaci. Naimaci comeciai Jusiñamui dibeimo meidoitimaci. Iemona caí Nama Jesucristo bia, naimiena ñnoitimaci.

18 Zacarías dinena jicanote:

—¿Niese o llua suillena uiñoiticue? Jai uaicimadicoco.

¹⁹ Jusiñamui jaienici dinena uai ote:

—Gabrieldicue. Jusiñamuimona biticue. Cuen a oretate, bie mare rafuena omo llollena.

²⁰ Ero, cue uaina o ñnoñena jira, uainitio, o jito jeicille dinori. Jiairuido bie rafue suite.

²¹ Jusiñamui jofomo jino itino Zacarías jino bil-lena sedadimaci. “¿Bue ñellena naimie are biñede?” comeciaina facadimaci. Naimie jino are biñena jira, rajicaidimaci.

²² Naimie jino bitemo, naimaci diga jai ñainide. Ie onolli diga facajamona, Jusiñamui jaienici naimiemo jai llua na uiñotimaci. Naimie ñaiñeno ite.

²³ Jusiñamui jofomo naimie maijia facaise fuilla mei, ie jofomo abido jaide.

²⁴ Digarui illanona, ie aidi urueside. Ie jira jofomo naiñaiño cinco fivui fiebide, comeci na facajanona:

²⁵ “Cue uruesilla jira, iena nia buna lloiacaiñedicue. Cue Nama cuena jai duenaillana uiñoticue. Navui cue urue iñena jira, meiruiticue. Jai meiruiñeiticue. Comini cue joreña jai ñaiñeitimaci”.

Jusiñamui jaienici Jesús jeicillena llua rafue

²⁶⁻²⁷ Elisabet seis fivui uruesilla mei, Jusiñamuidi Galileamo ie jaienici Gabrielna orede. Nazaretmo María dine naimiema orede. María nia ininide; ia jai José jicanogañaiño. Naimie usumadi David micori.

²⁸ Rillanona, naiñaiño mo llote:

—Itio. Cai Nama Jusiñamui ona eo duenaite. Ona jai fetuamona, nana jiaie riñoniai baifemo naimiedi ona marena itatate.

²⁹ Iena cacajanona, naiñaiño jacinaite. Iena naiñaiño raise cacaiñena jira, iemo comecina facade.

³⁰ Gabriel dinena lloste:

—Jacinaiñeno. Jusiñamui ona duenaite.

³¹ Birui uruesitio. Himana jocoitio. Naimie mamecina jitaitio Jesúna.

³² Siño Jitona jaite. Nanoca Itimie Jitona jaite. Ie usuma David micori illaima illa isoi, Jusiñamuidi naimiena illaimana itataite.

³³ Illaimana illamona, Israel railla nairaina jaca sedaite. Naimie ifomo jiaimie jaca iñeite.

³⁴ María uai ote:

—Hima diga nia iñedicue. ¿Niese bie nibaille?

³⁵ Gabriel lloste:

—Jusiñamui Joreño omo iite. Ie siño uai diga iena finoite. Jusiñamui marena isoi naimie jai marenite. Naimiedi Jusiñamui Jito.

³⁶ O comini iñaiño, Elisabet, ie uaicitaila facaise jiai jai urueside. Naiñaiño jai jionaide; ia jai seis fivui naiñaiño uruesilla ite.

³⁷ Jusiñamui nana bie isoide rafuena finorede.

³⁸ María uai ote:

—Jee. Jusiñamui anamo iticue. O llucino cue-mona mare.

Ie facaise Gabriel naiñaiñomona oni jaide.

Maríadi Elisabet dine jailla rafue

³⁹ Ie facaiseconi María aneduai dine Judea railla eniruemo Zacarías illanomo raire jaide. Elisabetna cioillena, jaide.

⁴⁰ Zacarías jofomo rillano:

—Itio —raillanona, Elisabetna uaidote.

⁴¹ Elisabet naiñaiño uaina cacajano, ieconi naiñaiño jeraimo ite urue iena jiai uiñuamona, niraide. Ie facaise Jusiñamui Joreño anamo Elisabet jai ite.

⁴² Iese illamona, María uruesillana uiñote. Naiñaiño ado llote:

—Jusiñamui ona eo marena canoite. O uruena marena itataite.

⁴³ Jamai bue isoidicue; ia, odicue Jilloitaraïma ei illanona, cue dine bitio. Iena cuemo nia lloñedio;

⁴⁴ ia, cuena o uaiduanona, iobillamona cue jeraimo ite uruedic niraide.

⁴⁵ Cai Nama omo llotataga uaina suillana o ñnua jira, Jusiñamui ona eo marena canoite. —Jusiñamui Joreño naiñaiño illamona, iena llote.

⁴⁶ María dinena uai ote:

Caiñai Nama eo mare. Naimiemo iobillacinona feaacadicue.

⁴⁷ Naimiedi cue Jilloitaraïmana jira, naimieri iobidicue.

⁴⁸ Jamai bue isoidicue; iadedic uena fetode.

Ie jira biruimona nana cominici uena marena ñaitimaci.

⁴⁹ Naimiedi siño. Naimiedi mareuidimie. Cue facaina eo mare rafuena finode.

⁵⁰ Naimiena ñnotinona jaca duenaite. Cai jagaina jaca duenaite. Caina birui jaca duenaite. Ua nana naimiena ñnotinona duenaite.

⁵¹ Diga siño rafuena finoite. Abi iedotino comeci facajacinona llacaitaite.

⁵² Naimiedi illacominina oni dotaite; ia jamai bue isoidinona jamai bue isoñedinona itataite.

53 Dueredinona eo canoite; ia duenidinomo buena fecañeite.

54 Duenailamona, cai Israel cominina feitañeite.

55 Cai jaiagamimo naimie jaie llua isoi, birui caina canoite.

Abraham micorimo jaie llote: “Ona duenaiticue. O cominina jaca duenaiticue”

María llote.

56 Elisabet diga davui amani naiñaiño fiebide. Ie mei ie jofomo abido jaide.

Zacarías jito jeicia rafue

57 Elisabet jocularui jai ridemo, imana jocode.

58 Naiñaiño ecimo ite comini, naiñaiño comini diga, iena fidiamona, cai Nama naiñaiñona eo duenaillana uiñotimaci. Naiñaiño diga iobidimaci.

59 Ocho digarui jeicia mei, naimaci finouilla isoi, urue abina dia rafuemo bitimaci. Ie moo mamecina jitaacadimaci;

60 iadedi Elisabet llote:

—Dama ite. Jitaiñedicue. Naimie mamecidi Juan cai jitalle.

61 Uai otimaci:

—¿Bue ñellena iese raitio? O cominimona jaca bu Juan mameciredimiena iñede.

62 Jefona cacaiñena jira Zacaríamo onolli diga jicanotimaci, ie jito mamecina jitallena.

63 Onolli diga Zacarías fairuano, rabena jicade. Cuete: “Naimie mamecidi Juan”. Ieri rajicaidimaci. “¿Bue ñelle iena jitade?” comeciaina facadimaci.

64 Ieconí Zacarías jai dane ñaite. Ie jira Jusíñamuimo iobillacino fecade.

65 Nana iaímaiaí ecimo itino rajicaidimaci.

—Jusiñamui muidona naie rafue suide —
lloitimaci. Bie rafuena fidiano, nana Judea railla
aneduaimo itinodi iena ñaioidimaci.

⁶⁶ Iena cacajano, comeciaina facadimaci:
“Bimie jamai bue isoiñeitimiena jaite”. Cai Nama
naimiena marena jaca canua jira, iese lloitimaci.

Zacarías Jusiñamuimo iobillacinona fecaja rafue

⁶⁷ Ie facaise Jusiñamui Joreño Zacaríana llotata-
janona, Zacarías llote:

⁶⁸ Cai Nama Jusiñamuidi mare.

Cai Israel comini dine biite, caina jilloitallena.

⁶⁹ David micori Jusiñamuina jaie sedade.

David micori cominimona siño Jilloitaraimana cai
dine oretaite.

⁷⁰ Ie facaina llorainido naimie jaie llua isoi, cai
Jilloitaraimana oretaite,

⁷¹ Taifemona, Janabamona cai jilloillena.

⁷²⁻⁷³ Cai usumatiai micoriaimo: “Omoína due-
naiticue” llote.

Cai usuma Abraham micorimo jaie llogacinona
feitañede.

⁷⁴⁻⁷⁵ Taifemona cai jilloillena, cai Jilloitaraimana
oretaite.

Nana cai ille dinori Jusiñamuina jaciruiñeno seda-
jana jitaide.

Naimie jitailla isoi cai illena, naimie jitaillacinona
cai finollena, cai Jilloitaraimana oretaite.

⁷⁶ Cue jito, ona lloiticue. Jusiñamui ie lloraimana
jaitio.

Cai Nama uicomo jaitio, comini comeciai o raise
finollena.

⁷⁷ Ie cominimo jeacinomona jilluacinona lloitio.

Iena naimaci ñnoia, Jusiñamui naimaci jeacinona feitaite.

⁷⁸⁻⁷⁹ Jeacino anamo jai cai illa jira, jiti redinomo iticai isoidicai.

Jusiñamuina cai ñnia ñnoñenia, fiodaillana jaciruiticai.

Naimie caina duenaillamona, cai Jilloitaraïma bil-lena o llofuellena, ona oretaite.

Naimiena cai ñnoia, jiti redinomo iñeiticai; ia Jusiñamui diga cai comeciai uri iite.

⁸⁰ Zacarías jito sairide. Jusiñamuina ñnocana jaide. Cominimo naimie ñia marefodo lloñenia, jofue iñenanomo ite.

2

Jesús jeicia rafue

(Mt 1.18-25)

¹⁻² Jesús jeicia facaise César Augusto anamo aillu-ena nairaiaï ite. Romamona naimacina sedauide. Naie facaise Siria railla enirue gobernadori Cirenio. César Augusto, ñie ñiese comini naga nairaïmo illana naimie uiñollena, nana comini mameciaï cuellena ocuide. Jaca bu iese jaie finoñede.

³ Naimaci jaiagai illanomo mameciaï cuiana ocuide.

⁴ Ie jira José Galileamona Nazaretmona jaide. Judeamo Belémo jaide. David micori cominimo naimie jainaiaïlla jira, David micori illanomo jaide.

⁵ Ie ai María diga jaide. Naiñaiño fenaï jai eo aillue.

⁶⁻⁷ Belémo iaïmaiaï rillanona, naie facaise comini jofomo ñillino iñena jira, jurareta jofomo ridiaïmaiaï. Nainomo ie doforato jito jeicite.

Jocua mei, iniroina naimiena ferinote. Ie jito inillena, jurareta ecaranomo naimiena jonete.

Jusiñamui jaienisaí toíca llaudaíai sedarainí dine jailla rafue

⁸ Jesús jeicia facaise naie naio Belén ecimo ite pastomo damierie toíca llaudaíaina sedarainí itimaci. Naimaci toíniaína sedadimaci.

⁹ Ieconí caí Nama Jusiñamuimona daje jaienici naimacimo ebena bairede. Jusiñamui ie siño uai díga naimacina quetiñote. Jacinaitimaci.

¹⁰ Jaienici llote:

—Jacinaiñeno. Mare rafue lloiacadicue. Nana cominina iobitallena, iena lloiacadicue.

¹¹ David micorí illanomo damie como jeiciga. Jusiñamui facaina llorainí micoríaí naimie bil-lena jaie lloudimaci. Naimiedi Cristo caí Nama. Naimie omoí jilloitaraima. Jeacinomona omoína jillotaite.

¹² Naimiena jibuisai. Iniroina ferinoga urue jurareta jofomo imaci ecaranomo baitomoí. Iemona cue llwana uanaicinona uiñoitomoí —llote.

¹³ Ie facaise naie jaienici dine ailluena jaienisaí bitimaci. Jusiñamuimo iobillacinona fecajano rotimaci:

¹⁴ Monamo Jusiñamui illanona, naimiemo iobil-lacinona feaacadicaí.

Cominina naimie duenaillamona, naimie díga uri iitimaci

rotimaci. Ie mei abido jaidimaci.

¹⁵ Monamo jaienisaí jailla mei, toíca llaudaíai sedarainí coniniri ñaitimaci:

—Belémo mai caí jailli, caí Nama caimo como lloga rafuena caí jibuisaillena.

16 Ieconí raíre jaidimaci. María José díga baitimaci. Iaimaiaí urue jurareta ecaranomo billana cioidimaci.

17 Naimiena ciua mei, nana naimacimo jaienici lloga rafuena llotimaci.

18 Nana naie rafuena cacadinodi ierí rajicaidimaci.

19-20 Iaimaiaí uruena ciua mei, llaudaiaí sedaraini imaci toiniaí díne abido jaidimaci. Naimacimo jaienici llua isoi naimacimo suilla jira, iobidimaci. Nana naimaci cacaja rafueri, nana naimaci ciua rafueri Jusiñamuimo iobillacinona fecadimaci. María naie rafuena feitañede; ía íena começina facauide.

Jerusalémo Jusiñamui jofomo Jesúna íaímaiaí uilla rafue

21 Ocho dígarui illanona, naie urue abina dete. Íe ei jeraimo naimie nia comuiñenia, Jusiñamui jaienici naimie lloga mameçina jítade. Jusiñamui jaienici llua isoi, Jesúna íe mameçina jítade.

22-24 Moisés micorí jaie llua isoi Jerusalémo Jesúna uitíiaímaiaí. Moisés micorí jaie cuete: “Cuarenta dígarui jocua mei, Jusiñamuimona riño marena illena, Jusiñamuimo mena ficíri naiñaiño fecaja. Jusiñamui díga ñairaima íena faja mei, riño facaina Jusiñamuimo jobaica”. Jíai cuete: “Naga nano doforamiedi Jusiñamui íe. Íe muidona naimie facaina Jusiñamuimo ucubena fecaja”. Íe muidona Jerusalémo Jesús díga jaidíiaímaiaí.

25 Naie facaise Jerusalémo Simeón raillamie íte. Jusiñamuimona naimiedi mareuidimie. Jusiñamuina eo ñnocana jaide. Naimie comíçina

Cristo jilloitallena, Cristo billemo ocuride. Naie facaise Jusiñamui Joreño anamo naimie ite.

²⁶ Iemona Jusiñamui Joreñodi, naimiena Cristona cioillena, navui uicodo uiñotade. O nia fioidañenia, Cristona cioitio raillanona llote.

²⁷ Jusiñamui jofomo Jusiñamui Joreño naimiena oretate. Jusiñamuimo Jesúna fecallena, Jesús ei, José diga, Jesúna fo uillana Simeón cioda.

²⁸ Naimiaci dine jaillanona, Jesúna meniñote. Jusiñamuimo iobillacinona fecajano jide:

²⁹ Nama, o anamo iticue.

Cuemo o lloga uai jai suilla jira, uri fioidaiticue.

³⁰ O oretaga Jilloitaraimana jai ciodicue.

³¹ Naimiena oredio, nana comini jilloillena.

³² Naimiedi judíuaiñedinona uanaicinona uiñotaite.

O cominina iobitaite jide.

³³ Iena cacajamona, iaimaiai jitona lloga uairi raicaidiaimaiai.

³⁴⁻³⁵ Simeón iaimaiaimo caimaredicinona llote:

—Jusiñamui omoína raise canoite —llote.

Maríamo llote:

—Ero, ie rafuena llollena, Jusiñamui o jitona jai fetode. Naimie illamona, comini comeciaina facajacinona uiñotaite. Naimiemo suille rafuemonona o comeci sure iite. Cai cominimona ailluena naimiena jitaiñeitimaci. Ailluena jitaitimaci.

³⁶ Nairuido Jusiñamui jofomo Ana railla feciño ite. Jusiñamui naiñaiño lloga rafuena llouide. Naiñaiño moo Fanuel micori. Naiñaiño nairaidi Aser. Jitaiño facaisemona ie ini diga siete años illanona, naimie fiodaite.

³⁷ Naiñaiño jai eo uaiçiño. Ochenta y cuatro años naiñaiñodi jai ite. Jusiñamui jofomo jaca isoide. Nagarui Jusiñamuimo jianona guicabiñeno naimiena sedauide.

³⁸ Simeón ñaiana cacajano, naiñaiño Jesús comini ñine billano, Jusiñamuimo iobillacinona fecade. Naimie billemo naimaci ocuirilla jira, naiñaiño naimaci Jilloitaraïmana nainomo itinomo llocana uite.

Nazaretmo abido naimaci jailla rafue

³⁹ Moisés micori lloga uai naimaci fuidua mei, Jesúna uillanona, Galileamo Nazaretmo naimaci illanomo abido jaidiaïmaiaï.

⁴⁰ Nainomo Jesús sairicana mairicana jaide. Eo abina uiñote. Naimieri iobillamona, Jusiñamui naimiena canouide.

Jerusalémo Jusiñamui jofomo Jesús illa rafue

⁴¹ Naga año Jerusalémo pascua railla rafue ñine Jesús moo iaïmaiaï jaisoidiaïmaiaï. Egiptomona naimaci jaiagai jillobillana comecillena, naie rafue ite.

⁴² Naimiemo doce años illa facaise Jerusalémo iaïmaiaï jaisoilla isoi, jaidiaïmaiaï. Naimie doce años illa jira, Jesúna uitiaïmaiaï.

⁴³⁻⁴⁴ Rafue fuilla mei, abido bitiaïmaiaï. Ailluena comini jiaï billa jira, Jesús billana raise uiñoñediaïmaiaï. “Cai comini diga naimie bite” raillanona comecina facadiaïmaiaï; ia Jesús Jerusalémo fiebide. Darui raifi billa mei, iaïmaiaï cominimo naimiena eo jenodiaïmaiaï.

⁴⁵ Baiñena jira, ñia mei, Jerusalémo darui jailanona, abido jaidiaïmaiaï.

46 Ie are Jusiñamui jofomo naimiena baitiaimaia. Moisés micori llogacinona llofuerañi motomo naimie ite. Naimaci llofuiana cacade. Iena naimaci diga jia siadote.

47 Nana cacadino naimie uiñogacinori rajicaidimaci. Naimie raise siadogacinori jia rajicaidimaci.

48 Naimiena iaimaia baia, rajicaidiaimaia. Ie ei naimiemo jicanote:

—¿Bue ñellena cocona duere finodio? O moomama diga ona eo duere jenodico.

49 Naimie uai ote:

—¿Bue ñellena cuena duere jenodomico? Cue Moo jofomo naimie rafuena finodicue. ¿Niese bene cue illana uiñoñedomico?

50 Naimie llwana raise cacañediaimaia.

51 Iemei iaimaia diga Nazaretmo naimie abido jaide. Iaimaia uai ñnuanona, iaimaia anamo ite. Ie ei María nana naie rafue ie comecimo facauide.

52 Naimie sairicana abina uiñocana jaide. Jusiñamui naimieri iobide. Comini dinena naimiena jia gaidimaci.

3

Jofue iñenanomo Juan Bautista micori illa rafue (Mt 3.1-12; Mr 1.1-8; Jn 1.19-28)

1-2 Jofue iñenanomo diga años Juan illanona, Jusiñamuimona ie uaina feiñote. Naimiedi Zacarías jito. Naie facaiseconi Romamo quince años Tiberio Césardi nanoca illaimana jai ite. Judea railla enirue gobernadori Poncio Pilato. Galilea railla enirue gobernadori Herodes. Naimie amadi Felipe. Iturea railla enirue, Traconite railla

enirue diga, gobernadori Felipe. Abilinia railla
enirue gobernadori Lisantias. Jusiñamui diga
nanoca ñairaima iaïmaiaïdi Anás, Caifás diga.

³ Jusiñamui llua jira, nana Jordán fuemo ite
comini ðine Juan llofuecana jaide. Llote:

—Omoi jeacinona faïnonocaida, Jusiñamui
ðibeimo omoi comeciï iuai meido. Iemona
Jusiñamui omoi jeacinona feitaite. Omoi comeci
iuai omoi meidoia, comini iena uiñollena, mai
omoi bautizallomoi.

⁴ Isaías micori ie rabemo naimïena jaie cuete:
Jofue iñenanomo ðamïe jïdai-jïdaillana cacadiçue.
Naimïe llote: “Cai Nama biite. Naimïe jaillino
atona fino.

⁵ Nana iconi oruita.
Naga aneduai ðiese eniruena judai.
Neïcairuai joide naïsona atona fino.
Naimo itaïcui illa ðiese eniruena oruita, daje fa-
cai illena.

⁶ Nana comini Jusiñamui naimacina jillotaia-
canana uiñoitimaci”
cuete; ia naimaci comeciïna ñaïte. Cai Namana
ïnuana ñaïte. Abina iedoñenana ñaïte. Jeacino
finocana jaiñenana ñaïte. Cai Nama Jesús bia,
Jesús uaina naimaci feiñollena, naimaci comeciï
marena finuana ñaïte.

⁷ Naimacina bautizallena, ailluena comini
naimïe ðine bitimaci. Naimacimo llouide:

—Maraiñede rafuena finocana omoi jailla jira,
jaio nairai isoidomoi. ¿Ñiese jilloitomoi? Cue ðine
omoi billena, ¿bu omoi mo lloga?

⁸ Omoi comeciï iuaillaï meido. Omoi jeacinona
faïnonocai. Iemona Jusiñamui jitaillacinona fino.
Mare rafuena finocana jai. Naiemona omoi

comeciai iuailai meiduana uiñoiticaí. Ie mei bautizallomoi. Omoi comeciaina facañeno: “¿Bue ñellena o llua isoi finoiticaí? Jusiñamui Abraham micorina jaie eo raise nabaide. Abraham micoricaí moo illamona, Jusiñamui riicaillifuemona jilloiticaí”. Ero, omoimo lloiticue: Cue llua isoi omoi finoñenia, naimie riicaillifuemona jilloñeitomoi. Abraham micorí uruiaidomoi; iadedi Jusiñamui jitaillacinodo jaiacaiñedomoi. Naimie jitaia, naimie jitaillacinona naimaci finollena, bene ite noficimona naimiedi Abraham micorí facaina uruiaina comuitarede.

⁹ Ero, llisiñede riará tiedomoi. Tia mei, marañena jira, iena jobaidomoi. Ie isoidomoi. Omoi marañena jira, Jusiñamui omoína jai duere finoacade. Ie riicaillafue anamo jai itomoi. Omoi comeciai iuai omoi meidoñenia, omoína duere finoite.

¹⁰ Iena cacajanona, comini dinena naimiemo jicanotimaci:

—Cai bautizaja mei, ¿ñiese iiticaí? ¿Ñie isoide mare rafuena finoiticaí?

¹¹ Juan uai ote:

—Ailluena iniroiredimiedi iniroinidimiemo iniroina feca. Guilleredimiedi guillenidimiemo guillena feca.

¹² Naimacina bautizallena, gobierno ucubena oraini jiai bitimaci. Jicanotimaci:

—Llofueraíma, cai bautizaja mei, ¿ñiese iiticaí? ¿Ñie isoide mare rafuena finoiticaí?

¹³ Uai ote:

—Gobierno facaina omoi ibataia, cominimona gobierno llua baifemo oñeno.

14 Naimie dine billanona, soldaduai jicanotimaci:

—Cai bautizaja mei, ¿niese iiticaí? ¿Nie isoide mare rafuena finoiticaí?

Uai ote:

—Cominimona rana bairoño. Riicnodo rana oño. Tainona llogidua mona, cominimona rana oño. Omoi ucube illa diese feño. Ie baifemo ucubena nicidoño.

15 Juan llofuiamona naie facaise cominidi Cristo billemo ocurilla jira, “Juandi nibai Cristo” railanona, Juanmo comeciaina facauidimaci.

16 Iena fidiano, Juan llote:

—Cristoñedicue. Jusiñamui dibeimo omoi illamona, jinui diga omoina bautizadicue. Cai baifemo faitimie bie facaise biite. Naimie cue ifomo meidoite. Jamai bue cue isoilla jira, naimiena cue canuana uiñoñedicue. Naimiemo omoi duia, naimiedi Jusiñamui Joreño omoimo itataite. Omoi comeciái iuai omoi meidoñenia, omoina duere finoite.

17 Trigona omoi betaia, mare trigona eenotomoi. Marañede ra oni dotajanona, iena jobaitomoi. Ie isoide. Naimie rafuena lluanona, naimiedi comeciái iuailai meidotinona ie Moo illanomo ofitaitaite; iadedi jiaie cominina duere finoite. Iraimo dotaite. Naie irai jaca duiñede —llote.

18 Bie isoidicnodo cominimo ie mare rafuena llofueuide.

19 Naie facaiseconi Herodedi gobernador. Ie ama ai ote, ie aina illena. Naiñaiñodi Herodías. Diga jiaie mariñede rafuena finode. Ie muidona Juan naimiena lletade.

20 Marañede rafuena Herodes finocana jaillamona, Juan cárcelmo jonetade.

Juandî Jesúna bautizaja rafue
(Mt 3.13-17; Mr 1.9-11)

²¹ Ailluena cominina Juan bautizaja facaise, Jesúna jiaî bautizade. Bautizaja mei, Jesúdi ie Moodîga ñaianona, mona bojode.

²² Ieconî Jusiñamui Joreño ucugîna eruaillano, naimie emodomo ana bite. Monamona Jusiñamui llote:

—Cue isiruiga Jitodio. Ori iobidicue.

Jesucristo ie usumatiaî
(Mt 1.1-17)

²³ Jesús treinta años illamona, Jesús ie maijille rafue tainede. “Naimiedi José micorî jito” raillano naimiemo cominîdi comeciaina facadimaci. Josédi Elî micorî jito.

²⁴ Elîdi micorî Matat micorî jito. Matat micorî Levî micorî jito. Levî micorî Melqui micorî jito. Melqui micorî Jana micorî jito. Jana micorî José micorî jito.

²⁵ José micorî Matatías micorî jito. Matatías micorî Amós micorî jito. Amós micorî Nahum micorî jito. Nahum micorî Esli micorî jito. Esli micorî Nagai micorî jito.

²⁶ Nagai micorî Maat micorî jito. Maat micorî Matatías micorî jito. Matatías micorî Semei micorî jito. Semei micorî José micorî jito. José micorî Judá micorî jito.

²⁷ Judá micorî Joana micorî jito. Joana micorî Resa micorî jito. Resa micorî Zorobabel micorî jito. Zorobabel micorî Salatiel micorî jito. Salatiel micorî Neri micorî jito.

28 Neri micori Melqui micori jito. Melqui micori Adi micori jito. Adi micori Cosam micori jito. Cosam micori Elmodam micori jito. Elmodam micori Er micori jito.

29 Er micori Josué micori jito. Josué micori Eliezer micori jito. Eliezer micori Jorim micori jito. Jorim micori Matat micori jito. Matat micori Leví micori jito.

30 Leví micori Simeón micori jito. Simeón micori Judá micori jito. Judá micori José micori jito. José micori Jonam micori jito. Jonam micori Eliaquim micori jito.

31 Eliaquim micori Melea micori jito. Melea micori Mainán micori jito. Mainán micori Matata micori jito. Matata micori Natán micori jito. Natán micori David micori jito.

32 David micori Isaí micori jito. Isaí micori Obed micori jito. Obed micori Booz micori jito. Booz micori Salmón micori jito. Salmón micori Naasón micori jito.

33 Naasón micori Aminadab micori jito. Aminadab micori Aram micori jito. Aram micori Esrom micori jito. Esrom micori Fares micori jito. Fares micori Judá micori jito.

34 Judá micori Jacob micori jito. Jacob micori Isaac micori jito. Isaac micori Abraham micori jito. Abraham micori Taré micori jito. Taré micori Nacor micori jito.

35 Nacor micori Serug micori jito. Serug micori Ragau micori jito. Ragau micori Peleg micori jito. Peleg micori Heber micori jito. Heber micori Sala micori jito.

³⁶ Sala micorì Cainán micorì jito. Cainán micorì Arfaxad micorì jito. Arfaxad micorì Sem micorì jito. Sem micorì Noé micorì jito. Noé micorì Lamec micorì jito.

³⁷ Lamec micorì Matusalén micorì jito. Matusalén micorì Enoc micorì jito. Enoc micorì Jared micorì jito. Jared micorì Mahalaleel micorì jito. Mahalaleel micorì Cainán micorì jito.

³⁸ Cainán micorì Enós micorì jito. Enós micorì Set micorì jito. Set micorì Adán micorì jito. Adándi Jusiñamui comuitagamie.

4

Taife ramo Jesús faia rafue

(Mt 4.1-11; Mr 1.12-13)

¹ Jusiñamui Joreño anamo Jesús illamona, Jordán railla illemona Jesús jaillano, jofue iñenanomo Jusiñamui Joreño naimiena orede.

² Nainomo cuarenta digarui Taifedi naimiena ramo faite. Naie facaiseconi Jesús jaca guiñede. Naie facaise fuilla mei, guiñeno illamona, naimie aimetaite.

³ Jesús aimetaillana Taife uiñuamona, naimiemo llote:

—Jusiñamui Jitodiodena, naimiemo llono: “Ore Moo, bie noficina llomenicono jaita”.

⁴ Jesús uai ote:

—Iena lloñeiticue. Jusiñamui facaina lloraïma micorì iena jaie cueda: “Jiaie rafuedi llomenico guilla baifemo faite”.

⁵ Ie mei a ite anedumo Taife Jesúsna uillano, dallu illanona, naimiemo nana nairaiaïna acatate.

⁶⁻⁷ Llote:

—Nana bie nairaiaie cue anamo ite. Iena cue iacagamie mo itataredicue. Cuen a o sedajamona, iobillacinona cuemo o fecaia, nana bie nairaiaie omo fecaiticue. Bie nairaiaie illaimana jaitio.

⁸ Jesús uai ote:

—Dama ite. Ona sedañeiticue. Moisés micori jaie cuega: “Cai Nama Jusiñamuina seda. Dama naimie mo iobillacinona feca”.

⁹ Ie mei Jerusalémo Jusiñamui jofo muidomo Taife Jesúsna uite. Raite:

—Jusiñamui Jitodiodena, eniruemo mai ana uai.

¹⁰⁻¹¹ David micori ona jaie cuega:

Ona eenollena Jusiñamuidi ie jaienisaimo lloite. Eniruemo o uaiñellena, o abi bofedaiñellena, ona feiñoitimaci cuega. Naimie lloga uai suillena, bie jofo muidomona mai ana uai. Naimie ie lloga uaina finorede; ia iena cue uiñollena, mai ana uai.

¹² Jesús uai ote:

—Dama ite. Ana uaiñeiticue. Ero, ie cominimo Moisés micori jaie cuega: “Cai Nama Jusiñamuina facaciñeno”. Naimie cuena raise eenuana jai uiñoticue. Jamai ebena naimiena facaciñeiticue. O lluaña finoñeiticue.

¹³ Taife naimiena ramo faia mei, naimiemona ie jitaille dinori oni jaide.

Galileamo Jesús ie rafue lolle jillaci

(Mt 4.12-17; Mr 1.14-15)

¹⁴ Jusiñamui Joreño naimie mo illamona, Galileamo Jesús abido jaide. Nana naie eniruemo naimie mameci soride.

¹⁵ Ailluena judíuai ofiracuaimo naimie llofueuide. Iena cacajanona, comini: “Naimie llofuiacino mare” raitimaci.

*Nazaretmo Jesús illa rafue
(Mt 13.53-58; Mr 6.1-6)*

¹⁶ Macarillamona, Nazaretmo naimie jaide. Navui nainomo naimiedi sairide. Naimie jaisoilla isoi, sábadomo nainomo ite ofiracomo jaide. Jaie ciegafuiaina ado facallena, naimie a naidadate.

¹⁷ Naie lloraco nama mullaímadí Isaías micorí jaie ciegafuiaí jai ferinoga rabe naimiemo fecade. Iena oni suiñocaida, bie rafuena baillanona facade:

¹⁸⁻¹⁹ Jusiñamui Joreño cuemo ite.

Dueredínomo mare rafuena lollena, cuena fetode.

Taife anamo ailluena comini illa jira, Jusiñamui naimacina jillotaiacana uiñoñedimaci.

Jusiñamui rafuena ailluena comini uiñoña jira, naimie illanomo rillena uiñoñedimaci.

Jeacino anamo naimaci illa jira, Jusiñamui naimacina jillotaiacana uiñoñedimaci.

Naimie naimacina duenaillana birui uiñuana jitaide.

Naimacimo mare rafue lollena, cuena jai oretate.

²⁰ Naie rafue facaja fuillamona, ciegafuiaí abido fecade. Naimacina llofuellena, dane ana raide. Nana nainomo ite comini naimiemo eo eruaidimaci.

²¹ Iemei naimie naimacina llofujete. Raite:

—Omoi como cacaja ciegafuiaí omoi motomo jai suide. Cuená ñaite.

²² Naimie lluaná comini cacajano, coninina raitimaci:

—Naimie fue mare. Naimie marena llofujete. —Iemona rajicaillamona, coniniri raitimaci —, Naimiedi jamai José jito. ¿Ñiese naie rafue birui suide?

23 Iena uĩnuamona, Jesús ðinena llote:

—Cue lluana ĩnoñedomoi. Comeciaina facadomoi: “Capernaumo naimie siño fino ca rafuena fididicai. Siño rafuena cai motomo naimie jia finoia, naimiena ĩnoiticai. ‘Ua médico ðuia, ie abina dama jillotarede’ cai einamac raisoidimaci. Ie isoide. Naimie llua isoi naimie ia, siño rafue cai motomo finorede” comeciaina facadomoi.

24 Uanaicinona omoimo lloiticue. Naimie comini nairaimo Jusiñamui facaina lloraĩma ia, ie comini naimie uaina feĩñoiacasiñede. Iena jamaisite. Ie isoide. Cue nairaimo cue illa jira, cue uaina ĩnoñedomoi.

25 Jaie ie isoide. Elías facaiseconi daje amani años abimo atomonado noci ðeĩñede. Aime guitimaci. Naie facaiseconi bie enruemo cai comini ðine ailluena feciñuai itimaci; iadedi omoi jaiagai Jusiñamui uaina ĩnoñedimaci.

26 Jusiñamuidi Elíana cai comini ðine oreñede; iadedi jiaie enruemo ite feciño ðine naimiena orede. Sarepta railla nairaimo orede. Sidón railla enruemo naie nairai ite. Cai cominiñede feciñomo orede.

27 Jiaie rafuena lloiticue. Eliseo micoridi Jusiñamui facaina jaie llote. Eliseo micori facaiseconi bie enruemo ðiga efonaitino ite; iadedi naimacimona Jusiñamui buna jillotañede. Omoi jaiagai Jusiñamui uaina ĩnoñena jira, Eliseo micori ðuidinona jillotañede. Naie facaiseconi dama Naamán micorina jillotate. Cai cominimo naimie ðuiñede; ia Siria railla enruemo ðuide. Ie isoidomoi. Cue uaina ĩnoiacaĩñedomoi —llote.

28 Jesús lluana cacajano, naie ofiracomo itino eo iciritimaci.

29 Naidacaillano, naimiēna jino uitimaci. Naie ilanodi iconimo ite. Nainomo naimiēna uillanona, iconimona naimiēna ana dotaacadimaci.

30 Naimiēna meineiacadimaci; iadedi naimaci motomo naimie jaillanona, naimacimona naimie jillobillano oni jaide.

*Jesúdi Janaba anamo itimie jillotaja rafue
(Mr 1.21-28)*

31 Jesús Capernaumo jaide, Galilea railla eniruemo ite. Nainomo naimie ia, sábadoruimo judíuai ofiracomo jaide. Nainomo llofuete.

32 Illaíma uai isoi naimie llofuia jira, nainomo ite comini naimie llofuiamona raijicaidimaci.

33 Janaba anamo illamie nainomo ite. Jesús llofuiana cacaíta, Janabadi imana ado cuirioitate:

34 —Odi Nazaret ie Jesús. ¿Bue ñeiacadio cai diga? Caina duere finuaibidio. Ona uiñoticue. Odi Jusiñamui ie Mare Fetocamedio.

35 Jesús naimiēna lletade:

—Llicai. Naimiemona oni jai. —Iena cajanona, naimaci motomo Janaba imana ana dotade; ia naimiedi bofedaiñede. Ie mei Janaba naimiemona oni jaide.

36 Iena cíanona, nana nainomo itino raijicaidimaci. Coniniri siadotimaci:

—¿Nie isoide Jesús uai? Janabamo naimie llua mei, imamona Janabadi oni jaide.

37 Jesús finoca rafue muidona, naimie mamecidi nana naie eniruemo soride.

*Jesúdi Simón Pedro jifaiñona jillotaja rafue
(Mt 8.14-15; Mr 1.29-31)*

38 Ofiracomona Jesús jaillanona, Simón Pedro jofomo jaide. Ie facaise Simón jifaiño duide. Abina

cuaride. Naiñaiñoña jilloitallena, nainomo itino Jesúsno jicanote.

³⁹ Naiñaiño ñine Jesús jaillanona, ie uai llua-mona, naie duicodi oni jaide. Ieconí naiñaiño jillode. Abi cuariñede. Naidacaillanona, guille finuanona, ie jofomo itinona ecade.

*Jesúdi ailluena duidinona jillotaja rafue
(Mt 8.16-17; Mr 1.32-34)*

⁴⁰ Nairuido jitoma ana itemo, comini ailluena duidinona Jesús ñine atidimaci. Diga duicuai illanona atidimaci. Naimacina jetajamona, naimacina jillotate.

⁴¹ Jananiaina jiai oni oretajano, jananiái ñinena raite:

—Odi Jusiñamui Jitodio. —Naimiena naimaci uñua jira, Jesús naimaci ñaiana rairuide. Naimiedi Jusiñamui Jitona uñotimaci.

*Judeamo Jesús llofuia rafue
(Mr 1.35-39)*

⁴² Ie areruido jiteramo jofue iñenanomo Jesús jaide; iadedi comini naimiena jenuaidimaci. Baillanona, naimaci motomona naimie jaiñellena jicanotimaci.

⁴³ Naimacimo llote:

—Jiaie nairaimo cue mare rafuena lloiacadicue. Naimie anamo comini illana Jusiñamui jitailla jira, naimacimo iena lloiacadicue. Ie mare rafuena llollena, Jusiñamui cuena orede. Oni jaiticue. Omoi diga fiebiñeiticue.

⁴⁴ Ie mei Judeamo ite ofiracuaimo Jesús llocana jaide.

5

Jesús muidona, naimaci ailluena lliciaina ua rafue

(Mt 4.18-22; Mr 1.16-20)

¹ Jiairuido Genesaret railla jorai fuemo Jesús ia, ailluena comini naimie dine bitimaci. Ie rafue raise cacaillena, conini oni ñuicocana naimie ecimo bitimaci.

² Ie facaise jorai fuemo Jesús mena sijide botena cide. Naimaci lloijina naimaci jocua jira, naie botemo lloiji fairaini ñede.

³ Comini ie llofuiacinona raise cacaillena, Jesús daje botemo jaide. Naie bote namadi Simón Pedro. Naie bote joraimo janore bai ñuitallena Simómo jicanote. Botemo ana raíta, botemona cominina llofuite.

⁴ Llofua mei, Simómo llote:

—Aforedinomo jai. Nainomo omoi lloijina faíno.

⁵ Simón uai ote:

—Maestro, cue nabaiñiai diga namona naio lloiji faiticai; iadedi jaca buena oñedicaí. ¿Ñiese ja oiticaí? Iadedi o llua jira, lloijina faiticue.

⁶ Iena naimaci faia mei, ailluena lliciaina jitatimaci. Ie jira naimaci lloiji cuaranoiacade.

⁷ Iena ciuano, onolli diga imaci nabaiñiaina uaidote, naimiena naimaci canollena. Naimaci canuaibilla mei, lliciaina naga bote oruitate. Eo oruilla jira, buiacade.

⁸ Iena ciuano, Simón Pedro Jesúsimo iobillacino fecallena, caiñici ifodo rainadate. Raite:

—Odi siño Jitodio; ia cue jamai bue isoilla jira, cuemona oni jai. Jecinona finouidimiedicue.

⁹ Ailluena lliciaina naimaci ua jira, naimaci rajicaillamona, iena naimie llote.

¹⁰ Naimie nabaiñiaimona Zebedeo jito iaimaiaite. Juan diga Jacobo iaimaiaite. Simómo Jesús llote:

—Cuenta jaciruiño. Lliciaina birui ocabitomoi; iadedi cue dibeimo naimaci illena, biruimona comina oitomoi.

¹¹ Eniruemo sijiano, naimaci raruaifanonocaida, Jesús diga jaidimaci.

*Jesúdi efonaitimiena jillotaja rafue
(Mt 8.1-4; Mr 1.40-45)*

¹² Jiairuido Jesúdi jiaie nairaimo ia, efonaitimie naimie dine bite. Naimie eo fodo jaide. Jesúsna naimie cuano, naimiena raise uaiduamona, ana bitadate. Llote:

—Maestro, o jitaiededi, cuenta jillotaredio.

¹³ Jesús ie onolli oni ñuitajanona, naimiena jetade. Raite:

—Ona jillotaiacadie. Mai o jillo. —Ieconi jillode.

¹⁴ Jesús naimiemo llote:

—Omo suide rafue jaca bumo lloño; iadedi Jerusalémo Jusiñamui jofomo Jusiñamui diga ñairaímamo o abina acatajai. O jillua jira, Jusiñamuimo Moisés micori jaie lloga rana feca lemona comini o jilluana uñoitimaci.

¹⁵ Iese Jesús naimiemo llote; iadedi Jesús finoca rafue llocana eo uite. Ie muidona naimie llua cacaillena, duidinona Jesús jillotallena, ailluena comini naimie dine bitimaci.

¹⁶ Bitimaci; iadedi Jusiñamui diga ñaillena, jofue iñenanomo Jesús jaide.

*Jesúdi tísitaitimiena jillotaja rafue
(Mt 9.1-8; Mr 2.1-12)*

17 Jiairuido naimie llofueia, diga comini naimie illa jofomo bitimaci. Fariseuai railla comini bitimaci. Moisés micori llogacinuaina llofueraini bitimaci. Galileamona diga nairaimona bitimaci. Judeamona bitimaci. Jerusalémona bitimaci. Jusiñamui uaido Jesús naimie dine bite duidinona jillotate.

18 Ie facaise ie bïramo bïde tísitaitimiena Jesús dine damierie atidimaci;

19 iadedi naimaci uillifo iñena jira, ailluena comini illa jira, riñedimaci. Naie jofo bibanilla jira, jofo emodomo a jaidimaci. Jofo beicimo ite tidabacuido a jaidimaci. Jofo emodo econocaida ifodo naimiena ie bïramo bïde diga, comini motomo Jesús ecimo ana ñuitadimaci.

20 Iena Jesús cïuanona, tísitaitimie jilluana naimaci iinuana Jesús uiñote. Tísitaitimie lloote:

—Jadi, o jeacinona cue feitaja jira, iena oni jai dotadicue. Ie facai ibana jai oñeiticue.

21 Nainomo itinomona Moisés micori llogacinona llofueraini itimaci. Fariseuai jiai itimaci. Comeciaina facadimaci: “Naimie Jusiñamuina jeare ñaite. Dama Jusiñamui jeacinona dotarede. Bimie Jusiñamuiñede; ia Jusiñamui ifomo iacade”.

22 Naimaci comečiai facajacinona Jesús uiñuanona, naimacimo jïcanote:

—¿Bue ñellena omoi comeciaina iese facadomoi?

23 Bimiemo: “O jeacinona jai oni dotadicue” cue lloia, cue uai siñonana uiñoñeitomoi; ia bimiemo:

“Mai naidacaillanona macari” cue lloia, cue uai siñonana uiñoitomoi.

²⁴ Monamona jaie cue billanona, iimana jaidicue. Ie jira jeacino oni dotaja uai cuemo ite. Iena omoi uiñollena, tisitaitimie mo lloiticue: “Mai naidacai. O biira ferianona, o jofomo mai jai”.

²⁵ Iese naimie raillamona, tisitaitimie jillode. Ieconi naimaci motomo naimie naidaide. Ie biira feriano, Jusiñamuimo iobillacino fecajano, ie jofomo jaide.

²⁶ Nana naiena ciodino eo rajicaidimaci. Iemona Jusiñamuimo iobillacinona fecadimaci. Eo rajicaillamona, raitimaci:

—Bie isoide siño comena jaca cioiñedicaí.

Jesúdi Levína fetua rafue
(Mt 9.9-13; Mr 2.13-17)

²⁷ Jesús jino macarillano, gobierno facaina ucube oraimana ciode. Naimie mameci Leví. Ie ucubena ouillanomo raide. Jesús naimiemo llote:

—Cue llofuegamiena o jaillena, cue diga bi.

²⁸ Naidacaida, Jesús diga jaillanona, ie maijiana faionocaide.

²⁹ Nailli ie jofomo Leví aillue rafuena finode, Jesús iena. Diga ucube oraini guisaibitimaci. Diga jiaie comini jiai guisaibitimaci. Jesús diga danomo guitimaci.

³⁰ Nainomo fariseuai cominidi, Moisés micori llogacino llofueraini diga, jamai bitimaci. Jesúsna cianona, ie llofueoicaiganomo jicanotimaci:

—¿Bue ñelli ucube oraini diga guitomoi? Maraiñede comini diga guitomoi.

Moisés micori llogacinodo ucube oraini raise jaiñenamona, naie isoidino diga fariseuai comini nabairiñena jira, iese jicanotimaci.

³¹ Jesús iena cacajano, llote:

—Ecairedino médicono jitaiñedimaci; iadedi duidinodi médicono jitaiddimaci.

³² Jusiñamui dibeimo mareuidinona uaibiñedicue; iadedi maraiñedinona uaibiticue.

Jesúmo comini guiñenana jicanua rafue

(Mt 9.14-17; Mr 2.18-22)

³³ Naie facaise fariseuai dinena Jesúmo llote:

—Cai einamací llua isoi, Jusiñamuina cai raise iobitallena, guiñenaruillai illa facaiseconi guiñedicai. Jusiñamuimo jicabidicai. Cai jeacino facaina sunaicabiticai. Cai einamací rafuedo Juan Bautista llofueoicaigano jaidimaci. Cai llofuegano iedo jiai jaidimaci; iadedi o llofueoicaigano jaca gutimaci. ¿Bue ñellena cai einamací rafuedo jaiñedimaci?

³⁴ Jesús uai ote:

—Jiaie rafuedo iena lloiticue. Coniruedi ie aina uarui ia iobilla jira, ie nabaiñiai sunaiñedimaci. Iobillamona gutimaci.

³⁵ Jiairuido jai aireiacade conirue naimaci diga iñenia, naimaci comeci sunaillamona, naimaci jitaia, guiñenaruillaidi iite. Ie isoide. Cue comini diga birui cue illa jira, iocire itimaci. Ico cue jaille mei, sunaitimaci. Ie muidona birui cue llofueoicaigano guicabitimaci.

³⁶ Jiaie rafuedo iena lloiticue: Nia jocoñega comue iniroidi jacaie iniroimo jilliñega. Jilliadi jocua

mei, comue iniroi jacaie iniroimona fo llirite. Eo fodo cuararite. Jai maraiñeno cioite.

³⁷ Jacagomona finoca bolsa como finoca vino joneñega. Jonegadena, mairiñena jira, sirillamona igoi raire cuararite. Vino faifite. Igoi jiai faifite.

³⁸ Como finoca vino comogomo jonelle. Iemei iena faifiñeite.

³⁹ Navui finoca vino jirua mei: “Navui finoca vino nia mare” raillamona, como finoca vino buna jiroacaiñede. Ie isoide. Omoi einamací rafue ifomo jiaie rafue birui ite. Iena omoimo llocabitícue. Iedo jaidicái; ia omoi einamací rafuemo omoi fibilla jira, jiaie rafuedo birui jaiacaiñedomoi — llote.

6

Sábadoruimo Jesús llofueoicaigano maijia rafue (Mt 12.1-8; Mr 2.23-28)

¹ Jiairuido sábadoruimo Jesús, ie llofueoicaigano diga, trigo illa illi motodo joide naisona jaide. Ie llofueoicaigano trigona tijiano, golluano, guicana jaidimaci.

² Dajerie fariseuai iena ciuano, llotimaci:

—Rairuica rana finosite. Moisés micori rairuilla jira, sábadoruimo maijinidicái; iadedi trigona naimaci tijiamona, caimona jai maijidimaci. Caimona jeacinona jai finodimaci.

³ Ie llofueoicaiganona riiduanu, Jesús uai ote:

—Cuemona jeacino finoñedimaci. David micori jaie finoca rafuemo omoi comeciai raise facañedomoi. David micori guille iñenia, naimie aimetaia, ie nabaiñiai diga Jusiñamui jofomo fo jaide.

4 Jusiñamuimo fecaca llomeniconona uanona, guitimaci. Jamai bue isoidino naie llomeniconona guillana Jusiñamui rairuide. Dani Jusiñamui diga ñairaini iena guiredimaci. David micori iena guite; ia Jusiñamui naimacina duere finoñede.

5 Monamona cue billamona, imana jaidicue. Ie jira sábadoruimo comini finolle rafuena rairuiredicue. Nairuimo finoñelle rafuena jia rairuiredicue. Ie jira nairuimo cue jitailla rafuena finoredicue.

*Jesúdi onollina idisarodimiena jillotaja rafue
(Mt 12.9-14; Mr 3.1-6)*

6 Jiaie sábadoruimo judíuai ofiracomo Jesús jailanona, llofuate. Ie facaise nainomo nabellimo idisarodimie ite.

7 Moisés micori llogacinona llofueraini, fariseuai diga, Jesúmo eruaidimaci, sábadoruimo Jesús naimiena raabaca ie segoitai. Iena Jesús finoia, naimacimona sábadoruimo naimie jai maijia jira, naimiena llogidoiacadimaci. Naimacimona sábadoruimo bu maijia, jeacinona finode.

8 Naimaci comeciaina facajacinona Jesús uñuamona, onollina idisarodimie mo llote:

—Cue ecimo naidada. —Iemei Jesús ecimo naidate.

9 Jesús nainomo itinomo jicanote:

—¿Nie isoide rafue sábadoruimo finuadena mare? Bimie birui cue jillotaiadedi, birui mare rafuena finodicue. Cuen a birui omoi meineiadedi, birui marañede rafue finodomo. Sábadoruimo ¿nie isoide rafue finuana rairuidomo?

10 Naimacimo eruaillanona, duidimie mo llote:

—O onolli mai oni ñuita. —Iena ñuitajanona jilode.

¹¹ Nainomo itino iena ciuanona, eo iciritimaci.

—¿Niese Jesúna nibaiticaí? —naimona coniniri siadotimaci.

*Jesúdi ie doce llofueoicaiganona fetua rafue
(Mt 10.1-4; Mr 3.13-19)*

¹² Nairui aneduaimo Jesús jaide, Jusiñamui diga ñaillena. Namona naio jide.

¹³ Monaidemo, ie llofueganona naimie dine uaidote. Naimacimona doce digamiena fetode. Naimie diga icabillena, naimacina naimie facaina llorainina naimaci jaillena, naimacina fetode.

¹⁴ Iese mameciredimaci: Simón; naimie mameci jiaicidi Jesús jitaca Pedrona. Andrés; naimiedi Pedro ama. Jacobo, Juan, Felipe, Bartolomé,

¹⁵ Mateo, Tomás, jiaie Jacobo; naimiedi Alfeo jito. Jiaie Simóna fetode. Naimiedi cananista comini facaisemo duide.

¹⁶ Judas; naimiedi Jacobo jito. Judas Iscariote micori; naimiedi Jesúna gaitatimie.

*Jesúdi ailluena cominina llofuia rafue
(Mt 4.23-25)*

¹⁷ Aneduaimona siniaidinomo ie doce llofueoicaigano diga Jesús bite. Ie jiaie llofuegano naimie dine bitimaci. Ailluena jiaie comini bitimaci. Nana Judeamona bitimaci. Jerusalémona bitimaci. Tiromona bitimaci. Sidómona bitimaci. Tiro monaillai fuemo ite. Sidón monaillai fuemo jiaí ite. Naimie lluamo cacareillena bitimaci. Naimaci duicomona jiaí jilloiacadimaci.

¹⁸ Jananiai anamo itinomona Jesús jananiaina oni orede.

19 Nana comini naimiena jetaacadimaci. Naimiemo siño uai illa jira, naimiena jetajamona, naimaci duicomona jillodimaci.

Jesús lloga rafue
(Mt 5.1-12)

20 Ie llofueganomo eruailanona, Jesús llote:

—Naimie anamo omoi jai illamona, Jusiñamui omoina sedaacana rafuena omoina llofueiticue. Naimiena jitaidomoina, omoina sedaite. Comeciaina facadomoi: “Jusiñamui jitaillacinona dani finonidicai; ia Jusiñamui caina canuamona, iena finoiticaí”. Naimie comini omoi illamona, naimie omoina canoite. Iemona caimare iitomoi.

21 Naimie jitaillacino omoi finuamona, Jusiñamui omoina sedaite. Naimiedi mare rafuena omoi finuana canoite. Iemona caimare iitomoi. Omoi sunaia, Jusiñamui omoina sedaite. Ailluena comini jeacino finocana jaidimaci. Iena uiñuamona, sunaitomoi. Naie isoidino omoi illamona, Jusiñamui omoi comeciaina ocuiñotaite. Iemona iocire iitomoi.

22 Cuemo omoi duia, duere sefuitomoi. Jiaie comini omoina enoitimaci. Omoina oni dotaitimaci. Omoina jeare ñaitimaci. Cuemo omoi duilla jira, omoina jamaitimaci; ia Jusiñamui omoina caimare itataite.

23 Omoi isoi omoi jaiagamona Jusiñamui facaina lloraini micoriai jaie duere sefuidimaci. Iena omoi uiñuamona, monamo Jusiñamuimona ailluena ibana ico omoi feiñua jira, birui omoi duere sefua, iocire omoi jai.

24 Iese iitomoi; ia Jusiñamuina jitaiñedino ico duere sefuitimaci. Comeciaina facadimaci:

“Jusiñamuina jítaiñedicaí. Marena birui itícaí. Nana caí comeciaí jítaillacino birui caímo ite”. Iese birui itímací; ía Jusiñamui naimacína íco duere finoite.

²⁵ Jusiñamuimona buena birui jítaiñedíno íco duere sefuitímací. “Nana caí comeciaí jítaila rafue caímo birui illa jira, Jusiñamuimona buena jítaiñedicaí” raitímací. Iese birui itímací, ía Jusiñamui naimacína íco duere fínuamona, buenitímací. “Caí comeciaina íocíre itatallena, Jusiñamuina jítaiñedicaí” damíerie birui raitímací. Naimací jeacino facaina sunaiñedímací. Birui ite rafuena ebiruitímací. Iese birui itímací; ía Jusiñamui naimacína íco duere fínuamona, sunaitímací. Eeitímací.

²⁶ Naimacíri íobillamona, omoí jaiagaidí Jusiñamui facaina llorainína abí caitadínona marena ñaitímací. Damíerie birui daje ísoídímací. Jusiñamuina íobitaiacaiñedímací; ía comínína íobitaiacadímací. Iemona comíní naimacína marena ñaitímací; ía Jusiñamui naimacína íco duere finoite.

Jesúdi íba oñenana llua rafue

(Mt 5.38-48; 7.12)

²⁷ Jesús llote:

—Cue lluana cacajamona, íena íno. Ínuamona omoína enoídínona ísiruí. Naimacína cano.

²⁸ Omoí jeare ñaitínona marena ñaino. Omoína jeare finodíno facaina Jusiñamuimo omoí jíí.

²⁹ Omoí cacaina bu dutaiade, íba oñeno; íadedí enefebeimo dobaida, enefebeimo jíai dutallena. Omoí iníroína bu baíroiacania, omoímo naimíe

nia jicañenia, naimie jitailla iniroi baifemo naimiemo feca.

³⁰ Omoimo ite rana bu jicaia, iena caidiñeno feca. Omoimona rana bu bairoia, iena abido jicañeno.

³¹ Jusiñamui jitaillacinona omoi finuamona, jiaie cominina marena fino. Jiaie comini omoina finuana omoi jitailla isoi, naimacina fino. Naimaci omoina marena finuana omoi jitaia, naimacina marena fino. Naimaci omoina maraiñeno finuana omoi jitaia, naimacina ie isoi maraiñeno fino. O finoacaga ra isoi jiaie cominimo fino.

³² Naimie cominina omoi illamona, nana comini daje isoi isirui. Omoina isiruitinona omoi isiruia, mare; iadedi omoina gaiñenanona omoi isiruiñenia, Jusiñamui omoina: “Mare” raiñeite. Maraiñede rafuena finoraini naimacina isiruitinona isiruitimaci. Nana cominina omoi isiruiñenia, maraiñede rafuena finoraini baifemo faiñedomoi. Naimaci isoi itomoi.

³³ Naimie cominina omoi illamona, nana comini daje isoi cano. Omoina canodinona omoi canoia, mare; iadedi omoina canoñedinona omoi canoñenia, Jusiñamui omoina: “Mare” raiñeite. Maraiñede rafuena finoraini naimacina canodinona canodimaci. Nana cominina omoi canoñenia, maraiñede rafuena finoraini baifemo faiñedomoi. Naimaci isoi itomoi.

³⁴ Naimie cominina omoi illamona, nana cominimo daje isoi rana feca. Omoimo ra fecadinomo rana omoi fecajia, mare; iadedi omoimo rana fecañedinomo rana omoi fecañenia, Jusiñamui omoina: “Mare” raiñeite. Maraiñede rafuena finoraini naimacimo rana fecadinomo rana jiai fecadimaci. Nana cominimo rana omoi fecañenia, maraiñede rafuena finoraini baifemo

faiñedomoi. Naimaci isoi itomoi.

³⁵⁻³⁶ Omoína gaiñedinona isirui. Naimacimo mare rafuena fino. Naimacimo rana jamai feca. Naimacimona iba uamo ocuirineno; ia Jusiñamui omoi raise ibaite. Jusiñamui maraiñedinona canocabide. Naimieri iobiñedimaci; ia naimacina canocabide. Naimacina duenaicabite. Ie jira maraiñedinona omoi duenai. Naimie isoi omoi illamona, maraiñedinodi naimie cominina omoi illana uinõitimaci. Jusiñamuidi cominina duenaila isoi, cominina omoi jiaí duenai.

*Jesúdi jiaie cominina mameriñenana llua rafue
(Mt 7.1-5)*

³⁷ Jesús llote:

—Duenailacinona nia llofueiacadicue. Jiaie cominina mameriñeno. Jiaie cominina omoi mameria, omoimo ite maraiñede rafue facaina Jusiñamui omoína duere finoite. Omoimo maraiñede rafuena bu finoia, iena feita. Iena omoi feitañenia, Jusiñamui omoimo ite maraiñede rafuena feitañeite.

³⁸ Jiaie rafuedo iena lloiticue. Rana omoi fe-caia, iena raise omoi gaieia, ico ibana omoi oia, raise gaiecana feiñoitomoi. Ie isoide. Jiainomo maraiñede rafuena finoñeno; ia naimacina duenailamona, naimacimo rana jamai feca. Iena raise feca. O fecaja diese Jusiñamuimona eo raise ibana feiñoitomoi.

³⁹ Naimacina iena nia llofuiamona, naimacimo Jesús jiaie rafuena llote:

—Cue cominina omoi illamona, bie rafuena cacarei. Uanaicinodo omoi jaiñenia, uisinidimie

isoi iitomoi. Uisinidimie jiaie uisinidimiena ifonide. Ifo iade, nagamaia; dafomo uaidia; maia;.

⁴⁰ Fueotimie ie llofuera; ma baifemo uaiñede; iadedi naimie raise fueoia, ie llofuera; ma isoi jaite. Raise fueollena, cue uaimo cacarei.

⁴¹ Omoi ecimo itimie; mo janore maraiñedicino illana omoi uiñoia, iemo comecina facañeno; iadedi omoi; mo ailluena ite maraiñedicinomo nano omoi comecina faca.

⁴² Omoi; mo maraiñedicino illamona, ¿niese omoi ecimo itimiena mameritomoi? Omoi; mo ite maraiñedicinomo omoi comecina faca; acañena jira, maredinona abi caitadinomoi. Omoi comeci; ana nano raise fino. Iemei omoi ecimo itimiena canorenitomoi. Naimie comecina raise canorenitomoi.

Jesú; riará llisilla lilla llua rafue
(Mt 7.17-20; 12.34-35)

⁴³ Jesús nia llofue; te:

—Mare riará maraiñede riará isoi llisiñede. Maraiñede riará mare riará isoi jia; llisiñede.

⁴⁴ Llisillamona nie isoide riará illana uiñotica; . Amena ie llisilla llillamona amena marena uiño; ga. Llillamona, amena maraiñenana jia; uiño; ga. Eecua; imona uvas railla riarana oñedica; . Monaig; imona higos railla riarana jia; oñedica; .

⁴⁵ Ie isoide. Naimaci comeci; amo iticinomona comini ñaitimaci. Mare comeci iticinomona mare; miedi mare rafuena finocabide. Maraiñede comeci iticinomona maraiñedimie maraiñede rafuena finocabide.

Jesú; naimiena #nuana ña; a rafue
(Mt 7.24-27)

⁴⁶ Jesús nia llofue; te:

—Omoimona damierie cuena: “Cai Nama” raitomoi; iadedi cue llogacinona finoñedomoi.

⁴⁷ Diga comini cue dine bitimaci. Cue uaina cacadimaci.

⁴⁸ Cue uaina inotimie jofona raise finodimie isoide. Jofona raise finodimiedi ie jofona finodemo, jofona goiñellena, nofici illa dinori eo ana raite. Noci deidemo, eo jinuidemo, jofomo ille toia, jofo raise finua jira, jofo goiñede. Iena faifiñede. Ie isoide. Cue llwana inotimie faifiñeite.

⁴⁹ Cue uaina inoñedimie jofona raise finoñedimie isoide. Jofona raise finoñedimiedi ie jofona finodemo, enirue emodomo iena finode. Ana raifñede. Noci deidemo, eo jinuidemo, jofomo ille toia, jofo goillamona, jai eo judaisite. Iena faifide. Ie isoide. Cue llwana inoñedimie faifite —llote.

7

Jesúdi capitán mullaimana jillotaja rafue (Mt 8.5-13)

¹ Ie llua fuillamona, Jesús Capernaumo jaide.

² Nainomo romanos railla nairaimo duide illaima ite. Cien soldaduaína sedauide. Naimiedi capitán. Judiuñedimie. Ie mullaima eo duide. Niade fiodaiaCADE. Capitán naimiena eo gaide.

³ Capernaumo Jesús illana capitán fidiano, Jesús dine judíuai einamacina orede. Naimie dine Jesús billena jitaide. Ie mullaimana jillotajaibillena jitaide.

⁴ Jesús dine naimaci rillano, capitán dine naimie billena, naimiemo duere jicanotimaci. Raitimaci:

—Naimiedi caimona maremiena jira, naimiena o canuana jitaidicai.

⁵ Cai nairaina isiruite. Ie ucube diga cai ofiracóna finotate.

⁶ Iena cacajamona, Jesús naimaci diga jaide. Capitán jofomo iaírei Jesús ria, capitádi Jesús dine ie nabaiñiaína orede, Jesúmo lollena:

—Maestro, biñeno. Jamai bue cue isoilla jira, cue jofomo biñeno.

⁷ Jamai bue cue isoilla jira, o dine jiaí jaiñedicue. O illanomona o uaido cue mullaíma jilloita.

⁸ Jiaíe illaícomini anamo iticue. Naimaci lloga uaina ñnoticue. Cue anamo jiaíe soldaduai illanona, cue uaina ñnotimaci. Cue anamo cue mullaíma illa jira, naimiedi cue uaina ñnote. O anamo naie duico illa jira, o uaina bene o lloia, cue mullaíma jilloite.

⁹ Iena cacajano, Jesús rajjicaide. Oni dobaidajano, naimie diga jaidinomo lote:

—Bie isoidimie cue uaina ñnotimiena jaca baiñedicue. Cai judíuai cominimona bie isoidimiena jaca iñede. Mai abido jai.

¹⁰ Capitámona bitino abido capitán jofomo rilano, mullaíma jai jilluana cioidimaci.

Jesúdi feciño jitona jillotaja rafue

¹¹ Jiaíruido Naín railla nairaímo Jesús jaide. Ie llofueoicaigano jiaí jaidimaci. Ailluena comini jiaí jaidimaci.

¹² Naie nairai ie nasemo naimie iaíreicaia, jai fioidaitimiena comini jino atiana ciode. Naie fioidaitimiedi conirue. Ie eidi feciño. Dajede ie jitodi jai fioidaite. Ailluena Naín itino naie feciño diga jaidimaci.

13 Jesús naiñaiñona ciuanona, naiñaiñona due-naite. Naiñaiñona raite:

—Mai eeñeno.

14 Fiodaitimie dine Jesús jaillanona, naimaci ieconi naidadallena, ie uiga rana jetade. Naimiena uitinodi ieconi naidadatimaci. Fiodaitimie mo Jesús llote:

—Mai a rainada.

15 Iena Jesús llua mei, naie fiodaitimie ie uiga ramona a rainadate. Ie meinoconi naimie ñaite. Jesús naimiena ie eimo abido ite.

16 Naieri nana jacinaitimaci. Jusiñamuimo iobil-lacinona fecadimaci. Raitimaci:

—Jusiñamui facaina lloaíma cai motomo ite. Naimie uai eo siño. Naimiena Jusiñamui ore-taja jira, Jusiñamui caína birui canoacana jira, iobidicai.

17 Nana Judeamo itino Jesús finoca rafuena fididimaci. Judea enirue fuemo ite nairaiaidi jiai fididimaci.

Jesús dine Juan Bautista micori ie llofueoicaiganona oretaja rafue

(Mt 11.2-19)

18 Juan Bautista micori llofueoicaiganodi nana Jesús finoca rafuena fidiano, iena naimie mo llote. Ie llofueoicaiganomona Juan micoridi menamiena uaidote.

19 Llote:

—Jofue iñenanomo navui cue ia, jiaimie billena llofuecabiticue. Jesús dine omico jai: “¿Buudio? ¿Odi Juan llofuegamiedio? ¿Jiaimie billemo nia ocuiritica?” naimie mo jicano.

20 Jesús dine iaímaiaí rillano, Jesús mo llotiaímaiaí:

—Juan Bautista cocona orede. Jofue iñenanomo navui naimie ia: “Jusiñamuimona damie biite” naimie llofuecabite. Juan llofuegamiēna o illana uiñoiacadicaī. Imieñediōdena, jiaimie billemo nia ocuiriticaī. Cocomo llono.

²¹ Jesús dīne iaīmaiaī billa facaiseconi, Jesús diga isoide duicuaī illanona jillotate. Jananiaī anamo itinomona jananiaīna oni jiaī orede. Uisīnidīnona uisīna dane ciotate.

²² Ie jira Jesús iaīmaiaīmo llote:

—Cue llwana cacadomīco. Cue finoca rafuena ciodomīco. Juan dīne abīdo omīco jaillanona, iēna naimiemo llono. “Uisīnidīno jai ciodimaci. Ñuja-ñujacaida jaidīnodi jai raise macaritimaci. Efonaitīno jai jillodimaci. Jefona cacaiñediōnodi jai jefona cacasite. Fiodaillamona damierie jai jillodimaci. Dueredīno mare rafuena jai cacadimaci”. Iese naimiemo llono.

²³ Jiaī llono: “Nibaī nana cue rafuena raise cacaiñediō; ia cuena jaca nia īnocana o jaia, caimare iitio”.

²⁴ Iaīmaiaī abīdo jailla mei, naimie ecīmo ailluena ite comīnimo Jesúdi Juan rafuena llote:

—Jofue iñenanomo naimie navui ia, naimie dīne jaidomoi. ¿Nie isoidimīēna ciodomoi? Daje uaido rafuena comecina facadimīēna ciodomoi. Ero, fuirīna aīfi billamona, raitire afai bijīde. Afaina aīfi billamona, raitire fuirī bijīde. Naimie ie isoīñede. Nie isoide rafue naimiemo ia, cue rafuena llocana jaide.

²⁵ ¿Bue ñellena naimie dīne jaidomoi? Mare iniroīna jītadimīēna cioīñedomoi. Mare iniroīna

jítadinona omoí cioacaniadedi, illaicomini dine jaidomoi. Naimacimo ailluena ra ite.

²⁶ Jusiñamui facaina lloraimana ciodomoi. Naimie Jusiñamui facaina llocabite. Jiaie lloraini baifemo faite, cue billena omoimo naimie llua jira.

²⁷ Malaquíás micori naimiena jaie cuega: “Jusiñamui raite: ‘Ero, o uicodo cue rafuena llolena, damiena oretaiticue, comini comeciaina marecinona duiñollena’ ” cuega. Malaquíás Juan Bautistana cuete.

²⁸ Juan Bautista nana Jusiñamui facaina lloraini baifemo faite; iadedi Jusiñamui cominina birui bu illamona, Juan baifemo birui faite. Juan cue billena llofuede; ia naimie cue lloga rafuena omoí isoi cacaiñede. Naimie cue lloga rafue omoí isoi suillana cioiñede. Iemona naimie baifemo faitomoi.

²⁹ Naimacina navui Juan bautizaja jira, nainomo ite comini iena cacajano, Jusiñamuimo iobillacinona fecadimaci. Gobierno ucube orainidi jiaí fecadimaci;

³⁰ iadedi fariseuai iobillacinona fecañedimaci. Moisés llogacinuaina llofueraíni jiaí fecañedimaci. Jusiñamui naimacina jillotajana naimaci jamailla jira, naimaci jeacinona Jusiñamuimo lloñena jira, Juan naimacina navui bautizañede.

³¹ Jesús llote:

—Cuen a ñnoñedinona lloiticue: Ero, omoína ñaiticue.

³² Jifanote uruiaí isoidomoi. Uruiaí jifanoiacania, naimaci nabaiñaína uaiduanona, raitimaci: “Omoí diga jifanoiacadicaí; iadedi cai diga jifanoiacaiñedomoi. Camarede rafuena cai jifanoiacania, sunailla rafuena jifanoiacadomoi.

Sunaila rafuena cai jifanoiacania, caimarede rafuena jifanoiacadomoí. Coninina nabairiñedicaí” raitimaci.

³³ Ie isoidomoí. Juan jirorainide. Caimare guiñede; ia naimie diga nabairiñedomoí. Naimiena gaiñedomoí. Ie jira omoimona dajerie naimiena raitimaci: “Janaba anamo naimie illamona, naimie uairico isoi ite” raitimaci.

³⁴ Monamona billanona, iimana jaidicue. Omoí isoi guticue. Caimataidicue; ia cue diga nabairiñedomoí. Cuenai jiai gaiñedomoí. Ie jira cuena jeare ñaitomoí. Raitomoí: “Guillaredimie. Jiroruidimie. Jearede rafue finodino diga nabairitimiedio”.

³⁵ Iese raitomoí; iadedi Jusiñamuina inotinodi cue finoca rafuena marenana uinotimaci.

Jesús Simón jofomo illa rafue

³⁶ Jiaruido fariseuai cominimona, ie jofomo naimie diga guillena, damiedi Jesúna uaidote. Naimiedi Simón. Naimie dine Jesús jaillanona, naimie diga guite.

³⁷ Jesús guitemo, daje riño fo jaide. Naiñaiñodi maraiñede rafuena finoraiño. Naicomo Jesús guillana fidiano, naiñaiño fo jaide. Noficimona finoca frascona atide, na soride ra illa diga.

³⁸ Judíuai aciata jaca guisoidimaci. Jinafo dine eilli jonesuidimaci. Fo jaillano, naie riño Jesús abimo naidaide. Naiñaiño eiamona, naiñaiño uisimona uaide uillinociai diga Jesús eillina jocode. Safenaillena, naimie eillina ie ifotie diga dote. Ie eillina jiai llibanote. Ie mei ie eillimo frascomona soride rana totade. Naimiena naiñaiño isiruillanona, iese naiñaiño finode.

³⁹ Iena ciuanona, Simón dama começina facade: “Bimie Jusiñamui facaina lloraimadena, nie isoide naimiena jetade riñona niade uiñote. Naimiedi naiñaiño maraiñede rafuena finoraiñona uiñote. Iena naimie uiñuamona, naiñaiñona jino raire orede. Naimiedi Jusiñamui facaina lloraimañede”.

⁴⁰ Jesús naimie começina facajacinona uiñuano, naimiemo llote:

—Simón, naiñaiño finoca rafuena o raise fueol-lena, omo bie rafuena lloiacadicue.

Simón uai ote:

—Maestro, mai cuemo llono.

⁴¹ Jesús llote:

—Damie menamaiaimo ucubena fecade. Damiemo quinientos diga ucubena fecade. Jiaimiemo cincuenta diga ucubena fecade.

⁴² Ie iade, naiena abido meidonidiaimaia. Ie jira ucubena fecadimiedi raite: “Dama omico meidoñega. Naiena jai feitatícue”. Ero, Simón, ¿nimieca ucubena fecadimiena eo isiruite?

⁴³ Simón dinena uai ote:

—Cue começi raite: Ailluena ucube feitaja jira, eo ailluena ucubena igamie.

Jesús dinena raite:

—Raise cue uaina fairiotio.

⁴⁴ Iemei Jesúdi riño dine dobaidajanona, Simómo llote:

—Biñaiñona ja lloiticue. O jofomo bitícue; ia cuena raise nafueñedio. O nabai o dine bia, naimiena raise nafuecabitio. Ie jearede eilli jocollena, comini finocabilla isoi, jinui fecadio. Safe-naillena eilli dora fecadio. Naimiena llibanotio. Ie abi caimare sorillena, janore soride ra naimiemo jonetio. Iese cuena nafueñedio; ia bie riño cuena

isiruillamona, ie uillinociai diga cue eillina jocode. Ie ifotie diga dote.

⁴⁵ Naiñaiño cue ecimo fo billanona, cue eillina diga icaiño llibanote.

⁴⁶ Naiñaiño cue eillimo soride rana totade.

⁴⁷ Naiñaiño eo jeacino ite; ia cuena naiñaiño eo isiruillamona, nana ie jeacina jai oni dotajana uiñoticaí. “Jeacino cuemo raise iñede” comecina bu facaia, Jusiñamui naimie jeacina oni dotajamona, naimie Jusiñamuina janore isiruite. Iemo o comecina faca.

⁴⁸ Naiñaiño lloste:

—O jeacino jai oni dotaca. Iena jai feitaticue.

⁴⁹ Jiaíno nainomo guillanona, coniniri ñaitimaci:

—Bimiedi ¿nie isoidimie? Bimie jeacino oni dotanide.

⁵⁰ Jesús dinena riño lloste:

—Cuena o inua jira, o jeacinomona jai jillodio. Mai uri o jaillano o i.

8

Dajerie riñoñiaí Jesúsna canua rafue

¹ Ie facaise diga nairaímo Jesúsdi mare rafuena llocana jaide. Naimie anamo comini illana Jusiñamui jitailla jira, Jesúsdi Jusiñamui díbeimo naimaci comeciaí iuaina meiduana llofue. Ie doce llofueoicaigano naimie diga jaidimaci.

² Dajerie riñoñiaí jiaí jaidimaci. Naiñaiñuaimona dajerie Jesús navui jananiaí anamona orecañaiñuai. Dajerie duicomona jilloitagañaiñuai. María Magdalena ite. Naiñaiñoñomona siete diga jananiaí oni oretate.

³ Juana ite. Naiñaiño inidi Chuza. Herodes railla illaïma ecimo naimie majiïuide. Susana ite. Jiaie riñoniai jiaï itimaci. Naiñaiñuaï ramona Jesúna canouidimaci.

Jesúdi trigona judaïdimiena llua rafue

(Mt 13.1-9; Mr 4.1-9)

⁴ Diga nairaïaimona ailluena comini Jesús dine billanona, naimacimo llote:

—Jusiñamui omoïna sedaacana omoï fueollena, bie rafuena lloiticue.

⁵ Damiedi trigona judaïaide. Naimie judaïamona naisomo janore iduaï juide. Comini nainomo jaillano, iena saitadimaci. Bai jailla mei, silliñiaï iena jiaï guisaibite. Ie jira sicoñede.

⁶ Nofiemo jiaïe iduaï juide. Sicode; iadedi jinui raise iñena jira, duide.

⁷ Eecuaï illanomo jiaïe iduaï juide. Eecuaï sicuamona, riera eecuaï ibaica. Ie jira llisiñede.

⁸ Mare eniruemo jiaïe iduaï juide. Sicode. Llisillamona danademo cien diga llisillana ote.

Bie rafuena naimie llua mei, naimacimo llote:

—Omoï jeforena jira, raise fueollena, cue lluamo cacarei. Iena ñno.

Jesús ie como lloga rafuena llofua rafue

(Mt 13.10-23; Mr 4.10-20)

⁹ Jesúmo ie llofueoicaigano ie como lloga rafuena jicanotimaci:

—¿Bue ñellena bie isoide rafuedo cominina llofuetio?

¹⁰ Uai ote:

—Jusiñamuidi omoïna ie sedaacana rafuena jai uiñotade. Jiaie iena uiñoñedomoi. Jiaïe cominina iena nia uiñotañede. Ie jira bie isoidicïnode

naimacimo lloticue. Cue siño finoca rafuena ciodimaci; iadedi iena naimaci inoñena jira, uiñoñoeno jaidimaci. Cue llofuiana jamai cacadimaci; iadedi naimaci inoñena jira, raise cacaiñedimaci. Uiñoñedimaci.

11 'Omoína cue como lloga rafuena llofueiticue. Naie iduai Jusiñamui uai.

12 Dajerie comini comeciai naisomo juide iduai isoidimaci. Jusiñamui uaina cacadimaci; ia naimaci naie uaina inoi raillano, naimaci naiemona jilloi raillanona, Taife naimaci comeciaino cacaja uaina inotañede.

13 Jiaie iduai noñemo juide. Dajerie comini comeciai naie noñie isoidimaci. Jusiñamui uai nano naimaci cacaia, iena caimare feiñotimaci. Noñemo riga iduai jainaonidedi raise sicoñede. Naie comini janore inua jira, ie isoidimaci. Dallu nano inotimaci. Jusiñamui uai muidona duere naimaci sefua, abido danomo uaidimaci.

14 Jiaie iduai eecuai illanomo juide. Naie iduai sicua mei, iena eecuai ibailla jira, raise llisiñede. Dajerie comini comeciai naie illano isoidimaci. Jusiñamui uaina cacadimaci. Inotimaci; iadedi naimaci comeciai jarire illamona, naimaci raruiaina ebiruillamona, naie uai naimaci comeciaino itabiñede. Jusiñamui jitaille rafuena finocana jaiñedimaci.

15 Jiaie iduai mare eniruemo juide. Dajerie comini comeciai naie enirue isoidimaci. Jusiñamui uaina cacajano, iena raise cacadimaci. Mare jeanide comeciainona inocana jaidimaci. Eo lliside isoidimaci. Jusiñamui jitailla rafuena sefuiruiñoeno inocana jaidimaci.

*Jesús ie rafue llocana jailla llua rafue
(Mr 4.21-25)*

¹⁶ Jesús nia llote:

—Lamparín bu unia meinoconi, jiaie ra biide anamo rainañega; iadedi jofo jeraimo lligaiñollena, nainomo bite comini raise cioillena, ie rairanomo rainaca.

¹⁷ Ie isoide. Cue rafue llocana jaia, comini comeciai iticinona uiñotade. Uanaicino naimaci cacajamona, damierie ñnotimaci. Damierie ñnoñedimaci.

¹⁸ Cue lluomo raise cacarei. Iena omoi ñnuamona, Jusiñamui omoína canoite. Omoína uiñocana jaitaite. “Jusiñamui rafuena uiñoticue” raitimiedi ñnoñenia, Jusiñamui naimiena faifitaite.

*Jesús dibeimo itinona ñaia rafue
(Mt 12.46-50; Mr 3.31-35)*

¹⁹ Cominina Jesús nia llofuia, naimie ñine Jesús ei, ie amatiai diga bitimaci; ia ailluena comini illa jira, naimiemo riñedimaci.

²⁰ Nainomo itino naimiemo llote:

—O ei, o amatiai diga jino naidaidimaci. O diga ñaiacadimaci.

²¹ Jesús uai ote:

—Jusiñamui uaina cacajamona, iena ñnotino ieca cue eidi, cue amatiaidi.

*Jesúdi jorai baguana llucaitaja rafue
(Mt 8.23-27; Mr 4.35-41)*

²² Jiairuido botemo Jesús jailla mei, ie llofueoicaiganomo llote:

—Ruica dibeimo mai cai jailli. —Ie mei jaidimaci.

23 Naimaci jaidemo, Jesús inide. Bai jaidimacimo, eo riire aifi bite. Baguamona botemo jinui a uaide. Oruiacana jira, eo jacinaitimaci.

24 Jesúna casitajano, naimiena raitimaci:

—Maestro, jai buisaidicai. Jai corobaisaidicai.

Naimie casillano, aifina lletade. Joraina llicaitade. Ieconí aifi llicaiide. Bagoñede.

25 Naimacimo jicanote:

—¿Bue ñellena cuena ñnoñedomoi? —Naimiena jacinaillamona uai oñedimaci. Raijicaillamona, coniniri ñaitimaci:

—Bimiedi, ¿nie isoidimie? Aifi naimie uaina ñnote. Jorai naimie uaina jiai ñnote.

Jesúdi Gadara railla eniruemo illa rafue

(Mt 8.28-34; Mr 5.1-20)

26 Ruica dibellemo ridemo, Gadara railla eniruemo sijidimaci. Galilea facaisemo ite.

27-29 Botemona ari Jesús jaidemo, damie Jesús dine bite. Naie nairai imie. Janaba anamo illamie. Taimiena jai jaicaisoide. Jofomo naimie irainide; ia comini raioillanomo nofie moto ifuaimo isoide. Ebena cominina naimie faei raillanona, lloeo diga ie onollidi maiga. Ie eilli jiai maiga; iadedi lloeo oni ticonote. Ie mei jofue iñenanomo Janaba naimiena jaitate. Iese suisoide.

Jesúna naimie ciuanona, cuirioide. Jesús ecimo uaide. Janaba naimiena ado llotatate:

—Jesús, nanoca Jusiñamui Jitodio. ¿Niese cuena nibaiacadio? Cuena duere finoñeno.

Iese raite, Janaba naie iimamona oni jai oretajana Jesús llua jira.

30 Jesús naimiemo jicanote:

—¿O mamaci bu?

Uai ote:

—Aillosiedicai. —Ailluena jananiai naimie ecimo illa jira, iese naimiedi raite.

³¹ Jesúmo duere jicanoside, iraimo naimacina nia oretañellena.

³² Naie facaise nainomo ite anedumo ailluena chanchuai itimaci. Chanchuai abimo naimaci jaillena Jesúmo duere jicanotimaci. Jesús dinena:

—Jee —raite.

³³ Ieconi iimamona jaidemo, chanchuai abimo jaidimaci. Iena suidemo, iconi jillacimo joraimo chanchuai aisidimaci. Dinomo corobaiside.

³⁴ Iena ciuanona, chanchuai sedaraini naimaci nairai dine aisicana jaidimaci. Naie rafuena llocana jaidimaci.

³⁵ Ie jira diga comini jaide, naie rafuena raise fidillena. Jesús dine naimaci ridemo, jaive Janaba anamo illamiena Jesús ecimo raillana ciodimaci. Naimie iniroina jai jitade. Naimie jai uairicoñede. Iena ciuanona, Jesúna jaciruitimaci.

³⁶ Naie rafuena ciodinodi como bitinomo naimie jilluana llotimaci.

³⁷ Naimiena naimaci jaciruillanona, naimacimona oni jaillena nana naie eniruemo ite nairaidi Jesúmo jicanotimaci. Ie jira botemo Jesús jaide, ruica dibeimo abido jaillena.

³⁸ Ieconi jaive Janaba anamo illamie Jusúmo jicanote, naimie diga jaillena; iadedi Jesús raite:

—Dama ite.

³⁹ Mai o jofomo o jai. Nainomo itinomo nana Jusifamui omo finoca rafuena lloño.

Ie mei jaide. Nana naimie nairaimo Jesús naimiemo finoca rafuena llocana jaide.

*Jesúdi mena duide riñona jillotaja rafue
(Mt 9.18-26; Mr 5.21-43)*

⁴⁰ Ruica díbeimo Jesús abido ria, naimie abido billemo naimaci ocurilla jira, ailluena comini naimiena feiñotimaci.

⁴¹ Jairona mameciredimiedi Jesús dine bite. Naimiedi judíuai rafue ofiraco sedaraima. Jesúmo duere jicanollena, ana bitadate. Naimie jofomo Jesús billena duere jicanote.

⁴² Dañaiñode ie jisa. Doce años naiñaiñodi ite. Niadedi fioidiacade. Ie jira Jesúmo jicanuaibite. Iena cacajano, naimie diga Jesús jaide. Ie llofueoicaigano jiai jaidimaci. Jesús jaillano, diga comini naimiemo ñaijisaide.

⁴³ Bai jaillanona, duidiñaiño Jesús jinafona jaide. Naiñaiño jeraimona doce años jaca diaide. Naiñaiñona jaca buna jillotanide.

⁴⁴ Jinafo dinena billanona, Jesús iniroi fueda jetade. Iemona diailladi faionocaide. Jillode.

⁴⁵ Jesús dinena jicanote:

—¿Bu cuena jetade?

Naimie ecimo ite comini uai otimaci:

—Ona jetañedicaí.

Ie nabaiñiai diga Pedro dinena raite:

—Maestro, ailluena comini o ecimo jaidimaci. Omo ñaijidimaci.

⁴⁶ Jesús uai ote:

—Damie cuena jetade. Cue abimona cue uai jaillanona, naimie jai jillode.

⁴⁷ Jaive duidiñaiñodi Jesús naiñaiñona uiñuana uiñote. Ie jira Jesús dine jaciruicana bite. Naimie uicomo ana bitadajanona, nana comini uicomo

naimiena jetaja rafuena llote. Naiñaiño ieconi jilluana llote.

⁴⁸ Jesús dinena naiñaiño na raite:

—Ñoo, cuena o ñnua jira, jai jillodio. Mai jailanona, uri o i.

⁴⁹ Naiñaiño diga Jesús nia ñaitemo, Jairo jofomona damie bite. Jairomo llote:

—O jisa jai fiodaite. Maestrona ñaidoño.

⁵⁰ Iena Jesús cacajano raite:

—O comeci jarire iño; ia cuena nia ñno. Naiñaiño jilloite.

⁵¹ Jairo jofomo naimaci rillano, ailluena comini naimie diga fo jaillana rairuide. Dani diese fo jaillana jitaide: Pedro, Jacobo, Juan, nai jitaibici moo, naiñaiño ei. Jaca diese fo illana jitaide.

⁵² Nana nainomo itino eecuinaidimaci. Failliñaidimaci. Jesús dinena raite:

—Omoi eeño. Cuemona naiñaiñodi fiodañedes. Jamai ñide.

⁵³ Jai fiodaitedi: “¿Bue ñelli ñide raitio?” railanona jaisitimaci.

⁵⁴ Jesús fo jailla mei, naiñaiño onollina llinocaida, raite:

—Jitaibici, mai naidacai.

⁵⁵ Ieconi naiñaiño joreño abido bite. Naidacaide. Jesús llote:

—Guillena naiñaiño eca.

⁵⁶ —Naiñaiño moo, ie ei diga, raijicaidiiamaiai. Jesús iaiaiaimo llote:

—Bie rafuena bummo lloño.

9

Jesúdi ie llofueoicaiganona oretaja rafue

(Mt 10.5-15; Mr 6.7-13)

¹ Ie doce llofueoicaiganona naimie dine Jesús uaiduanona, naimacimo ie uaina iñonocaide, jananiaina anamona cominina jilloitallena. Duicuaína oni oretallena, iena jiaí iñonocaide.

² Naimacimo llote:

—Omoi jaillanona, cominimo llono: “Jusiñamui facaina jaie lloraini micoriai llogamie jai bene ite. Naimie anamo omoi illana Jusiñamui jitailla jira, naimie díbeimo omoi comeciaí iuaina meido”. Duidinona jillota.

³ Omoi jaia, buena uiñeno. Omoi abina riidollena, jiguidana uiñeno. Ailluena rana omoi uiñellena, bolsana uiñeno. Llomeniconona uiñeno. Ucubena uiñeno. Guille ifo meidollena, rana uiñeno. Meidolle iniroina uiñeno.

⁴ Nie nairaimo omoi jaia, daacomo omoi ri. Naie nairaimo omoi ille dinori, daacomo omoi i.

⁵ Omoína comini feiñoñenia, naimaci nairaimona omoi jaia, omoi eilliaimo ite jearacuaina oni jaidino. Nicino naimacimo illana naimaci uiñollena, omoi eilliaína oni jaidino.

⁶ Jesús naimacimo llua mei, jaidimaci. Jusiñamui rafuena lluanona, diga nairaimo jaidimaci. Diga comini imaci duicomona jillotatimaci.

Juan Bautista micori fiodailla rafue

(Mt 14.1-12; Mr 6.14-29)

⁷ Naie facaise Herodes railla gobernador nana Jesús finoca rafuena fidide. “Fiodaillamona Juan Bautista micori jai jillode” dajerie railla jira, ie comeci uri iñede.

⁸ Jiaie comini raisoidimaci:

—Elías jai bairede.

Jiaino raisoidimaci:

—Fiodaillamona Jusiñamui facaina jaie lloraïma micori jai jillode.

⁹ Jesúna fidiano, Herodes comeci uri ñede. Comecina facade: “Juan micori ie ifogina navui jaitaticue. Ie muidona ¿birui bu ie rafuena fididicue?” Raise uñollena, Jesúna cioacade.

Jesús cinco mil iñiaina ecaja rafue

(Mt 14.13-21; Mr 6.30-44; Jn 6.1-14)

¹⁰ Jesús llofueoicaigano abido bia, Jesúmo naimaci finoca rafuena llotimaci. Ie mei dani ie llofueoicaigano diga Jesús Betsaida railla nairai dine jaide;

¹¹ iadedi comini iena fidianona, naimiena racadimaci. Naimie dine naimaci rilla mei, naimacina feiñuanona, naimie anamo comini illana Jusiñamui jitailla jira, Jesúsdi Jusiñamui dibeimo naimaci comeciai iuaina meiduana llofujete. Duidinona jiai jillotate.

¹² Jitoma ana itemo, ie doce llofueoicaigano naimie dine billanona, raitimaci:

—Jofue bene ñede. Bene jaca buedi ñede. Ianori ite nairaiamo, ianori ite jofuemo naimaci inillena, naimaci guille ollena, bie cominina abido oreta.

¹³ Jesús uai ote:

—Naimacina bene eca.

Uai onaisite:

—Dani caimo ite cinco llomenico mena lliciai diga. Nana naimaci guillena, ¿guille cai iballena nibai jitaidio?

14 Cinco mil iñiaí nainomo illa jira, ailluena guille jitaillana uiñotimaci. Naimaci ainiaí, imaci uruiaí diga, jiaí itimaci. Ie llofueoicaiganomo Jesús llote:

—Comini ana raillesa llono. Cincuenta digamierie ana imaci raillesa llono.

15 Iena finodimaci.

16 Naie cinco llomenicono, naie mena lliciaí diga Jesús uanona, monamo eruaillanona, Jusiñamui iobillacinona fecade. Iemei taillude. Ie llofueoicaiganomo fecade, cominina ecallena.

17 Nana guillanona monidimaci. Monillamona, fiebide guillena iraidimaci. Doce cirigaiaimo oruitatimaci.

Pedro Jesúsna llua rafue

(Mt 16.13-19; Mr 8.27-29)

18 Jiairuido Jesús ie Moomo jia facaiseconi, ie llofueoicaigano naimie diga illanona, naimacimo jicanote:

—¿Niese cominidi cuena raitimaci?

19 Uai otimaci:

—Damierie raitimaci: “Juan Bautista micoridio”. Damierie raitimaci: “Odi Elíadio”. Jiaino raitimaci: “Jusiñamui facaina jaie ite llorainimona damie jai jillode. Imiedio”.

20 Jesús naimacimo jicanote:

—¿Niese omoi cuena raitomoi?

Pedro uai ote:

—Odi cai Jilloitaraimadio. Jusiñamui facaina lloraini micoriai o billena jaie llotimaci. Jusiñamui ona orede.

Jesús ie fiodaillena llofuia rafue

(Mt 16.20-28; Mr 8.30-9.1)

²¹ Jesús naimaci como llogacino bumo lluana rairuide.

²² Llote:

—Cai judíuai illaicomini cuena eo duere finoitimaci. Cuena jitaiñellemona, cuena meineitimaci; iadedi darui amani illanona, fiodaillamona jilloiticue.

²³ Nana ie llofueoicaiganomo llote:

—Cue cominina bu jaiacania, ie jitaille rafuedo jaiñena. Cue dibeimo naimie jaillamona, duere sefuicana jaite. Nibai naiemona fiodaite. Bu iese jaiacania, cue dibeimo naimie iite.

²⁴ Duere sefuillana jaciruillamona cue cominina bu jaiacaiñenia, ja muidomo faifite; iadedi duere sefuillana jaciruiñenamona cue cominina bu jaia, jaca faifiñeite.

²⁵ Cue cominina bu jaiñenia, nibai eo duere sefuiñeite. Nibai aillena ra naimiemo iite; ia, ¿niese cue Moo dine riite? Nainomo naimie riñeno faifite.

²⁶ Cuena bu meirua, cue uaina bu meirua, dane cue bia, naimiena meiruiticue. Cuena meiruillamona: “Cristomo duidicue” bu lloiacaiñenia, ico cue bia: “Naimiedi cue comini” lloñeiticue. Jusiñamui jaienisaí siño uai isoi illanona, cue Moo dinena monamona ico biiticue. Cue Moo uai cuemo illanona, ebire biiticue.

²⁷ Uanaicinona omoimo lloticue. Omoimona dajerie nia fiodañeitomoimo, illaimana cue bairellena cioitomoí.

*Jesús abí meidocaila rafue
(Mt 17.1-8; Mr 9.2-8)*

²⁸ Ocho digarui illanona, Jusiñamuimo jïllena, anedumo Jesús jaide. Naimie diga jaillena, Pedrona uite. Juan jiaï uite. Jacobona jiaï uite. Jiaïe llofueoicaiganona uïñede.

²⁹ Naimie jïamona naimie abi meidocaide. Naimie ïnroi naie dacaiño eo userecaide.

³⁰ Ieconï menamie bairiano, Jesús diga ñaitiaïmaiaï. Moisés micori joreño ite. Elías jiaï ite.

³¹ Ebire bairediaïmaiaï. Jesús Jerusalémo fiodaille rafuena ñaitimaci.

³² Ie facaiseconï Pedro ie nabaiñaïaï diga jai inidimaci; ia casillamona, Jesús ebirenana cioidimaci. Jesús ecïmo itiaïmaiaïna jiaï cioidimaci.

³³ Iaimaiaï jaiacania, Pedro Jesúmo llote:

—Maestro, bene cai illana mare. Daje amani bisaini cai finollena, mare. Daje oïe, jiaïe Moisés micori ie, jiaïe Elías ie. —Iese raite; ia ie ñaïa rafuena raise uïñoño jamai ebena ñaïte.

³⁴ Iena naimie nia lluanona, uillie billamona, naimacina ibaide. Uillie ibaibillaconï jacinaitimaci.

³⁵ Uilliemona Jusiñamui naimacïmo llote:

—Bimiedi cue Jito. Naimiena fetodicue, cue jitaille rafue finollena. Naimie lluaña omoï cacareillanona, iena ïno —llote.

³⁶ Jusiñamui llua mei, dama Jesúna dane cioidimaci. Jesús diga itino naimaci cïua rafuena naie facaiseconï jaca bumo lloñedimaci.

*Jesúdi Janaba anamo itimiena jillotaja rafue
(Mt 17.14-21; Mr 9.14-29)*

³⁷ Ie areruido anedumona ana bitimacïmo, ail-luena comini naimacïmo dafafide.

³⁸ Cominimona damie ado llote:

—Maestro, cue dajede cue jito duillana jibuisaibi.

³⁹ Janaba naimie anamo illamona, cue jito cuir-itate. Cue jitona naillitacabite. Iemona ie fue mullecabide. Naimiena bofedaicabite. Naimiemona oni jaiacaiñede.

⁴⁰ Janabana oni oretallena, o llofueoicaiganomo jicanoticue; ia oretanidimaci.

⁴¹ Iena cacajanona, Jesús ie llofueoicaiganomo llote:

—Cue uai siñonana nia iñoñedomoi. Cue mare rafuedo nia raise jaiacaiñedomoi. Omoi diga are iticue. Raise omoi inollena, ¿nie dinori omoi diga iiticue? —Naie duidimie moomo llote—, O jito cue dine mai ati.

⁴² Naie urue billano, Janaba naimiena eniruemo ana dotade. Naimiena naillitate; ia oni jaillena Jesús Janabana lletade. Ieconi naie urue jillode. Iemei Jesús ie moomo naimiena fecade.

⁴³ Comini iena ciuanona, Jusiñamui siño uai naimiemo illari rajicaidimaci.

*Jesús ie fiodaillena dane llofuia rafue
(Mt 17.22-23; Mr 9.30-32)*

Naimaci nia rajicaia, Jesús ie llofueoicaiganomo llote:

⁴⁴ —Cue lluana feitaño. Monamona billanona, iimana jaidicue; ia Jusiñamui jitailla jira, jiairuido illaicomini cuena meineitimaci.

⁴⁵ Jesús lluana raise cacaiñedimaci. Naimie iena llofueña jira, iena raise uiñoñedimaci. Naimiemo iena jicanuana jiai meiruitimaci.

*Jesús ie llofueoicaigano moto imiena ille rafue
(Mt 18.1-5; Mr 9.33-37)*

46 Ie facaise Jesús llofueoicaigano conini uaitajanona raitimaci:

—¿Bu cai moto imiena ille?

47 Jesús naimaci comeciai facajacinona uiñuamona, nainomo ite cominimona daje urue bai jainanocaida, naimaci motomo naimiena jonete.

48 Raite:

—Comini dinena bie urue jamai bue isoide; ia bie isoidimie cuemo duillamona, naimiena feiñotimiedi cuena jai feiñote. Jusiñamui cuena oretaja jira, cuena feiñotimie Jusiñamuina jiai jai feiñote. Jamai bue isoidimiedi omoi moto imiena ille.

Jesúdi ie dibeimo itinona llua rafue

(Mr 9.38-40)

49 Naie facaise ie llofueoicaiganomona Jesúmo Juan llote:

—Maestro, o mamecido jananiaina oretacabitimiena ciodicai. Cai diga naimie jaicabiñena jira, iena finuana rairuidicai.

50 Jesús dinena uai ote:

—Naimiena rairuiñeno. Cai dibeimo itimiedi cai facaisena ite. Ie jira naimie isoidinona rairuiñeno.

Jesús dinena Jacobo, Juan iaimaiai lletaja rafue

51 Monamo abido Jesús jaillirui iaírei ia, Jerusalémo jaiacanamo naimie comecina facade.

52 Ie jira dajeriena uicodo oretate. Ie inillinona jenollena, Samaria railla nairaímo jaidimaci;

53 iadedi Jerusalémo naimaci jailla jira, judíuaiñedinona samaritanodi gaiñena jira, Jesús llofueoicaiganona feiñoiacaiñedimaci.

54 Iena fidianona, Jacobo, Juan diga, Jesúmo jicanotiaiaiaia:

—Nama, ¿bie comini jobaillena, monamona irai billena Jusiñamuimo coco jicanuana jitaideo?

55 Iaiaiaimo eruaillanona, Jesús dinena iaiaiaimo riire lletade:

—Dama ite. Iena jitañedicue.

56 Ie mei inillena jiaie illanomo jaidimaci.

*Jesús ie llofuegamiena damie jaillena ie rafue
(Mt 8.19-22)*

57 Naisona ie llofuecaigano diga, Jesús oni jaillanona, Jesúmo damie llote:

—O jaillinomo o diga jaiacadicue. O llofuegamiena jaiacadicue.

58 Jesús uai ote:

—Janorede ocainaiadi joforedimaci. Silliñiaia jillainiairedimaci; iadedi jofonidicue. Monamona billanona, imana jaidicue; iadedi buenidicue. Jofonidicue. Cue diga o jaiacania, bue isoidena cuemona oñeitio. Iemo o comecina raise faca.

59 Jiaimie Jesúmo llote:

—Cue llofuegamiena o jaillena, cue diga mai bi.

Naimie uai ote:

—O diga jaiticue; ia cue moo nia fiodañena jira, o diga nia jaiñeiticue.

60 Jesús naimie dane llote:

—Dama ite. Cue diga mai bi. Cuena inoñedinodi o moona canoredimaci. Naimie fiodaia, naimiena naimaci raille. Cue rafue jiaie rafue baifemo faite. Naimie anamo comini illana Jusiñamui jitailla jira, naimie dibeimo naimaci comeciaia iuaina meiduaana llocana cue diga mai o bi.

61 Jiaimie Jesúmo llote:

—O llofuegamiena jaiacaducue: iadedi cue jofomo nano jaiacaducue, cue cominina facadollena.

⁶² Jesús uai ote:

—Cue llogamiena jaiacania, jiaie ramo naimie comecina eo facañena. Jiaie ramo naimie comecina eo facaia, Jusiñamui facaina raise maijinide.

10

Je rafuena lollena, Jesús setenta digamiena ore-taja rafue

¹ Je llofueganona llofuia mei, naimacimona Jesús setenta digamiena fetode. Naga naimie jaiacana nairaiimo menamieriena oretate.

² Naimacimo llote:

—Diga comini ite, naimacina Jusiñamui rafuena ñnotallena; iadedi eo janore lloraini ite. Jusiñamuimo jicano, jiaie llorainina naimie oretallena.

³ Mai jai; iadedi abi rairuicana jai. Toica llaudaia; janallari illanomo illa isoi, omoina oredicue.

⁴ Ucubena uiñeno. Ailluena rana omoi uiñellena, bolsana uiñeno. Meidolle zapatona uiñeno. Naisomo bu omoimo dafaifia, are ñaiñeno.

⁵ Bu ie jofomo omoi ria, jofomo itinomo marena uaido.

⁶ Nainomo maremie ia, o uaina fairioite. Maremie iñenia, o uaina fairioñenia: “Jusiñamui ona canoite” naimiemo lloñeno.

⁷ Nie nairaiimo omoi ria, daacomo omoi ri. Omoi ecalle rana guiño. Cue facaina omoi maijia jira, comini omoina ecajia, cue facaina omoi maijia facaina omoi guiño. Naga jofomo guicana jaiñeno.

⁸ Nie nairai omoi ria, omoiina naimaci feiñoia, omoi ecalle rana uaitañoeno guiño.

⁹ Duidinona jillota. Nainomo itinomo llono: “Naimie anamo omoi illana Jusiñamui jitailla jira, naimie dibeimo omoi comeciai iuaina meido”.

¹⁰ Nie nairaimo omoi ria, omoiina naimaci feiñoñenia, ie naiso motomo jaillanona llono:

¹¹ “Omoi naisomo cai eillimo ite jearacuai jai jaidinotica, maraiñede rafue omoiimo illana omoi uiñollena. Jusiñamui omoiina sedaacade; ia iena jitañedomoi” llono.

¹² Sodoma nairai jaie eo maraiñede. Jusiñamui iena jaie fuidode; ia nana comini naimie uicomo ico ia, Jusiñamuidi omoiina feiñoñedinona Sodoma railla nairai baifemo duere finoite.

*Jesús ie ñnoñedinona llua rafue
(Mt 11.20-24)*

¹³ Ie fetocanomo Jesús nia llote:

—Corazín railla illanomo navui iticue. Betsaida railla illanomo navui jiai iticue. Naimaci dine diga siño rafuena finodicue; iadedi ñnoñedimaci. Ico duere sefuitimaci. Tiro railla nairaimo, Sidón railla nairaimo naie isoide siño rafuena finodicuena, naimaci comeciai eo isinotaillamona, naimaci comeciai iuai meidotimaci. Naimaci comeciai iuai meiduana jiaie comini uiñotallena, ebinide iniroina jitanonona, jusefo naimaci ifogiaimo jonetimaci.

¹⁴ Jusiñamui uicomo nana comini ico ia, Corazímo itino Tiro nairai baifemo duere sefuitimaci. Sidón nairai baifemo duere sefuitimaci.

¹⁵ Capernaumo itino jiai duere sefuitimaci. Birui abina iedoiacadimaci; iadedi jiairuido sure

iitimaci. Monamo cue Moo diga jaca iñeitimaci; iadedi naimie naimacina duere finollemona, sure iitimaci.

¹⁶ Omoi lluana naimaci cacaacania, cuena cacadimaci. Omoi lluana naimaci jitaiñenia, cuena jitaiñedimaci. Cuena jitaiñedinodi cuena oretagamiena jiai jitaiñedimaci. —Jesús naie fetocanomo iese llua mei, oni jaidimaci.

Je setenta fetocano abido billa rafue

¹⁷ Jiairuido Jesús ie setenta fetocano abido caimare bitimaci. Raitimaci:

—Nama, o facaido cominimona jananiaina oni oredicai.

¹⁸ Jesús naimacimo llote:

—Monamona Taife borilla isoi jaie ana dotajana cidicue. Iemona cue uai naimie uai baifemo faiana uiñoticue.

¹⁹ Jaiomona ramo omoi jiriñena uai omoimo jai itataticue. Acaiduaimona ramo omoi jiriñena uai omoimo jiai jai itataticue. Nana cue dibeimo iñedino omoi anamo jai itataticue. Omoina niese nibaiñeitimaci;

²⁰ iadedi omoi uaina jananiai inua jira, iobiñeno; iadedi Jusiñamui cominina omoi illamona, omoi mameciai monamo Jusiñamui rabenicomo jai cuiamo iobi.

Jesús ie Moo diga ñaia rafue

(Mt 11.25-27; 13.16-17)

²¹ Je facaiseconi ie Moo Joreño naimiemo illa jira, Jesús iobide. Raite:

—Ore Moo, oca mona Namadio. Oca enirue Namadio. Abina uiñotinona bie isoide rafuena uiñotañedio; iadedi jamai bue isoidinona iena

uiñotadio. O jitailla jira, iese uiñotadio. Ie jira iobillacinona omo feaacadicue. Mai.

²² Jesús dinena naimie ecimo ite cominimo dane llote:

—Cue Moomona nana cue rafuena oticue. Dama cue Moo cuena raise uiñote. Dama cue Moona raise uiñoticue. Cue jitailla diese omoina naimiena uiñotadicue. Ie muidona naimiena uiñotomoi.

²³ Ie llofueoicaigano diga eneno ia, naimacimo llote:

—Cue finoca rafuena omoi ciua jira, ni ua omoi marena illino jillaci.

²⁴ Jusiñamui facaina jaie lloraini micoriai omoi siñona ciua rafuena jaie cioacadimaci; iadedi cioñedimaci. Iena cacaacadimaci; ia cacaiñedimaci. Jusiñamuina jaie ñnotino micoriai iena cioacadimaci; iadedi cioñedimaci. Iena cacaacadimaci; iadedi cacaiñedimaci.

Jesús cai ecimo itimiena isiruillana llua rafue

²⁵ Jesús ecimo itinomona Moisés micori llogacinuaina llofueraimadi Jesúna facaciano, naimiemo jicanote:

—Maestro, Jusiñamui illanomo jaca cue illena, ¿bue finoiticue?

²⁶ Jesús uai ote:

—¿Niese Moisés micori llogacinuai iena raite?

²⁷ Uai ote:

—Moisés micori jaie cuega: “O jitailla jira, o comecina facajamona, cai Nama Jusiñamuina nana o começi jitaillamona naimiena eo isirui. O abina o isiruilla isoi, o ecimo itinona isirui”.

²⁸ Jesús dinena raite:

—Marena cue uai otio. Iena o finoia, Jusiñamui illanomo jaca iitio.

29 Naie llofueraima Jesúmo dane jicanote:

—¿Bu cue ecimo itino?

30 Jesús uai ote:

—Jiaie rafuedo iena omo lloiticue. Jerusalémona Jericómo damie jaide. Naimie jaillano fiiredino naimie dine bitimaci. Ie iniroina bairosite. Naimiena fatimaci. Niade ie meinianona ie ecimona jaisite.

31 Dallu illanona, Jusiñamui diga ñairaima naie naisona jaide. Fagamiena ciode; iadedi ecido jaide.

32 Dallu illanona, Jusiñamui jofomo maijiraima jiai jaide. Fagamiena ciuanona, ecido jiai jaide.

33 Ja muidomo Samaria nairai imie jaide. Naie nairaina enoidomoi. Fagamiena naimie ciuanona, naimiena duenaite. Iemona naimie canoacade.

34 Naimie dine jaillano, ie bofellañona mande. Jiai maitade. Ie burro emodomo jonecaida, naimiena uite. Inillinomo rilla mei, nainomo naimiena sedade.

35 Ie areruido ie inia jofu namamo janore ucubena fecade. Raite: “Naimiena seda. Naimie facaina jiaie rana o oia, abido cue bia, iena ibaiticue”. Ie mei oni jaide.

36 —Naie llofueraimamo Jesús dinena jicanote—
¿Fagamie ecimo itimiedi bu?

37 Uai ote:

—Fagamiena duenaitimie.

Jesús raite:

—Jai raise uiñotio. Mai jai. Ie isoi finocana o jai.

Jesúdi Marta iañuaí María jofomo illa rafue

³⁸ Nia macaritimacimo, comini illanomo Jesús ie llofueoicaigano diga ridimaci. Marta raillañaiño ie jofomo naimiena feiñote.

³⁹ Naiñaiño euiñodi María. Jesús ecimo llaribamo María ana raide, naimie llofuiacinona cacareillena;

⁴⁰ iadedi Martamo maijille eo illa jira, naiñaiño naimie llofuiacinona cacarefiñede. Ie jira Jesús mo llote:

—Nama, cue euiño cuena canoacaiñena jira, daño maijidicue. “O euiñona cano” naiñaiñomo llono.

⁴¹ Jesús uai ote:

—Ero, Marta, jarire itio. Diga o ramo comecina facadio; ia Jusiñamui rafuemo comecina faca.

⁴² María iemo comecina jai facade. Naiñaiño cue llofuiana nano cacaiacade. Ona canollena naiñaiñomo lloñeiticue.

11

Jusiñamuimo Jesús jia rafue (Mt 6.9-15; 7.7-11)

¹ Jiairuido ie Moo diga Jesús ñaia, ie llofueganomona damie naimiemo llote:

—Nama, jiana caina llofue, ie llofueoicaiganona Juan Bautista micori llofuia isoi.

² Jesús uai ote:

—Omoi jiaia, iese omoi jii:

Ore Moo, comini ori iobidesa.

O illaimana jira, nana cominina o anamo raire itata.

O jaienisai o jitaillacinona finua isoi, cominina o jitaillacinona finota.

³ Nagarui guille caimo itata.

⁴ Caina jeare jiaino finoia, iena caimona feilla isoi, cai jeacinona omona feilla jira, cai jeacinona oni dota.

Caina ramo bu faia, caina cano, iena cai inoñellena.

⁵ Iena naimacina nia llofuellena, Jesús jiaie rafuena llote:

—Naiona mona moto llomeniconajicallena, o nabai dine o jaia, ado lloitia: “Nabai, daje amani llomeniconajitaidicue.

⁶ Jiaie nabai cue jofomo como ride. Jaca cuemo buedi inede, naimiena cue ecallena”.

⁷ Ie jofojeraimona o nabai fairioite: “Cuena uaidoñeno. Cue nasedijai cue ibaicasa. Cue uruiaijai inidimaci. Jiai inidicue. Llomenicona omofecallena casiacaiñedicue”.

⁸ Jamuidomo casillano, omo iena fecaite. Ie nabaina o illa jira, fecañeite; iadedi o eojitaille jira, o jitaille rana fecaite.

⁹⁻¹⁰ Daje ra omoi faifia, iena jenodomo. Raise jenoia, iena baitomo. Damiena omoi jenoia, naimie illanomo jaidomo. Nainomo naimiena baillamona, omoia feiñoite. Ie isoide. Buena omoi jitaia, Jusinamuimo jica. Iena omoi jicaja jira, iena naimie cacajamona, omoimo iite.

¹¹ Ero, omoimona ie moomo llomeniconae jito jicaia, noficina fecañede. Lliciana jicaia, jaiona fecañede.

¹² Jigina jicaia, acaidona fecañede.

¹³ Jeacinona finocabidomo; iadedi omoi uruiaimo mare rana fecacabillana uiñotomo. Cai Moo Jusinamui jaca mareuidimie. Cai baifemo

naimie faite. Ie muidomo naimacina canollena, naimiemo jicadinomo ie Joreñona itataite.

*Comini Jesúna jeare ñaia rafue
(Mt 12.22-30; Mr 3.19-27)*

¹⁴ Jiairuido Janaba anamo illamiemona Jesús Janabana oni orede. Janabana nia oretañenia, Janaba anamo naimie illamona, naie ima ñainide. Janaba oni jailla mei, naimie ñaite. Ie jira comini rajjicaidimaci;

¹⁵ iadedi dajerie raitimaci:

—Beelzebú anamo bimie illamona, Beelzebú uaido jananiaina oni orede —raitimaci. Beelzebúdi Janaba comini.

¹⁶ Jiaino naimiena facaciacasite. Raitimaci:

—Siño uai omo ia, Jusiñamuina siño rafuena finota.

¹⁷ Naimaci comeciaina Jesús uñua jira, naimacimo llote:

—Daje isoi comeciaina lloillamo daje nairai facañenia, danomo majjinidimaci. Oni jaidimaci. Daje isoi comeciaina lloillamo daje jofomo itino facañenia, danomo jainaiainidimaci. Oni jaidimaci.

¹⁸ Ie isoide. Beelzebú uaido jananiaina, omoi llua isoi, cue oretaia, Janaba ie dibeimo itino diga jai nabairiñede. Iemona naimie comini danomo iñeitimaci.

¹⁹ Omoi comini jananiaina oni oretacabitimaci; iadedi naimaci finoca rafuena uaitañedomoi. Naimacimo jicano, bie isoide rafuena omoi raise uñollena. Iemei cue finoca rafuena uaitañeitomoi.

²⁰⁻²² Jiaie rafuedo iena lloiticue. Ero, ie rana raise riduamona, maíridimie ie rana raise enoite.

Ie jofomo ie ra illanona, iena raise sedaite. Jamai bue isoidimie ie rana finide; iadedi naimie bai femo mairidimie bia, naimiena emodofillamona, ie rana fiirede. Ie isoide. Janaba anamona cominina jillotacabiticue. Naimie afemo nano cue iñenia, cominina jillotanidicue. Naimie afemo cue illa jira, iena finoredicue. Jusiñamui uaido jananiaina cue oretaia, Jusiñamui rafuena cue lluna uiñotomoi.

²³ 'Cue dibeimo iñedimie cuena enoide. Cue dibeimo cominina itatañedimiedi naie cominina cuena ñnotañede.

*Janaba anamo illamie rafue
(Mt 12.43-45)*

²⁴ Jesús naimacimo nia llote:

—Birui bene ite marañede cominidi Janaba anamo illamie isoidimaci. Naimiemona Janaba oni jaia, jiaie illanona baillena, jofue iñenanomo jaide; iade baiñede. Baiñena jira, naimie comecina facade: “Navui cue anamo illamie ñine abido jaiticue”.

²⁵ Abido naimie bia, naie ñima começi namanidena naimie baite.

²⁶ Iemei oni jaillanona, jiaie siete jananiaina naimie ñiga atide, naimaci anamo naie ñima illena. Naie siete jananiai naimie bai femo marañedimaci. Iemona naie ñima eo fodo jaide. Ie isoide birui ite marañede comini. Cue rafue naimaci ñinoñenia, eo fodo jaitimaci.

Daje riño Jesús eina marena ñaia rafue

²⁷ Cominimo Jesús llotemo, comini motomona dañaiño Jesúmo llote:

—O ei caimare illesa. Naiñaiño mona comuidio. Naiñaiño monoi jirodio. Naiñaiño caimare illesa.

²⁸ Jesús uai ote:

—Marena llotio; ia Jusiñamui uaina naimaci cacajamona, iena ñnuamona, jiaino eo caimare iitimaci.

*Dajerie Jesús siño rafuena ñnuana jitaila rafue
(Mt 12.38-42; Mr 8.12)*

²⁹ Ie facaise diga comini Jesús dine biñoidimaci. Naimacimo llotie:

—Birui ite cominidomoi maraiñedomoi. Siño rafuena cue ñnuana cioacadomoi; iadedi iena omoi jamai cioillena, siño rafuena finoñeiticue. Ero, Jonás micori jaie ite rafuena uiñotomoi. Naiemo omoi comeciaina omoi faca.

³⁰ Naimiemo suide rafuemona Nínive railla nairaidi Jusiñamui naimiena oretajana jaie uiñotimaci. Ie isoide. Fiodaillamona cue jilluamona birui ite cominidi Jusiñamui cuena oretajana uiñotimaci.

³¹ Ero, Saba railla nairai ie illaiño micoridi Salomón micori dine jaie aarena jaide. Naimie micori uiñuacinona naiñaiño micori cacareillena, aarena jaide. Salomón micori baifemo birui uaidicue; iadedi cuena ñnoñedomoi. Omoi comeciai icinuaina birui omoi meidoñena jira, Jusiñamui uicomo nana comini ille facaiseconi naiñaiño micori omoina ico ñaite: “Naimiedi siño rafue ñnuana ciodomoi. ¿Bue ñellena naimiena ñnoñedomoi?” omoina ico ñaite.

³² Lliciai jeraimona naimie jillua mei, Nínive railla nairai dine Jonás micori jaide. Nainomo Jusiñamui rafuena llotie. Naie comini iena cacajano, naimaci comeciai icinuaina meidotimaci.

Cue rafuena omoi cacajamona, omoi comeciai icinuaina birui omoi meidoñena jira, Jusiñamui uicomo ico nana comini ille facaiseconi: “Cue cominidomo!” omoina raiñeiticue. Jonás micori bai femo birui uaidicue; iadedi cuena ñinoñedomoi.

Jesús comini illa rafue

(Mt 5.15; 6.22-23)

³³ Jesús llote:

—Lamparín bu unia mei, jofu anamo bainino rainañega. Cirigai anamo rainañega. Ie rairanomo rainaca, comini nainomo bia, jofu jerai lligaiñollena.

³⁴ Omoi uisi diga rana ciidomo. Omoi uisi marañenia, rana raise cioñedomoi. Ie isoide. Omoi comeci marañenia, marañedicinona finocana jaidomo. Jusiñamuina uiñoñedomoi. Ie rafuena jiai uiñoñedomoi.

³⁵ Ie jira omoi comeciaina raise fino, cue rafuena omoi raise ñnollena.

³⁶ Nana omoi comeciai marena ia, cue rafuena ñnocana jaitomo. Iena raise uiñoitomo. Jofomo lamparín raise lligaiñua isoi, cue rafuena raise uiñoitomo.

Jesúdi judíuai illa cominina ñaia rafue

(Mt 23.1-36; Mr 12.38-40; Lc 20.45-47)

³⁷ Cominina Jesús llofuia mei, daje fariseo imie naimie dine bite. Raite:

—Cue diga cue jofomo mai guisaibi. —Jesús fairiua mei, naimie diga guisaide.

³⁸ Naimie nia guiñenia, naimaci einamaci llogacínodo naimie jaiñenamona, Jesús ie onollina jocoñede. Ie jira naie fariseo imie raijicaide. Ie

comecina facade: “Naimie eo mare llofueraima. ¿Niese cai einamací llogacínodo jaiñede?”

³⁹ Jesús naimiemo llote:

—Da platos jinafo, da pocillos jinafo jocodino isidomoi. Da platos jerai, da pocillos jerai jocoñedino isidomoi. Omoi abina finodomoí; iadedi omoi comeциаina finoñedomoi. Rana eo nicidotomoi. Omoi comeциаí jearede.

⁴⁰ Abi uiñoñedomoi. Jusiñamui omoi abiaina omoi comeциаí diga finode. Omoi finoca rafuena uiñote. Omoi comeциаina facajacínona jiaí uiñote.

⁴¹ Omoi comeциаí marena ia, jiaie cominina canodomoi. Iemona Jusiñamuimona omoi abi jiaí mare.

⁴² Fariseuai, omoi mo rafuena lloiticue. Nana omoi illimo ite ramona Jusiñamuimo janore jisa feca-fecacabidomoi; iadedi jiaie cominimo mare rafuena raise finoñedomoi. Jusiñamuina jiaí raise isiruiñedomoi. Nana naie isoide rafuena omoi jiaí finua.

⁴³ Comini omoi ri acarillena, ofiracomo uicomo raíacadomoi. Níne omoi macaria: “Jamai bue isoíñedicaí” omoi comeциаina facajamona, jiaie comini omoi na uaiduana gaídomoi. Iese omoi jailla jira, Jusiñamui omoi na duere finoite.

⁴⁴ “Bainino ite raírafo emodomo comini uiñoñeno macarillamona, naimaci abi jai jearede” raitomoi. Bainino ite raírafo isidomoi. Omoi diga jiaie cominidi omoi mo ite jeacínona uiñoñeno nabairillamona, jeacínona jiaí finodimaci. Iese omoi finocana jaia, Jusiñamui omoi na duere finoite.

⁴⁵ Naie facaise Moisés llogacínuaína llofuerainimona damie Jesúmo llote:

—Iese o lloia: “Jecino finodomoï” caina jiai llotio.

⁴⁶ Jesús uai ote:

—Jusiñamuimona jiai duere sefuitomoï. Omoï einamacï llogacïnuaido raise naimacï jaillena, diga rafue cominï finuana jitaidomoï; iadedï iedo naimacï raise jaillena, naimacina jaca canoñedomoï. “Jusiñamuina eo raise sedadicaï” comecina facadomoï.

⁴⁷ Omoï jaiagaidï Jusiñamui facaina llorainina meinetimacï. Naie llorainï micoriaï raiafuaï birui marena finodomoï;

⁴⁸ iadedï naimacï micoriaï llogacïnuaido omoï birui jiai jaiñena jira, omoï jaiagai finoca radi: “Mare” raitomoï. Jusiñamui rafuedo birui omoï raise jaiñena jira, omoï jaiagai isoi itomoï. Iese omoï jailla jira, Jusiñamui omoïna duere finoite.

⁴⁹ Omoïna Jusiñamui abi uiñuamona jai llote: “Cue rafuena llolena, naimacï ðine cue facaina llorainina oretaiticue. Cue rafuena eo uiñotinona jiai oretaiticue. Dajeriena meinetimacï. Jiaïnona duere finoitimacï”.

⁵⁰ Enirue finua facaisemona ailluena Jusiñamui facaina llorainina meinetimacï. Omoïmona Jusiñamui ïba oite.

⁵¹ Abel micori jaie ite. Ie ama naimïena meinete. Naimïe facaisemona omoï jaiagaidï diga llorainina meinetimacï. Zacarïana jiai meinetimacï. Jusiñamui jofomo Jusiñamuimo toica ocaina jobaisoillano motomo naimïena meinetimacï. Omoïmona Jusiñamui birui ïba oite.

⁵² Omoï llofuiamona cominï Jusiñamui rafuena uiñoñedimacï. Jusiñamui rafuena raise uiñoñedomoï. Jiaïno ïena raise uiñuana

jitañedomoi. Iese omoi jailla jira, Jusiñamui omoïna duere finoite.

⁵³ Fariseo jofomona Jesús jailla mei, fariseuai comini icirillamona, Jesúmo diga rafuena jicanotimaci, naimie uaina uaitallena. Moisés micori llogacino llofueraïni daje isoi uai uaitatimaci.

⁵⁴ Naimie raise uai oñedena, naimiena duere finoacadimaci.

12

Jesúdi mareuidinona abi caitadinona llofuia rafue

¹ Ie facaiseconi eo ailluena comini Jesús dine ofidimaci. Ailluena illa jira, conini eilliaïmo naidadatimaci. Ie llofueoicaiganomo Jesús llote:

—Fariseuai siritate ramona abina rairui. Biena ñaiticue. “Maredicai” raitimaci; iadedi mareuidinona abi caitadimaci. Naimacimona abina rairui.

² Naimaci birui finoca rafuena birui bainino finodimaci; ia Jusiñamui naimaci comeciai iticinona ico uiñotaite.

³ Ero, cue rafuena birui anado llocana jaidomoi; ia ico marefodo iena llocana jaitomoi.

Jesúdi jaciruiñeno llofuia rafue

(Mt 10.28-31)

⁴ Ie llofueganomo Jesús llote:

—Cue nabaiñiaïdomoi. Omoïna meineiacadinona jaciruiñeno. Omoi abina meineredimaci; ie iadedi omoi joreña meineidimaci. Omoïna naimaci meinia, omoi joreño Jusiñamui dine jaite. Iena uiñuamona, omoi meineiacadinona jaciruiñeno.

⁵ Cue rafuedo omoï raise jaiñenia, Jusiñamuina jacirui. Omoï fiodailla mei, omoï abina omoï joreño diga iraimo ie dotalle uai naimiemo ite. Ie jira naimiena jacirui.

⁶ Ero, dabecuiro janorede sillina fecadomoïna, eo janore ibaca. Silliñiaï eo janore raifide; iadedi Jusiñamui naimaci illana uiñote.

⁷ Ero, niga ifotirai omoïmo illana Jusiñamui jiaï uiñote. Naimiedi omoïna sedajana jiaï uiñote. Sil-liñiaï bai femo Jusiñamui isiruigaomoï. Omoï duere finoacadinona jaciruiñeno. Jusiñamui jitaiñenia, omoïmo jaca buena suiñeite.

*Jesús naimiena janoñenana llofua rafue
(Mt 10.32-33; 12.32; 10.19-20)*

⁸ Ie llofueoicaiganomo Jesús nia llote:

—Cue rafuena omoï lluamona, jiaïno omoïna duere finoitimaci. Cuen a birui omoï janoñenia, nana comini Jusiñamui jaienisaï uicomo ico ia, nainomo omoïna janoñeiticue. “Cue cominidomoï” omoïna raiticue.

⁹ Cuen a birui omoï janoïa, nana comini Jusiñamui jaienisaï uicomo ico ia, nainomo omoïna janoïticue. “Cue cominiñedomoï” omoïna raiticue.

¹⁰ Jusiñamuidi naga cuena jeare ñaitimie jeacinona feitarede; iadedi Jusiñamuidi ie Joreñoa jeare ñaitimie jeacinona feitañeite.

¹¹ Cue rafuena omoï llua muidona, duere sefuit-omoï. Illaïcomini dine omoïna llogidollena comini uia, omoï abi riidollicinomo omoï comeciaina jarire facañeno.

¹² Naie facaiseconi Jusiñamui Joreño omoï abi riidollicinona uiñotaite.

Jesúdi raruia: eo uamona abi rairuillana llofuia rafue

¹³ Nainomo ite cominimona damie Jesúmo llote:

—Maestro, cue moo jai fiodailla mei, cue ama doforamie cue facaina ite rana cuemo iacaiñede. Naimiemo llono, cuemo illena.

¹⁴ Jesús uai ote:

—Juezñedicue. Bie isoide rafue cuemo duiñede.

¹⁵ Ie ecimo itinomo llote:

—Ero, rana nicidoñeno. Ailluena ra omoimo illamona, Jusiñamui illanomo riñeitomoi.

¹⁶ Iena omoi raise uiñollena, jiaie rafuedo iena lloiticue. Ucuberedimiedi ie illimona ailluena rana ote.

¹⁷ Ie jira comecina facade: “Cue illimona ailluena rana oticue; iadedi ¿ninomo iena eenoiticue?”

¹⁸ Birui cuemo ite eenoracona judaíticue. Ie mei aillue eenoracona finoíticue. Nainomo cue rana eenoíticue”.

¹⁹ Ie comecina facaite: “Cuemo ailluena ra jai ite. Diga años nia iíticue. Jamai iíticue. Marena guiticue. Caimare iíticue”.

²⁰ Iese comecina facade; iadedi Jusiñamui naimiemo llote: “Abi uiñoñedio. Cue llua jira, ja naiona fiodaitio. Ie mei omo ite ra omo fiebiñeite”.

²¹ Dama ramo ie comecina bu facaia, Jusiñamui jitaillacinomo ie comecina bu facañenia, faifite.

*Jesúdi Jusiñamui cai sedajana llua rafue
(Mt 6.25-34)*

²² Ie llofueoicaiganomo Jesús llote:

—Jusiñamui jitaillacinomo omoi comecina facaia, omoi illamo omoi comecina jarire facañeitomoi. Bue omoi guillemo jarire comecina

facañeno. Omoi jitalle iniroimo jarire começina facañeno.

²³ Jusiñamui omoina itataja muidona, guille omoimo iite. Naimie omoi abi finua muidona, iniroidi omoimo iite.

²⁴ Silliñiaimo começina faca. Buena riñedimaci. Nie isoide guillena eenoñedimaci; iadedi omoi Moo Jusiñamui naimaçina sedajamona, naimaci guille ite. Naimaci baiçfemo omoi faia jira, naimie omoina canoite.

²⁵ Omoimona, çbu ie começi jarire facajamona a sairite? Iese jaca buna a sairinède. Dama Jusiñamui omoina a sairitarede.

²⁶ Omoi começiaina facajamona omoi a sairinena jira, jiaie ramo omoi começiaina jarire finoñeno.

²⁷ Safiamo omoi começiaina faca. ¿Niese sicodimaci? Maijiñedimaci. Iniroina tiferiñedimaci; iadedi Salomón micori naimaci isoi jaie inède. Naimie illaimana jira, naimie micori iniroi eo ebirede; iadedi safia naimie iniroi baiçfemo ebire eruaide.

²⁸ Jusiñamui safiana ebiretacabide. Dallu facaise illanona, safiadi duide. Safia baiçfemo omoi uaila jira, Jusiñamuidi iniroina omoimo jaca iite. Safiana naimiedi ebiretaja muidona, omoimo iniroidi jaca iite. Omoi ra omoimo illena, naimiena ino. Jusiñamuina eo janore inotomoi.

²⁹ Omoi começiaina jarire icana jaiñeno. “¿Buena guticai?” raiñeno. Iemo começiaina eo facañeno.

³⁰ Jusiñamuina inoñedino iemo começina facacabidimaci. Nana omoi jitaillacinona omoi Moo Jusiñamuidi uiñua jira, naimaci isoi ineno.

³¹ Jusiñamui jitaillacinona finocana omoi jai.

Naimiemo omoi comeci facaia, omoi illamo omoi comecina jarire facañeitomoi. Iemona guille omoimo Jusiñamui iite. Iniroi omoimo jiai iite.

Jesúdi Jusiñamuimo comecina facaja rafue
(Mt 6.19-21)

³² Jesús llote:

—Cue cominina omoi illanona, uri omoi i. Omoi Moo Jusiñamui jitailla jira, naimie anamo omoina itatajamonona, omoina sedaite.

³³ Omoi raruiaina fecajanona, ucubena dueredinomo feca. Sabiñeite bolsana ono, omoi ra faifi raillano. Monamo omoi ra illa isoi ñaiticue. Monamo omoi ra illa isoi, iena faifiñeitomoi. Firiraima nainomo jaiñede. Gireco nainomo jiai iñede.

³⁴ Aillue ra omoimo ia, Jusiñamuimo comeciaina facañedomoi; iadedi naimie jitaillacinona omoi finoa, naimiemo comeciaina facadomoi.

Jesús ie abido billemo ocurillana llofua rafue

³⁵⁻³⁸ Jesús nia llofuate:

—Monamonona ico cue abido billemo ocuriri. Iena omoi raise cacaillena, bie rafuedo iena lloiticue. Damie ie nabai ie ai ua rafue dine naiona jaide. Ie mullaiai naimie abido billemo ocurillana ocuide. Naimie billemo naimaci raise ocuriria, iniroina jtajanona, lamparíniai unianona, ocuritimaci. Iese naimaci ia, nasena naimie tuia, iena raire econoitimaci. Nie hora naimie abido bia, naimiena naimaci iniñeno ocuriria, ieri naimie iobite. Iobillamonona, mullaimana naimie itena, mesamo naimacina ecaite. Naimie bille hora naimaci uiñoñena jira, jaca ocuricana naimaci illa.

³⁹ Ero, fñiriraima bille facaiseconi jofu namadi uñnotena, nia caadote, ie ra faifi raillanona.

⁴⁰ Monamona ico abido biitucue. Omoi ocuiriñena facaisemo biitucue. Ie jira cue billemo raise ocuiri.

Jesúdi patrón ie mullaïmana ie jofona sedataja llua rafue

(Mt 24.45-51)

⁴¹ Ie como lloga rafuena cacajano, Jesúmo Pedro jicanote:

—¿Bumo bie rafuena llotio? ¿Caimo llotio? ¿Nana cominimo?

⁴² Uai ote:

—Bie isoide cominimo llotucue. Ie mullaïaimona patrón damiena fetode, ie jiaie mullaïaina sedalena. Naimacina sedajanona, naimie naimacina jiaie ecade.

⁴³ Ie mei patrón oni jaide. Jofomo abido naimie bia, ie nanoca mullaïma raise maijiana fidiia, naimiena raise ibaite.

⁴⁴ Iobillamona, nana ie raruiaina sedataite;

⁴⁵ iadedi naie mullaïma maraiñenia, comecina facaite: “Cue patrón are biñeite. Jiaie rafuena finoitucue”. Ie comecina iese facaja jira, naimie anamo ite mullaïaina faite. Ie jitailla rafue finuamona, jifairuidino diga jirocabite. Naimacina nabaillamona, naimaci diga guite. Naimaci isoi jearede rafuena finoite.

⁴⁶ Ie ocuiriñena facaise ie patrón abido bilanona, naimiena meinetaite. Ie uaina ñnoñedino isoi, duere finoite.

⁴⁷ Naie mullaïma ie patrón jitailla rafuena finuana uñnote; iadedi iena finoñede. Ie jira eo duere sefuite;

48 iadedi maraiñede rafuena raise uiñoñoeno jiaie mullaïma finoia, janore duere sefuite. Ie isoide. Jusiñamui rafuena raise uiñotino iedo raise jaiñenia. Jusiñamui naimacina eo duere finoite. Iena janore uiñotino iedo raise jaiñenia, Jusiñamui naimacina janore duere finoite. Iese omoïmo suiñellena, mare mullaïma isoi, Jusiñamui jitailacino finocana omoï jai.

*Jesús muidona nana comini uri iñena rafue
(Mt 10.34-36)*

49 Jesús llote:

—Cuen a naimaci ñnollena, eniruemo comini dine biticue. Cuen a dajerie ñnuamona, cue cominina jaitimaci. Cuen a jiaïno ñnoñenamona, cue cominina jaiñeitimaci. Iemona cominina duere finoiticue. Cue maijia raïre fuiduana jitaïdicue.

50 Cue nia eo duere sefuiticue. Iena raïre suil-lena jitaïdicue.

51 Nana cominina uri itatallena eniruemo biñedicue. Cuen a ñnoñedinodi cuena ñnotinona enoitimaci. Enoïllamona, cuena ñnotinona duere finoitimaci.

52 Cue billamona, daje jofomo itino diese danomo iñeitimaci. Dabecuiro comini nainomonia, menamie cue ñibeïmo iite. Daje amani cue ñibeïmo iñeite. Iese iñenia, daje amani cue ñibeïmo iite. Mena cue ñibeïmo iñeite.

53 Cue lloga rafuena damierie ñnua muidona, ie moo illa ñibeïmo ie jito iñeite. Ie jito ñibeïmo ie moo iñeite. Ie ei illa ñibeïmo naiñaiño jisa iñeite. Ie jisa ñibeïmo ie ei iñeite. Ie jifaiño illa ñibeïmo ie miodi iñeite. Ie mio ñibeïmo ie jifaiño iñeite. Iese cominina uri itatañedicue.

*Jesúdi monamo ite rana llofuia rafue
(Mt 5.25-26; 16.1-4; Mr 8.11-13)*

⁵⁴ Cominimo Jesús dane llote:

—Bie eniruemo afai dine uilliena omoi cioia, raicabitomoi: “Noci deiacade”. Iese omoi ciua meinomo, ua noci deide.

⁵⁵ Bie eniruemo beici dinena aifi bia: “Eo ecasite” raicabitomoi. Iese aifi bia, ua eo ecasite.

⁵⁶ Abina uiñotinona abi caitadinodomoi. Monamo eruaillamona, rafue suillana uiñotomoi; iadedi omoi ecimo suiacalle rafuena raise uiñoñedomoi. Cue lloga rafuena raise cacaiñedomoi.

⁵⁷ Iemo omoi comeciaina raise facañedomoi.

⁵⁸ Ero, omoina bu llogidoia, juez dine nia omoi riñenia, omoina llogidotimie diga naie rafuena raise fino. Iena raise finoñenia, juez dine omoi ria, nainomo duere sefuitomoi. Calabozomo omoina jonetaite.

⁵⁹ Nana raise ibañenia, juez llua isoi, jino jaiñeitomoi. Ie isoide. Cue rafue omoi cacajamona, naimiemonu duere sefuiñellena, Jusiñamui diga omoi rafuena raise fino.

13

Jesúdi comeciái iuai meiduana dana llua rafue

¹ Cominina Jesús nia llofuetemo, jiaie comini Jesús dine billanona, raitimaci:

—Jerusalémo Jusiñamui jofomo dajerie Galileamona navui bitimaci. Ocainaiaina fatimaci, Jusiñamuina naimaci sedallena. Ie facaiseconi Pilato railla gobernordí soldaduaina orede, naie cominina fallena.

² Jesús uai ote:

—¿Niese comeciaina facadomoi? “Bie comini iese duere sefuilla jira, jiaie Galilea comini baifemo jeacinona finodimaci” comeciaina facadomoi.

³ Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidi jiai faifitomoi.

⁴ Siloé railla tidacana navui ana goillamo, dieciocho digamie saitabidimaci. Iena fididomoi. ¿Niese naimacimo omoi comeciaina facadomoi? “Nana Jerusalémo ite comini baifemo jeacinona finodimaci” comeciaina facadomoi.

⁵ Iese omoi comeciaina facañeno; ia omoi comeciai iuai meiduamo comeciaina faca. Omoi comeciai iuai omoi meidoñenia, omoidi jiai faifitomoi.

Jesúdi ie Moo comini comeciai iuai meiduamo fecuise ocurilla llua rafue

⁶ Iena comini raise uiñollena, Jesús bie rafuena llote:

—Damie ie illimo higuera railla riarana rite. Sicua mei, riarana ollena jibuisaide; iadedi nia lliñede.

⁷ Ie jira ie illina sedaraimamo llote: “Ero, daje amani años bisoidicue, riarana ollena. Nia lliñede. Iena mai tie. Naie illanomo jiaie riarana coco rillesa”.

⁸ Ie illina sedaraima uai ote: “Dama ite. Daje año nia seda. Riara abina caigiticue. Enruena caimaretaiticue.

⁹ Jiaie año lliasia, mare. Lliñenia, iena taiticoco”. Ie isoide. Jusiñamui omoi comeciai iuai meiduamo are ocurite; ia meidoñenia, omoina duere finoite.

Jesúdi jicaidiñaiñona jillotaja rafue

¹⁰ Jiairuido sábadoruimo judíuai ofiracomo Jesús llofue.

¹¹ Nainomo duidiñaiñodi ite. Janaba anamo naiñaiño illa jira, naiñaiño jicaide. Atona naidainide.

¹² Naiñaiñona Jesús cianona, naiñaiñomo llote:

—Ñoo, o duicomona jai jillodio.

¹³ —Ie mei naiñaiñona jetade. Ieconí naiñaiño atona naidadate. Ie jira Jusiñamuimo iobillacinona fecade.

¹⁴ Naie ofiraco sedaraima icirite, sábadoruimo Jesús naiñaiñona jillotaja jira. Nainomo itinomo llote:

—Seis digarui ite maijillena. Nairuido omoi bi, omoi duicomona omoi jilloillena. Sábadoruimo biñeno. Sábadoruimo maijiñedicaí.

¹⁵ Jesús uai ote:

—Maijiñedinona abi caitadinomoi. Sábado iruimo maijicabidomoi. Sábado iruimo omoi toiniaina imaci illanomona suiñodomoi, jinui illanomo naimaci jiruaillena. Naie isoide maijia omoimona mare.

¹⁶ Ie isoide. Bie riñodi Abraham micori comini. Omoi nairai iñaiño. Dieciocho años Janaba anamo jai illamona, duere sefuide. Naiñaiñona canollena, sábadó iruimo naiñaiñona Taife anamona cue jillotaia, cuemona mare.

¹⁷ Iena Jesús lluamona, nana naimie dibeimo iñedinodi meidaitimaci; iadedi jiaie comini iobidimaci, diga mare rafue naimie finua jira.

Jesúdi mostaza ido llua rafue
(Mt 13.31-32; Mr 4.30-32)

18 Jesús jiaie rafuena lloite:

—Jusiñamui ðibeimo comini jailla rafuena nia lloite. Jusiñamui rafuena janore comini birui cacajamona, ailluena comini naimie cominina ico jaitimaci.

19 Jiaie rafuedo iena omoimo lloite. Mostaza railla ido eo janorede. Ie illimo damie iena ril-lamona, eo aillue riaradi sicode. Ailluena jira, nainomo sillini jicaiciana finodimaci.

Jesús siritate rana llofua rafue
(Mt 13.33)

20 Jesús jiaie rafuena lloite:

—Jusiñamui ðibeimo comini jailla rafuena lloite. Jiaie uaido iena omoimo lloite.

21 Daje cirigai raifi coremo siritate ra faianona, namo tameia siritate. Ie isoide. Ailluena comini iena cacailena, Jusiñamui rafue llocana jaite.

Jesúdi Jusiñamui ðine rille llua rafue
(Mt 7.13-14, 21-23)

22 Jesús ðiga nairaimo llofuecana jaide. Jerusalén ðine jaide.

23 Jesús oni jaillanona, damie naimiemo jicanote:

—Nama, ¿niga comini o uaina inoitimaci? — Jesús uai ote:

24 —Monamo cue Moo ðine jaille nasedi janorede isoide. Naie nasedo lliicana o jai. Ailluena comini naiedo jaiacanitimaci; iadedi fo jainitimaci.

25 Naie jofo nama nase ibaila mei, ¿niese fo jaitomoi? Jino naidaillamona, nasena tutajanona,

raitomoi: “Nama, o nase econo”. Naimie uai oite: “Omoina uiñoñedicue”.

²⁶ Dane lloitomoi: “O diga navui guiticaí. Cai illanomo llofuetio”;

²⁷ iadedi naimie uai oite: “Omoina uiñoñedicue. Cue cominiñedomoi. Jeacino omoi comecimo nia illa jira, mai jai”.

²⁸ Jusiñamui illanomo Abraham micorina, Isaac micorina, Jacob micorina, nana Jusiñamui facaina lloraini micoriaina cioitomoi; ia omoi jino illanona, duere sefuillanona, eitomoi.

²⁹ Diga comini Jusiñamui illanomo iitimaci. Ailluena judíuaiñedino naga nairaiaimona Jusiñamui illanomo biitimaci. Nainomo coninina camare nabaitimaci.

³⁰ Naga nairaiaimona Jusiñamui cominina jillotarede. Cue rafuena cacadomoi; ia cue cominina omoi jaiacania, abi iedoñeno cuena ñnocana omoi jailla.

Jesús Jerusalémo itinomo llua rafue

(Mt 23.37-39)

³¹ Ie facaiseconi dajerie fariseuai comini Jesús dine billano raitimaci:

—Benomona mai o jai. Cai illaíma Herodes ona meineiacadé.

³² Jesús uai ote:

—Herodedi eo jifueraima. Naimie dine jai. Naimiemo llono: “Janaba anamo ite cominimona Janabana oni orecahidicue. Duidinona jillotacabiticue. Birui siño rafuena finocahidicue. Ico iese nia finoiticue. Iese cue maijille fuite.

³³ Nia oni jaiticue. Ailluena Jusiñamui facaina lloraini micoriai nainomo jai fiodailla isoi, Jerusalémo cue rafue jiai raire fuite” llono.

³⁴ Jerusalémo itinomo comecina facajano, Jesús llote:

—Jerusalémo itino, omoimo rafuena lloiacadicue. Jusiñamui facaina llorainina jaie meinetomoi. Naimie omoi dine oretaganona noficina fairinuano, naimacina meinetomoi. Omoina cue sedallena, atava ie uruias sedaja isoi, diga icaiño cue anamo omoina uaidoiacadicue; iadedi omoi dinena cuena jitaiñedomoi.

³⁵ Iemona Jusiñamuidi omoi illanona jai fainonocaide. Cue Moo dine jaiticue. Cue jailla mei, cuena cioiñeitomoi. Ico cue abido bia, comini cuena lloitimaci: “Jusiñamui oretagamie eo mare. Naimiedi cai Nama” lloitimaci.

14

Jesúdi abina siridimiena jillotaja rafue

¹ Jiairuido sábadoruimo Jesúdi fariseo imie jofomo guisaide. Naie fariseo imiedi illacomini. Nainomo itino Jesúmo eo eruaidimaci.

² Guille facaise naie jofomo duidimie bite. Naimie abina siridimie.

³ Nainomo itinomona damieriedi fariseuai comini. Moisés micori llogacinuaina llofueraini jiaititimaci. Naimacimo Jesús jicanote:

—Sábadoruimo comena cue jillotaia, ¿omoimona jeacino finodicue? ¿Niese Moisés micori llogacinuai iena llote?

⁴ Uaina oñedimaci. Ie jira Jesús duidimie onollina llinuamona, naimiena jillotate. Ie mei naimiena jino orede.

⁵ Nainomo itinomo llote:

—Sábadoruimo maijicabidomoi. Sábadoruimo omoi jurareta pozomo uaidena, iena jillotallena, nairuimo iena ari otomoi. Omoimona naie isoide maijia mare. Bimiēna cue jillotaja jira, ¿niēse cuena jeare ñaitomoi?

⁶ Iena cacajanona, uainicaidimaci.

Jesúdi guillena uaidoganona llua rafue

⁷ Jesúdi naimaci guisaibillana ciode. Jiaino baiŕfemo illena, jofo nama abimo nana raiacadimaci. Iena ciuamona, naimacimo Jesús rafuena llofuate:

⁸ —Rafue dine guillena omoina bu uaidoia, jofo nama abimo raiñeno, omoi baiŕfemo itimie bi railano.

⁹ Jofo nama abimo omoi raia, omoi baiŕfemo itimie bia, jofo nama omoimo lloite: “Bimiemo omoi raillanona feca”. Meidaillanona, oni rainadaitomoi.

¹⁰ Ie jira rafue dine omoina uaidoia, naie jofomo omoi ria, oni rai. Ie mei jofo nama jitaia, omoimo lloite: “Cue abimo rai”. Ie mei nana naie itino omoi iobillana cioitimaci.

¹¹ Ie isoide. Jusiñamuidi jiaimie afemo iacadimiēna jiaimie afemo iñenana itataite. Jusiñamuidi jiaimie afemo icaiñedimiēna jiaimie afemo itataite.

¹² Naimiēna uaidotimiemo Jesús llote:

—Guille rafuena o finoia, naga icaiño o nabaiñiaina uaidoñeno. Naga icaiño o cominina uaidoñeno. Naga icaiño o ecimo itino ucuberedinona uaidoñeno. Naimacina o uaidotona, jairuido guillena ona uaidoitimaci, naie iba o ollena;

13 ia rafuena o finoia, dueredinona uaido. Ñuja-ñujacaida macaritinona uaido. Uisinidinona uaido.

14 Naimacimona iba ico o oñenamona, Jusiñamui ona caimare itataite. Jiairuido fiodaillamona mareuidino jilloia, monamo Jusiñamui ona ibaite.

Jesúdi ailluena guille finoca rafuena llua rafue

15 Jesús abimo itinomona Jesús lluana damie cacajano, raite:

—Monamo Jusiñamui illanomo itimiedi marena iite.

16 Jesús uai ote:

—Iena omoi raise uiñollena bie rafuena lloiticue. Damie aillue rafuena finode. Ailluena cominina uaidote.

17 Rafue illaruimo ie mullaïmana orede, cominina dane uaidollena. Raite: “Mai bi. Nana guille finuadi jai fuite”;

18 ia biacaiñedimaci. Damie llote: “Eniruena como ibadicue. Iena jibuisaiacadícue. O rafuemo jaiñeiticue. Ie jira cue joreña icíñeitirosa”.

19 Jiaimie llote: “Diez diga juraretana como ibadicue. Naimacina jibuisaiacadícue. O rafuemo jaiñeiticue. Ie jira cue joreña icíñeitirosa”.

20 Jiaimie llote: “Riño como otícue. Ie jira o rafuemo jaiñeiticue”.

21 Ie nama dine naie mullaïma abido jaide. Comini biacaiñenana llote. Iena cacajano, rafue namadi icirite. Ie mullaïmamo llote: “Cai nairai naisona jai. Dueredinona uaido. Ñuja-ñujacaida jaidinona uaido. Uisinidinona uaido”.

22 Ie mei naie mullaïma jaide. Abido naimie bia, ie namamo llote: “O lluana finodicue. Ailluena comini jai bitimaci. O jofomo illino nia ite”.

23 Rafue namadi uai ote: “Naisomo itinona bene atillena, cue jofona oruitallena, cai nairaimona jino jai.

24 Cue nano uaidogano cue guillena guiñeitimaci”. Ie isoide. Jusiñamui rafuena feiñotino monamo Jusiñamui illanomo ico iitimaci; ia naimie rafuena jitaiñedino nainomo ico iñeitimaci.

Jesúdi naimie llofueganona jaiacadino rafue

25 Naie facaise ailluena comini Jesús diga jai jaisoidimaci. Naimacimo llote:

26 –Cue llofuegamiena jaiacadimie cuena ie moo baifemo isiruilla. Cuena ie ei baifemo isiruilla. Cuena ie ai baifemo isiruilla. Cuena ie uruiaí baifemo isiruilla. Cuena ie amatiái baifemo isiruilla. Cuena ie miriñotiai baifemo isiruilla. Cuena ie abi baifemo isiruilla. Iese cuena isiruiñenia, cue llofuegamiena raise jainide.

27 Cue llofuegamiena bu jaillamona, duere sefuicana jaite. Nibai naiemona fiodaite. Bu iese jaiacaiñenia, cue llofuegamiena naimie raise jainide.

28 'Ero, jiaie rafuedo iena lloiticue. Jofona bu finoacania, ie ucubena bailla diese uiñollena: “¿Niga raifite?” comecina nano facade.

29 Iese naimie comecina facañenia, goguirai naidania mei, ie ucube riñenia, taiguanona, naimieri jaisitimaci.

30 Raitimaci: “Ie jofu finua tainede; iadedi fuidonide”.

31 'Ero, jiaie rafuedo iena lloiticue. Illaima jobaimena finoacania, nano comecina facade: “Cuemo ite diez mil soldaduai. Cue bacauaimo ite veinte mil soldaduai. ¿Niese emodofiticue?”

Comecina facaja mei: “Emodofiñeiticue” naimie comecina facajia,

³² nia are naimie bacauai ia, daguelli uicodo orede, ie fairiconi diga ñaillena. Raite: “Jobairiacaiñedicue; ia o diga bie rafuena raise finoacadicue”.

³³ Biemo comecina omoi faca. Ie raruiamo bu comecina eo facaia, cue llofuegamiena jainide.

³⁴ ‘Sal mare; iadedi ie caimano jai iñenia, ¿dane niese nibaiamona caimarenite?

³⁵ Jai marañede. Eniruemo jonegadena, jiai marañede. Oni dotaca. Ie isoide. Cue llua isoi omoi iñenia, cue llofueganona jainidomoi. Omoi jeforena jira, raise fueollena, cue lluomo cacarei. Iena ñno.

15

Jesúdi naimiena ñnotinomona damie faifillana jitañena rafue

(Mt 18.10-14)

¹ Naimaci bisoilla isoi ie rafuena cacaillena, diga gobierno ucubena oraini Jesús dine ofidimaci. Jusiñamui llogacinona raise jaiñedino jiai ofidimaci.

² Iena ciuano, fariseuai cominidi, Moisés micori llogacinuaina llofueraini diga, Jesús joreñaona ñaitimaci:

—Bimie marañedicinona finorainina feiñote. Naimaci diga jiai guite.

³ Naimaci ñaiana uiñuanona, Jesús naimacimo bie rafuena llote:

⁴ —Omoimona damiemo cien toica llaudaiaia nibai ite. Naimacimona daje feiraite. Ie noventa y

nueve llaudaiaina faimonocaida, iena jenuaite, ie baille dinori.

⁵ Baillanona, ie fecanicomo rocanocaida, iobicana biite.

⁶ Jofomo naimie ria, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue feiraita llaudana jai baiticue”.

⁷ Ie isoide. Cue rafuena cue lluamona, damie ie comeci jeacinona faimonocaillamona, ie comeci iuai meiduamona, monamo itino eo iobitimaci; iadedi noventa y nueve comini marena illamona, janore iobitimaci.

Jesúdi faifide ucubena bailla llua rafue

⁸ Jesús llote:

—Jiaie rafuena omoimo lloiticue. Dañaiñodemo diez diga ucube ite. Naiemona daje ucube naiñaiño faifia, lamparín unianona, ie jofona gal-laite. Eo jenoite, ucube ie baille dinori.

⁹ Iena naiñaiño baia, ie nabaiñiaina uaidoite. Ie ecimo itinona jiai uaiduanona, raite: “Cue diga iobi. Cue faifide ucubena jai baiticue”.

¹⁰ Ie isoide. Cue rafuena cue lluamona, damie ie comeci jeacinona faimonocaillamona, ie comeci iuai meiduamona, Jusiñamui jaienisaie eo iobidimaci.

Jesúdi damie ie moo faimonocaila llua rafue

¹¹ Jesús llote:

—Jiaie rafuena omoimo lloiticue. Damiemo mena jito ite.

¹² Ie moomo jamamie llote: “Moo, o fiodailla mei, o raruiaimona janore feiñoiticue. O fiodail-lana sedaacaiñedice. O raruiaina cue facaina

birui jitaídícue. Cuemo ine”. Ie jira ie moo naimiemo fecade.

¹³ Ie mei nano nie dínori illamona, nana ie raruiái iraiánona, jiaíe eníruemo jaide. Nainomo ie ucube jamai buruemo faíaide.

¹⁴ Nana naimie ucube fuidua facaise, naie eníruemo guille iñede. Aime guitímací. Naimie jiaí aime guite.

¹⁵ Ie jira nainomo ite patrón díne maijiaide. Naie patrón ie chanchuaina sedallena naimiena orede.

¹⁶ Naimiena jaca buna ecarainina jira, chanchuai guillemona guiacade.

¹⁷ Iese naimie duere sefuilla jira, ja muidomo abina uiñoçaillamona, comecina facade: “Cue moo jofomo nana naimie mullaíai raise guitímací. Guille fiebicabite; iadedí bene aimeri fiódaitícue.

¹⁸ Cue moo díne abído ja jaitícue. Naimiemo lloítícue: Jusiñamuimo jeacínona finodícue. Omo jeare jiaí finodícue.

¹⁹ Odi: ‘Cue jito’ cuena raiñeno. O mullaíai illa isoi, cuena abído feiño”.

²⁰ Ie facaise ie moo díne jai jaide. Nia aare naimie ia, ie moo naimiena ciode. Ie jítóna duenaillanona, naimie díne aisíde. Naimiena caimadote. Jiaí llibanote.

²¹ Ie jito naimiemo llote: “Moo, Jusiñamuimo jeacínona finodícue. Omo jeacino jiaí finodícue. Odi: ‘Cue jito’ cuena raiñeno”.

²² Ie moo iena cacajano, ie mullaíaimo llote: “Cue jítóna naimie eruaillena, eo mare iniroina atí, naimie jítallena. Cue jítóna naimie illa jira, iena jítallena, anillona atí. Naimie jítallena, zapatona jiaí atí.

23 Janoreta farediretana fano. Iena raise finuanona, iena mai cai guilli. Iobillamona, caimare ebirede rafuena finoiticaí.

24 Navui cuemona cue jito fiodaite isoide. Cajе cuemo dane abido rilla. Navui cuemona naimiedi faífide; iadedi birui naimiena dane ciodicue”. Naimie llua isoi, rafuena finodimaci.

25 Naie facaise nano doforamie illimo ite. Jofomo abido naimie bia, comini iraisillana cacade.

26 Daje mullaímana uaiduanona, naie rafuena jicanote.

27 Naie mullaíma uai ote: “O ama abido jai bite. O ama ramo jiriñeno abido billa jira, o moo ie janoreta farediretana jai fatatate”.

28 Iena cacajano, icirite. Fo jaiacaiñede. Ie jira ie moo jino bite. Naimiena fo uaidote.

29 Ie moomo llote: “Ero, diga años o diga maijidicue. O uaina jaca inotícue; iadedi cue nabaiñiaí diga, rafuena cue finollena, chivo cuemo jaca fecañedio.

30 O jito jamamie ie ucube callirediñaiñuaimo fuidode; iadedi abido naimie billano, naimie facaina janoreta farediretana fatatatio”.

31 Ie moo uai ote: “Moo, nagarui cue diga itio. Nana cue radi oienite.

32 Cuemona o ama navui fiodaite isoide; iadedi naimiena dane ciodicue. Naimie navui faífide raitícue; iadedi caje cuemo dane abido rilla. Cue iobillanona rafuena finodícue”. Bie rafuemona omoi fueollena, iena jai llotícue —Jesús llote.

16

Jesúdi patrón ie mullaíma finoca rafuena llua

rafue

¹ Ie llofueoicaiganomo Jesús jiaie rafuena llote:

—Ucuberede patrón ie mullaïmana ie rana se-datate. Naie patrón eneno oni illanona, ie mullaïma ie rana raise sedañenana fidide.

² Naimiena uaiduanona, naimiemo jïcanote: “¿Maraiñede o finoca rafuena nïese fididicue? Omo ite cuentas cioacadicue. Cuemo ati. Cue diga jai maijïñeitio”.

³ Iena cacajano, naie mullaïma começina facade: “¿Nïese nibaiiticue? Cue nama cuena jai dotaacade. Maijïana ocuinidicue. Jiaie cominimona ucube jamai jïcajana meiruiticue.

⁴ Cue finuana jai uiñoticue. Naimaci jofomo comini cuena ico feiñollena cue dotaja mei, nana cue patrón debedinona uaidoiticue”.

⁵ Ie jira naimacina uaidote. Damiemo jïcanote: “¿Cue patrómo nïga debedio?”

⁶ Uai ote: “Cien bidones raifi aceitunamona oga aceitena debedicue”. Naie mullaïma raite: “O rabemo jarire ja cueno: cincuenta bidones”.

⁷ Jiaimïemo jïcanote: “¿Nïga debedio?” Uai ote: “Cien digagai trigo raifi debedicue”. Naie mullaïma dinena raite: “O rabemo ochentana cueno”.

⁸ Iena fidiano, naie mullaïmamo ie patrón raite: “Jiaïruido marena o illemo o começina raise facadio. Eo abina uiñotimïedio” raite. Ero, Jusiñamuina ñnoñedinodi naimiena ñnotino baiïfemo ra fecajana baitadimaci.

⁹ Naiemona omoi fueollena, omoïmo lloiticue. Omoïmo ite ra diga dueredinona cano. Iemona omoi nabaiñiaïna jaitimaci. Omoi fiodaia, omoi

ra bene fiebite; ia Jusiñamui illanomo naimaci diga omoi ia, naimacina birui omoi canuamona, nainomo omoina marena ñaitimaci.

¹⁰ Janore ra omoimo illamona, Jusiñamui facaina birui omoi raise maijia, ailluena ra omoimo itedena, Jusiñamui facaina jiai raise maijitomoi. Janore ra omoimo illamona, maraiñede rafuena birui omoi finoia, ailluena ra omoimo itedena, maraiñede rafue nia jiai finoitomoi.

¹¹ Omoimo birui ite ra diga Jusiñamui facaina omoi raise maijiñenia, naimiemona jiaie rana feiñoñeitomoi.

¹² Omoi anamo ite ra diga Jusiñamui facaina omoi raise maijiñenia, Jusiñamui ie rafue omoimo itatañeite.

¹³ Mena patrones diga daruido buna jaca maijinide. Mena diga bu maijiacania, damiena jiaimie baifemo gaite. Ie gaiamie ocuica rana finoite. Jiaimie ocuica rana raise finoñeite. Ie isoide. Raruiyai ollemo comecina omoi eo facaia, Jusiñamui jitaillacinomo comecina raise facañeitomoi.

Jesúdi fariseuai comini diga dane ñaia rafue

¹⁴ Jesús llofuiana fariseuai comini cacajano, ucubena eo gaia jira, naimie uaina jamaidimaci.

¹⁵ Naimacimo Jesús llote:

—Omoi finoca rafuemona comini omoina: “Mare” raillana jitaidomoi; iadedi Jusiñamui omoi comechiai maraiñenana uiñote. Iese omoi illana Jusiñamui gaiñede.

¹⁶ Jusiñamui facaina lloraini micoriai cuela-fuiaimona Jusiñamui rafuena cacacabidomoi. Moisés micori cuela-fuiaimona iena jiai

cacacabidomoi. Juan Bautista micorimona naimie anamo omoi illana Jusiñamui jitaillana cacadomoi. Jusiñamui dibeimo omoi comeciai iuaina meiduana cacadomoi. Iena jiai llocabiticue. Iena ailluena inuamona, Jusiñamui dibeimo birui duere iacadimaci.

¹⁷ Mona enirue diga nia ia, nana Jusiñamui llogacinuai suicana jaite.

*Jesús iima ie aina dotaja rafuena llofuia rafue
(Mt 19.1-12; Mr 10.1-12)*

¹⁸ Jesús llote:

—Naga aina dotadimiedi, jiañaiño ollena, jeacinona jai finode. Dotacañaiño bu oia, jeacinona jai finode.

Jesúdi ucuberedimie iaimaia Lázaró ie rafuena llua rafue

¹⁹ Jesús jiaie rafuena llote:

—Cue llogacinona omoi raise uiñollena, bie rafue lloiticue. Ucuberedimie ite. Eo mare iniroina jitade. Eo caimare raise guicabite.

²⁰ Naimie nasemo Lázaró raillamie jamai bide. Naimiedi dueredimie. Efonaitimie.

²¹ Naimiedi ucuberedimie guiga allamona guicade; ia guiñede. Jiconiaidi naimie efocaina mecabite.

²² Ie mei naimie fodaite. Jusiñamui comina naimie illamona, Jusiñamui jaienisaí naimie joreño monamo Abraham micori joreño illanomo uitimaci. Ucuberedimie jiai fodaite. Comini naimiena raitimaci.

²³ Jusiñamui cominina naimie iñenamona, naimie joreño iraimo jaide. Nainomo naimie duere sefuillamona, Abraham joreñona aarena ciode. Naimie ecimo Lázaro micori ie joreñona jiai ciode.

²⁴ Abraham joreñona uaidote: “Cue moo Abraham, cuena duenai. Lázaron a cue dine oreta, ie onocai diga, jinuina cue fuemo llocatallesa, cue fuedo manare jaillena. Bie iraimona jai eo llogi cacadicue”.

²⁵ Abraham joreñodi uai ote: “Moo, o illa dinori naga ra omo ite. Marena itio; iadedi Lázaro duere sefuide. Birui naimie marena ite; iadedi o duere sefuidio.

²⁶ O dine jainidicai. O enefebetuemo itio. Cai enefebetuemo jiai iticai. Caimona omoi dine bu jaiñellena, omoimona cai dine bu biñellena, iese ite”.

²⁷ Ucuberedimie micori joreño dinena uai ote: “Cue moo jofomo Lázaron a oreta.

²⁸ Cueno cinco amatiai ite. Naimacimo riire llollena, bie iraimo naimaci riñellena, naimiena oreta”.

²⁹ Abraham joreñodi uai ote: “Naimacimo Moisés micori ciegafuiai ite. Jusiñamui facaina jaie lloraini micoriai ciegafuiai jiai ite. Iemo naimaci comeciaina facallesa”.

³⁰ Uai ote: “Iese lloñeno. Iemo comeciaina facañeitimaci; iadedi fiodaillamona jilluanona, naimaci dine bu jaia, naimiena ñnoitimaci. Naimaci comeciai iuai meidoitimaci”.

³¹ Abraham joreñodi uai ote: “Moisés micori ciegafuiai, Jusiñamui facaina jaie lloraini micoriai ciegafuiai naimaci ñnoñenia, fiodaillamona bu jilloia, naimiena jiai ñnoñeitimaci” —Jesús llote.

17

Jesúdi jeacina finoñenana llofua raufe

(Mt 18.6-7, 21-22; Mr 9.42)

¹ Ie llofueoicaiganomo Jesús llote:

—Diga ramo omoi faicana uitinomo riitomoi. Omoi ramo faitimie duere sefuite. Jusiñamui omoi ramo faitimiena duere finoite.

² Como creyentena jaidimiena ramo bu faia, naimie cimaimo aillue nofici maianona, joraimo corobaillena naimiena dotacadena, mare.

³ Como creyentena jaidimiena ramo omoi faiñellena, abina omoi rairui. O ecimo itimie ona jeare finoia, naimiemo iena llono. Ie comecina meidoiacania, naimie jearede finoca rafuena feita.

⁴ Nagarui diga icaiño ona jeare naimie finoia, naga icaiño o diga naimie marena dane ñaiacania, naie rafuena feita.

Jesúdi naimiena #nuana llua rafue

⁵ Ie doce llofueoicaigano Jesúmo llote:

—Ona #noticai; ia caina o uaina eo #nota.

⁶ Uai ote:

—Jusiñamuina eo janore #notomoidena, bene ite amenamo omoi lloia: “Benomona jai. Joraimo sico”, naie amena omoi uaina #note.

Jesúdi ie facaina llofueoicaigano maijia llua rafue

⁷ Ie llofueoicaiganomo Jesús llote:

—Bie rafuemono omoi fueollena, iena lloiticue. Illimo ie mullaima maijiamona, ie toinai sedajamona jofomo abido naimie ria, ie patrón naimiemo lloñeite: “Mai nano guisaibi”;

8 iadedi naimiemo lloite: “Cueiena guillena nano fino. Cuen aca. Ie mei guitio”.

9 Naie mullaïma ocuica rana finua muidona, mullaïmana naimie illa jira, ie mullaïmamo patródi iobillacinona fecañeite.

10 Ie isoide. Nana cue lluana omoi finodomoïna, dani omoi maijadi, cue cominina omoi illa jira, cuemona iobillacinona feiñoñeitomoi.

Jesúdi diez efonaitinona jillotaja rafue

11 Jerusalémo ie llofueoicaigano diga Jesús jaidemo, naimie nabeimo Samaria enirue ite. Naimie jarifebeimo Galilea enirue ite.

12 Nairai dine naimie riacania, diez efonaitinodi naimiemo dafaïfidimaci. Eneno oni naidaidimaci.

13 Naimiena ado uaidotimaci:

—Jesús, Maestro, caina duenai. Caina ja jillota.

14 Naimacina Jesús ciuanona, naimacimo llote:

—Mai jai. Jusiñamui diga ñairainimo omoi abina acata. —Jaidimacimo, jillodimaci.

15 Ie abi jilluana ciuano, naimacimona damie Jesús dine abido bite. Jusiñamuimo iobillacinona ado fecade.

16 Naimiemo iobillacinona jiai fecallena, Jesús uicommo ana bitadate. Naimiedi judíuñedimie. Samaritano imie.

17 Jesús llote:

—Diez digamiedomoi. Omoïna jai jillotaticue. ¿Ninomo jiaïnodi nueve digamie itimaci?

18 ¿Ñiese Jusiñamuimo iobillacinona fecaacaiñedimaci? Dama bimie fecade. Naimiedi judío imieñedimie.

19 Jesús naimiemo llote:

—A naidada. Mai jai. Cuen a o ñnua jira, jai jillodio.

Jesúdi Jusiñamui ie cominina sedajana llofua rafue

(Mt 24.23-28, 36-41)

²⁰ Naie facaise fariseuai comini Jesúmo jicanotimaci:

—¿Ñiruido Jusiñamui caina bene sedaite?

Jesús uai ote:

—Siño rafuena omoi ciuamona, Jusiñamui omoína sedallena uiñoñeitomoi.

²¹ Buena ciuamona raiñeitomoi: “Jadi, Jusiñamui bene caina jai sedade”. “Jadi, batine caina jai sedade”; iadedi omoi motomo itinomona Jusiñamui díbeimo damierie illamona, Jusiñamui omoi motomo jai illana uiñoitomoi.

²² Ie llofueoicaiganomo llote:

—Jairuido duere sefuillamona cue diga janore jisa iacanitomoi; iadedi iese nia iñeitomoi.

²³ Damierie raia: “Ero, batine Cristo jai bairede” nainomo jaiñeno. Naimaci raia: “Ero, bene Cristo jai bairede” iena ñnoñeno.

²⁴ Mona borillamona mona jillacidi usere cide. Ie isoide. Cue abido bia, nana comini iena uiñoitimaci.

²⁵ Birui iese nia suiñeite. Nano duere sefuiticue. Birui ite comini cuena jiai feiñoñeitimaci.

²⁶ Abido cue billirui iaírei ia, Noé micori facaiseconi itino isoi, comini iitimaci. Naimaci duere sefullemono Noé micori facaise itinodi comeciaina facañedimaci.

²⁷ Naie facaiseconi nia eo noci deiñenia, Noé micori ecimo itino naimaci isoilla isoi icana jaidimaci. Jamaí guicana jaidimaci. Aina ua

mei, inina ua mei, jebuicana jaca jamai jaidimaci. Dani iemo comeciaina facauidimaci. Jusiñamuimo comeciaina facañedimaci. Iese itimaci, Noé micori ie balsamo fo jailla dinori. Nia noci deiñenia, Noé micori lloga uaina inoñedimaci. Noci deilla mei, ebena nana faifidimaci. Cue abido bia, ie isoite. Ebena biiticue.

²⁸ Lot micori facaiseconi daje isoidimaci. Jamai guicana jaidimaci. Aina ua mei, inina ua mei, jebuicana jaca jamai jaidimaci. Rana ibauidimaci. Iena fecauidimaci. Illimo maijuidimaci. Jofona finuidimaci. Naimaci isoilla isoi icana jaidimaci.

²⁹ Dani iemo comeciaina facadimaci. Jusiñamuimo comeciaina facañedimaci. Iese icana jaidimaci, Sodomamona Lot micori jailla dinori. Nairui monamona boode azufre ebena billanona, nana Sodomamo itino jobaide. Ebena nana faifidimaci.

³⁰ Ie isoide. Abido cue billiruimo comini iitimaci. Cue bia, ebena biiticue.

³¹ Naie facaise bu ie jofo emodomo ia, ie raruiaina ollena, naimie diga uillena, bu fo jaiñena. Illimo bu ia, ie raruiaina ollena, ie jofomo bu jaiñena.

³² Iemona fueollena, Lot ai micori rafuemo comecina faca. Naiñaiño ie raruiamo daño comecina facajamona, na ie abi diga faifide.

³³ Dama ie raruiamo ie comecina bu facaia, ja muidomo faifite. Cue diga jaca iñeite; iadedi cue jitaillacinona finuamo ie comecina bu facaia, monamo cue diga jaca iite.

³⁴ Cue bille facaise menamie daje quartomo iniano iitiaimaiai. Damie jaite. Jiamie fiebite.

³⁵ Mena riño danomo doberillanona iitiaiñuai.

Dañaiño jaite. Jaiñaiño fiebite.

³⁶ Menamie illimo maijiano iitiamaia. Damie jaite. Jaimie fiebite.

³⁷ Ie llofueoicaigano jicanotimaci:

—¿Ñine jaitimaci?

Uai ote:

—Urujaisai rifaide ramo ofillana uiñua isoi, nana cuena ñnotino cue abido billena uiñoitimaci. Cuemo duillamona, cue diga jaitimaci.

18

Jesúdi feciñona llua rafue

¹ Ie llofueoicaiganomo Jesús rafuena dane llote:

—Jusiñamuimo jicabi, omoi jicaca rafue omoi feiñolle dinori. Raire feiñoñenia, abina jafueño.

² Iena omoi raise uiñollena, bie rafuena lloiticue. Jiaie nairaimo juez ite. Jusiñamuina jaciruiñede. Cominina jiai jaciruiñede.

³ Nainomo naimie dine daje feciño jai-jaicabillanona, raite: “Cuenas duere finodimimona cuena cano”.

⁴ Naimie dinena raite: “Dama iesede. Ona canoñeiticue”. Ie mei ie comecina facade: “Jusiñamuina jaciruiñedicue. Cominina jiai isiruiñedicue;

⁵ ia naiñaiño cuemo sefuire bi-bina jira, naiñaiñona canoiticue, cue rairafaiñellena”.

⁶ Jesús llote:

—Maraiñede juez lluanas cacadomoi. Ja muidomo naiñaiñona canode.

⁷ Ero, biemo omoi comeciaina faca. Jusiñamui naie juez isoñede. Nagarui Jusiñamuimo naimaci jicaia, ¿ñiese naimie ie fetocanona canoñeite? Jaca canoite.

8 Raire fairiuanona, naimacina raire canoite; iadedi abido cue bia, ¿niga cuena ñnotino iitimaci? Nibai ailluena cuena ñnoñeitimaci.

Jesúdi Jusiñamuimo menamie jia llua rafue

9 “Mareuidicai” dajerie railla jira, “Jiaie comini bai femo faiticai” dajerie railla jira naimacimo Jesús bie rafuena lloite:

10 –Jusiñamui jofomo, nainomo jillena, menamie jaidiaimaia. Damie fariseo imie. Jiaimie gobierno ucubena oraíma.

11 Fariseo imie naidadacaida, dama anado jide: “Jusiñamui, jiaie comini isoñedicue. Fidimaci. Marañedimaci. Naimaci aññede riño diga itimaci. Cue ecimo ite ucubena oraíma isoi ññedicue.

12 Naga semana menarui guicabiñedicue, ona raise cue sedajanona. Cue ramona omo fecacabidicue. Macaibaite” jide.

13 Gobierno ucubena oraíma eneno naidadacaida, jide. Monamo eruaññede; iadedi jamai bue isoillanona, jogobena farode. Raite: “Jusiñamui, jeacina finoraímadicue. Cuena duenai. Macaibaite” jide.

14 Jusiñamuidi jiaimie afemo iacadimiena jiaimie afemo ññenana itataite. Jusiñamuidi jiaimie afemo iacaññedimiena jiaimie afemo itataite. Ie jira gobierno ucubena oraíma ie jofomo Jusiñamuimona jai marebicaillanona jaide; ia fariseo imie iese jaiññede.

*Jesúdi naimie ñine uruia billana jitailla rafue
(Mt 19.13-15; Mr 10.13-16)*

15 Naie facaise Jesús ñine comini naimaci eisaiaína atisite. Ie onolli naimacimo naimie

joniana jitaídímaci. “Naimacina raise cano” ie Moomo lollena jitaídímaci. Iena ciuanona, ie llofueoicaigano cominina Jesús dine billana rairuidímaci;

¹⁶ iadedi Jesúsdi eisaiaina uaiduano raite:

—Uruiai cue dine billesa. Naimacina rairuiño. Cuena bie isoi ñnotinodi Jusiñamui cominidímaci.

¹⁷ Bie uruai abina iedoñedímaci. Eina-macimona jamai bue isoidímaci. Naimaci isoi bu iñenia, Jusiñamui cominina jaiñeite. Jusiñamui naimiena sedallena, Jusiñamui cominina naimie jaiñeite.

*Ucuberedimie Jesús diga ñaia rafue
(Mt 19.16-30; Mr 10.17-31)*

¹⁸ Ie facaise illaicominimona damie Jesúsomo jicante:

—Maestro, odi mareuidimedio. Jusiñamui diga ico monamo cue jaca illena, ¿nie isoide rana finoiticue?

¹⁹ Jesús uai ote:

—¿Bue ñellena cuena: “Mareuidimedio” raitio? Dama damie mareuidimiena. Naimiedi Jusiñamui. Naimiemo jicano.

²⁰ Moisés micori llogacinuaina ñnocana jai. Jaie cuete: “O añede riño diga iñeno. Comena meineño. Rana fiñeno. Jiaimiena o llogidoia, tainona lloño. O moo uaina ñno. O ei uaina ñno”.

²¹ Uai ote:

—Cue uruena illa facaisemona nana bie llogacinuaina ñnoticue.

²² Iena cacajano, Jesús raite:

—Daje rana nia finoñedio. O raise marebica-
iacania, omo ite raruiaina feca. Naie ucubena
dueredinomo feca. Cueno o ñnuamona, monamo
ico jaca iitio. Cue llofueoicaiganona o illena, mai
cue diga bi.

²³ Jesús llua naimie cacajano, sunaicaide.
Naimiemo eo ailluena ra illa jira, iena fecaa-
cañede.

²⁴ Naimiemo eruaillano, Jesús raite:

—Ucuberedinodi Jusiñamui cominina jaillena eo
sefuiruite.

²⁵ Igido ifodo camello jaca jainide. Ie isoide.
Ie ra isiruillamona, ucuberedimiedi Jusiñamui
cominina jiai raise jainide.

²⁶ Jesús llua cacadino jicanote:

—¿Iemona buca jillobiti?

²⁷ Jesús uai ote:

—Nana comini dani jillobinidimaci; iadedi
Jusiñamuidi naimacina jillobitarede.

²⁸ Pedro raite:

—Ero, o llua isoi cai jofuena fañonocaida, o diga
jaisoidicai.

²⁹ Uai ote:

—Uanaicinona lloticue: Jusiñamui cominina
naimie jaillamona, ie jofona bu fañonocaia, ie
aina bu fañonocaia, ie amatiaina bu fañonocaia,
ie moona bu fañonocaia, ie eina bu fañonocaia,
ie uruiaina bu fañonocaia,

³⁰ Jusiñamuimona ailluena ibana birui feiñoite.
Monamo ico jiai jaca iite.

*Jesúdi ie fiodaillena dane llua rafue
(Mt 20.17-19; Mr 10.32-34)*

³¹ Ie doce llofueoicaigano eneno uillanona, dani naimacimo llote:

—Ero, Jerusalémo jai jaidicai. Monamona bilanona, imana jaidicue. Jusiñamui facaina lloraini cuena jai e cuetimaci. Nana naie rafue ja suite.

³² Judíuaiñedinomo judíuai illaicomini cuena fe-caitimaci. Cueri jifanoitimaci. Cuena jeare finoitimaci. Cuena tuallaitimaci.

³³ Cuena faitimaci. Cuena meineitimaci; ia darui amani illanona, cue fiodaillamona jilloiticue.

³⁴ Naimie lluaña raise cacaiñedinomaci. Naimacina iena Jesús nia raise llofueñena jira, iena raise uiñoñedinomaci.

*Jesúdi uisínidimienajillotajarafue
(Mt 20.29-34; Mr 10.46-52)*

³⁵ Jericó railla nairaimo ie llofueoicaigano diga Jesús riacademo, uisínidimie naiso fuemo raillana cide. Ucubena jamai jica-jicade.

³⁶ Ailluena comini Jesús diga jaillana naimie cacajano, naie cominimo nie isoide rafue illana jicanote.

³⁷ Uai otimaci:

—Nazaret ie Jesús como bene bite.

³⁸ Ie jira naimie cuirioide:

—David micori Jitona o illamona, cuena duenai. Cuena cano.

³⁹ Uicodo jaidino naimienalletade, naimienallicaitallena; iadedi naimie eo cuirioide:

—David micori Jitona o illamona, cuena duenai.

⁴⁰ Naimienacacajano, Jesús naidadate.

—Cue dine naimienati —llote. Naimienatianona, naimiemo Jesús jicanote:

⁴¹ —¿Niese ona cue nibaiana jitaideo?

Uai ote:

—Maestro, cioacaducue.

⁴² Jesús raite:

—Mai eroda. Cuena o ñnua jira, jai jillodio.

⁴³ Ieconi naimie uisidi cide. Jusiñamuimo iobil-lacinona fecajano, Jesús diga jaidino diga naimie jaide. Naimie jilluana ciuamona, nana comini Jusiñamuimo iobillacinona jiai fecadimaci.

19

Jesús Zaqueo diga illa rafue

¹ Jericómo Jesús rillanona, nainomo macaritemo,

² naie facaise nainomo Zaqueo raillamie ite. Gobierno ucubena nanoca oraíma. Naimiedi eo ucuberede.

³ Jesús bai macaritemo, Zaqueo naimiena cioacade; iadedi ailluena comini illamona, Zaqueo ianorina jira, Jesúna cionide.

⁴ Ie jira uicodo aisicana jaide, amenamo a jail-lena, naimiena cioillena.

⁵ Naimie dine Jesús rillano, Zaqueomo a erodate. Naimiena uaidote:

—Zaqueo, raire ana bi. O diga danomo illena, o jofu dine jaiticue.

⁶ Ie jira raire ana bite. Ie jofomo Jesúna iocire feiñote.

⁷ Iena jiaie comini ciuanona, Jesús joreña jeare ñaianona raitimaci:

—Mariñedinona finoraíma jofomo naimie jaide.

⁸ Jesúna naimie feiñua mei, Zaqueo Jesús ecimo naidaita, naimiemo llote:

—Nama, atuedo cue raruiaina dueredinomo biruimona fecaiticue. Bumona navui cue fñia, cuatro diga ra abido iiticue.

⁹ Jesús uai ote:

—Iese o llua jira, o comini diga Jusiñamuina jai o ñnuana uñoticaí. —Jamai bitinomo llote:

—Zaqueodi Abraham micori jito; ia Jusiñamuina navui ñnoñede.

¹⁰ Naimie isoidino jillobitalena, biticue. Monamona billanona, ñmana jaie jaidicue. Jusiñamuina ñnoñedinona jenuaibidicue, naimacina jillobitalena.

Illaima ie mullaiaimo ucubena fecaja rafue

¹¹ Zaqueo jofomo itino Jesús llofuiana cacajano, comecina facadimaci: “Jerusalén ianori ite. Nainomo Jesús rilla mei, illaima isoi nainomo Jusiñamui ie cominina raire sedaite”.

¹² Iena naimaci raise uñollena, Jesús bie rafue naimacimo llote:

—Illaima jito ie nanoca illaima ñine jiaie nairaimo jaide. Ie cominina sedallena, nanoca illaimamona ie uaina feiñoiacade. Iemei abido biacade.

¹³ Nia naimie jaiñenia, diez diga ie mullaiaina uaidote. Nagamierie daberie ucubena fecade. Naimacimo llote: “Bie ucube diga jiaie ucube ocana omoi jai”. Ie mei oni jaide.

¹⁴ Ie comini naimiena enoidimaci. Jiañona nanoca illaima ñine oretajano, raitimaci: “Bimie caina sedajana jitaiñedicaí”; ia nanoca illaima ñinena naimaci lluaña jaca cacaiñede. Ie jira naie nanoca illaima naie illaima jitomo ie uaina ite.

15 Ie uaina feñua mei, abido ie eniruemo jaide. Rilla mei, ie mullaiaina uaidote. Nie diese ucubena ocana naimaci jaillana uiñoiacade. Ie jira naimacina uaidote.

16 Nano bitimie raite: “Nama, o cuemo dabe fecadio. Dabedemona jai cuemo ite diez digabe”.

17 Naie illaïma naimiemo llote: “Eo marena maijidio. Mare mullaïmadio. Janore ra raise o sedaja jira, ona diez nairaiaïna sedataitïcue”.

18 Ie mei jiaïe mullaïma billanona, raite: “Nama, o cuemo fecaca dabedemona jai cuemo ite cinco digabe”.

19 Illaïma llote: “Ona cinco nairaiaïna sedataitïcue”.

20 Ie mei jiaïe mullaïma bite. Raite: “Nama, jadi, o cuemo iga o ucube. Iniroimo tilliano, iena eenotïcue.

21 Ona cue jaciruillano, odi eo riimiena jira, iena jamai eenotïcue. Jiaïe cominimona ie rana bairocabidio. O maijiñena ramona ocabitio”.

22 Illaïma dinena raite: “Eo marañede mullaïmadio. Cuen a o llua isoi, ona duere finoitïcue. Cue riimienana uiñotio. Jiaïe comini ie rana cue bairuana uiñotio. Cue maijiñena motomo ra cue uana uiñotio; ia buena maijiñedio.

23 ¿Bue ñellena bancomo cue ucube joneñedio? Bancomo itena, jiaïe ucubena ocana jaide. Ie mei abido cue bia, omo cue fecaja ucube baifemo feñotïcue”.

24 Nainomo itinomo llote: “Naie ucube naimiemon a bairuano, diez digabe itimie mo feca”.

25 Uai otimaci: “Naimiemo ailluena ucube jai ite. ¿Bue ñellena dane jiaïe fecaitio?”

²⁶ Illaïma ðinena uai ote: “Ailluena raredimie jiaïe rana feiñoite; iadedi janore raredimie ie rana faifite.

²⁷ Cuena enoidinona bene ati. Naimacina cue sedajana jitañedimaci. Naimacina meine”.

Jesús nia llote:

—Ie isoide. Iese omoïmo suiñellana, Jusiñamui ie comini sedalliruina omoï uifioñena jira, cue jitaillacino finocana jai.

Jesús Jerusalémo jailla rafue

(Mt 21.1-11; Mr 11.1-11; Jn 12.12-19)

²⁸ Naie rafuena llofuia mei, Jerusalén ðine comini uicodo ie llofueoicaigano ðiga Jesús jaide.

²⁹ Jerusalén iaieicaidemo, mena nairaïmo riacade. Betfagémo railla nairaïmo ride. Betania nainomo jiaï ite. Olivos railla anedumo naga nairaï iaïmaïaï ite. Ie llofueoicaiganomona mena orede.

³⁰ Raite:

—Bie nairaï illa uicomo mai omico jai. Nainomo cuinaca burritona baitomico. Naie burrito emodomo nia buna jaiñena. Iena suiñuano bene ati.

³¹ Omicomo: “¿Bue ñellena iena suiñodomico?” bu jicanoia, llono: “Coco Nama iena jitaide”.

³² Naimie llua isoi jaidiaïmaïaï. Naimie llua isoi burritona baitiaïmaïaï.

³³ Ie facaise ie naniaï iaïmaïaïmo jicanote:

—¿Bue ñellena cai burritona suiñodomico?

³⁴ Uai otiaïmaïaï:

—Coco Nama iena jitaide.

³⁵ Ie mei Jesúmo iena atidiaïmaïaï. Burrito emodomo iniroina jobianona, ie emodomo Jesúsdi rainadate.

³⁶ Jesús iese jaidemo, naimiena iobitallena, illaïma isoi naimie jaillena, comini imaci ñiroi diga, naiso motomo jobedimaci.

³⁷ Jerusalémo joide naiso ite nafai muidomo naimie rillanona, naie ituemo ana jaillanona, nana Jesús diga jaidino caïmare itimaci. Nana Jesús siño finoca rafuena naimaci jai ciua jira, iena naimaci uibiñuamona, Jusiñamuimo iobillacinona ado eo fecadimaci.

³⁸ Raitimaci:

—¡Cai Illaïma billa! ¡Jusiñamui mamecido bitimemo cai iobicabillasa! O muidona Jusiñamuidi comini diga uri ite. ¡O finoca rafue muidona Jusiñamuimo iobicabillasa!

³⁹ Naie cominimona dajerie fariseuai raitimaci:

—Maestro, o diga jaidinona llïcaïllena, naimacina lleta.

⁴⁰ Uai ote:

—Naimaci llïcaïa, biso fuemo ite noficidi cuena marena ñaite.

⁴¹ Jerusalémo Jesús iaïrei ria, iena ciuano, eede.

⁴² Raite:

—Jerusalén itino, Jusiñamui diga omoi uri illena jai biticue. Omoïna naimie cominina itataiacadicue; iadedi iena jitaiñedomoi. Iena jitaïdomoidena, ico duere sefuiñeitomoi.

⁴³ Jiaïruido omoi bacauai jobaimena finuanona, omoïna cirinoitimaci. Omoi ecido llaitimaci.

⁴⁴ Omoïna meineitimaci. Omoi uruiaïna meineitimaci. Omoi illanona judaïitimaci. Jusiñamui omoi motomo birui illana omoi uiñoña jira, iese omoïmo suite.

Jesúdi Jusiñamui jofomona damieriena dotaja rafue

(Mt 21.12-17; Mr 11.15-19; Jn 2.13-22)

⁴⁵ Jerusalémo Jesús rilla mei, Jusiñamui jofomo jaide. Jusiñamuimo ofomaiaina fecallena, naimiemo toica llaudaiaina fecallena, nainomo comini jaisoidimaci. Naie cominina ibatajanona, ofomaiaina, toica llaudaiai diga, damierie fecauidimaci. Iena ciuanona, naimacina jino orede.

⁴⁶ Raite:

—Ie facaina lloraima micori Jusiñamui llogacino jaie cuela: “Cue jofo ite nainomo cuemo comini jillena” cuela. Ero, ailluena omoi ibataja jira, naimie jofona firiruidino jofona omoi finoca.

⁴⁷ Jusiñamui jofomo nagarui Jesús llofuate. Judíuai illaicominidi Jesúsna meineiacadimaci;

⁴⁸ iadedi niese nibaiñedimaci, nana comini naimie llofuiana eo jitailla jira.

20

Jesúdi ie siño uaina llua rafue

(Mt 21.23-27; Mr 11.27-33)

¹ Jusiñamui jofomo Jesúsdi cominina llofuate. Jusiñamui rafuena llofuate. Judíuai illaicomini naimie dine bitimaci. Naimacidi Jusiñamui diga nanoca ñairaini. Naimacidi Moisés micori llogacino llofueraini. Naimacidi einamaci. Dese billanona,

² jicanotimaci:

—¿Nie isoide uaido o finoca rafuena finocabidio?
¿Bu omo iga uai diga o finoca rafuena finocabidio?

³ Jesús dinena uai ote:

—Omoimo nano jicanoiticue.

⁴ Juan Bautista micoridi cominina navui bautizade. ¿Bu naimie micorina cominina bautizatate? ¿Jusiñamui? ¿Comini? Cuemo llono.

⁵ Dani coniniri iena siaduanona raitimaci:

—“Jusiñamui” cai fairioia, caimo jicanoite: “¿Bue ñellena naimie micorina inoñedomoi? ¿Bue ñellena naimie micorilla isoi bautizañedomoi?”

⁶ “Comini” cai fairioia, bene itino caina meineitimaci, Juan micoridi Jusiñamui facaina lloraïma naimaci railla jira.

⁷ Ie jira Jesús uai otimaci:

—Uiñoñedicaï.

⁸ Jesús dinena raite:

—Ie muidona cuemo nie isoide uai illana omoimo lloñeiticue.

*Jesúdi marañede majiraini rafuena llua rafue
(Mt 21.33-44; Mr 12.1-11)*

⁹ Nainomo itinomo Jesús llote:

—Jiaie rafue omoimo lloiticue. Iemo cacarei. Daje patrón uvas railla riaraiaina rite. Ie mei ibatajanona jiaïnomo fecade, iena sedallena. Ie mei jiaie eniruemo are illena jaide.

¹⁰ Uvas jai einaila facaise riaraiaina sedaraini dine daje mullaïmana orede, naimie facaise iedinona naimie feiñollena; iadedi naie sedaraini naie mullaïmana fatimaci. Uvas naimiemo fecañeno abido oredimaci.

¹¹ Ie mei patrón jiaie mullaïmana orede. Naimiena fatimaci. Jeare finodimaci. Uvas naimiemo fecañeno abido oredimaci.

¹² Naie patrón jiaïmiena orede. Naimiena eo bofedaitajanona jino dotadimaci.

13 Iemei patrón comecina facade: “¿Niese nibaiticue? Cue isiruiga jitona oretaiticue. Naimiena nibai jaciruitimaci. Naimie uaina inoitimaci”.

14 Riaraiaina sedaraini naimiena ciuanona, coniniri ñaitimaci: “Bimiemo bie illi fiebiite, naimie moo fiodailla mei. Naimiena cai meinelli, bie illi caimo fiebillesa” ñaitimaci.

15 Naimiena jino dotajanona, naimiena meinetimaci. Iena fidia mei, ¿niese naie patrón nibaiite?

16 Naimie biite, naie sedarainina meinellena. Ie mei jiairona ie illina sedataite.

Naie rafuena cacadino raitimaci:

—Bie isoide rafue suillana jitaiñedicaí.

17 Naimacimo Jesús eruaillano, llote:

—Naie illi sedaraini isoidomoi. Jusiñamui facaina lloraima micori omoína jaie cuete. Ie cueba-fuena raise facañedomoi. Naimie micori ciega:

Jofofinoraini jitaiñena nofici nana naie jofomo ite nofici baifemo jai uaide.

cuega. Jusiñamui cominina damierie jaillana naimie micori cuete. Jusiñamui oretagamiena damierie jitaiñenamona, naimie cominina jaiñeitimaci; iadedi Jusiñamui oretagamiena ailluena inuamona, naimie cominina jaitimaci. Ero, naimie micori caina cuete. Naie jofona finoraini isoidomoi. Naie nofici isoidicue. Cue rafuena omoi jitaiñena jira, naimie cominina jaiñeitomoi.

18 Naie noficina nia ñaiticue. Noficimo bu eicaitaia, bofedaite; ia naie nofici bumo ana uaia, naimiena saitaite. Ie isoide. Cue llwana omoi jamaia, duere

sefuitomoi. Iena omoi ñinoñenia, ja muidomo faifitomoi –llote.

Jesúmo gobiernomo ucubena fecajana jicaua rafue

(Mt 21.45-46; 22.14-22; Mr 12.12-17)

¹⁹ Jesús como lloga rafuedo naimacina ñaiana uiñotimaci. Ie jira naie facaiseconi judíuai illacomini naimiena gaitacadimaci; iadedi cominina jaciruitimaci.

²⁰ Ie jira naimiena uiñododimaci. Mare rafuedo abi caitadinona oredimaci. Naimie raise uai oñenia, naimiena duere finollena, naimiena facaciacadimaci. Gobernadormo naimiena llogidoiacadimaci.

²¹ Jesúmo llotimaci:

—Maestro, uanaicinona marena llofuecabitio. Nana cominina dauaido llofuecabitio. Jusiñamui rafuedo cai marena jaillana raise llofuetio.

²² Omo rafuena jicanoiacadicaí. Dama Jusiñamuina sedadicaí; iadedi romanos railla nairai anamo birui cai illa jira, ¿naimaci illaíma Césarmo ucubena cai fecajana rairuidio? Caimo llono –llotimaci.

²³ Naimiena naimaci jifuiana uiñuanona, Jesús dinena uai ote:

²⁴ —Ucube cuemo acata. ¿Bu ie joreño nainomo ite? ¿Bumo jainaiaide bie cueba radi?

Uai otimaci:

—César.

²⁵ Jesús raite:

—César iena itedi, Césarmo ille. Jusiñamui iena itedi, Jusiñamuimo ille –raite.

26 Jesúdi uai raise ua jira naimie llumona jeare rafuena uiñoñedimaci, naimiena llogidollena. Naimie luari rajicaillamona, llhcaidimaci.

*Jesús dine saduceuai railla comini billa rafue
(Mt 22.23-33; Mr 12.18-27)*

27 Naie facaise dajerie saduceuai railla comini naimie dine bitimaci. “Fiodaillamona jaca buna jilloñeite” raisoidimaci.

28 Jesúmo llotimaci:

—Maestro, cai facaina Moisés micori jaie cuega: “Iima fiodailla meinoconi, naimie urue iñenia, ie ama naie feciño olle. Naimiedi uruiaina ie ama facaina comuitaite” cuega.

29 Bie rafuena uiñoiacadicaí. Siete amatiaí ite. Nano doforamie ie aina ote. Naimie nia uruiainide fiodailla.

30-31 Ie emodo imie ie ama feciñona ote. Naimie uruiainide jiaí fiodailla. Naie siete digamiedemona iese sefuide.

32 Ja muidomo naie riño jiaí fiodaite.

33 Fiodaillamona, ico naimaci jilloiadedi, ¿bu naie riño ienite? Naiñaiño siete digamiena inirede —llotimaci.

34 Jesús uai ote:

—Birui aina otomoi. Inina otomoi;

35 iadedi fiodaillamona, Jusiñamui diga jaca itino jillua mei, ainitimaci. Ininitimaci;

36 ia Jusiñamui jaienisaí isoi illanona, dane fiodaiñeitimaci.

37 Fiodaitino jilluana omoimo lloiticue. Moisés micori jofue iñenanomo illa facaise, amena boode motodo Moisés micorimo Jusiñamui ñaia facaise, naimie micorimo comini ico jilloillena Jusiñamui

llote: “Abraham ie Jusiñamuidicue. Isaac ie Jusiñamuidicue. Jacob ie Jusiñamuidicue” llote.

³⁸ Jai fioidaitimaci; ia naimaci joreñuai nia itimaci. Jusiñamuidi dani cajedino imaci Jusiñamuina jira, naimaci joreñuai naimie dine itimaci. Ico naimaci abiaina jiai jillotaite. Naimiemo naimaci duillamona, naimaci abiai diga jilluanona, naimie diga jaca itimaci —llote.

³⁹ Iena cacajano, Moisés micori llogacinuaina llofueraimona dajerie raite:

—Maestro, raise llotio.

⁴⁰ Ie façaise naimiemo nie isoide rafuena dane jicanuana jaciruitimaci.

*Jesús dinena fariseuai cominimo jicanua rafue
(Mt 22.41-46; Mr 12.35-37)*

⁴¹ Iemei naimie ecimo itinomo Jesús jicanote:

—¿Niese Moisés micori llogacinona llofueraimi Cristona raitimaci? ¿Niese naimiedi David micori jitona raitimaci?

⁴² Salmos railla ciegafuiaimo David micori jaie cuega:

Jusiñamuidi cue Namamo llote: “Illaimana o illamona, cue nabeimo ana rai.

⁴³ Ona ñinoñedino o anamo itataiticue”.

⁴⁴ “Cristodi cue Nama” David micori raite. Iese naimie micori railla jira, Cristo David micori afemo faite. Naimiedi dama David micori jitoñede; ia jiai ie Nama.

*Jesúdi judíuai illaicomina ñaia rafue
(Mt 23.1-36; Mr 12.38-40; Lc 11.37-54)*

⁴⁵ Nana comini cacajano, ie llofueganomo Jesús llote:

46 —Moisés micori llogacinuaina llo-
 fuerainimona abina rairui. Illaicomini naimaci
 itimacidená, naimacina comini cioillena, eo mare
 iniroina jitaacacabidimaci. Níne naimaci macaria,
 naimaci jamai bue isoíñedinona itimacidená,
 comini naimacina uaiduana gaidimaci. Comini
 naimaciri acarillena, ofiracomo uicomo
 raíacadimaci. Rafue ía, naimaci jamai bue
 isoíñedinona comecina facajanona, rafue nama
 ecimo raíacadimaci.

47 Feciñuaimona rana ocabillanona,
 naiñaiñuaina duere finodimaci. Naimiena eo
 sedadimacidená, Jusiñamuimo are jicabidimaci.
 Iese naimaci icabilla jira, Jusiñamui naimacina
 jiaie comini baífemo duere finoite.

21

*Jesúdi Jusiñamui jofomo duerede feciño ucube fe-
 cajana ciua rafue*

(Mr 12.41-44)

¹ Jusiñamui jofomo Jesús nia ía, a erodatemo,
 nainomo ite eenoranomo ucuberedino ucubena
 joniana ciode.

² Eo duerede feciño menaruñu joniana jiaí ciode.

³ Ie llofueoicaiganomo Jesús llote:

—Bie eo duerede feciño nana ucuberedino jonia
 baífemo jonete.

⁴ Naimacimo ailluena ite; íadedi naie ucube-
 mona janore jonetimaci. Naiñaiño eo duerede;
 íadedi nana naiñaiñoimo ite ucubena jai jonete.
 Janore jonete; ía Jusiñamuimona naiñaiñodi jiaíno
 baífemo jonete.

Jesúdi Jerusalémo ite Jusiñamui jofo judaiana llua rafue

(Mt 24.1-28; Mr 13.1-23)

⁵ Naie facaise Jesús llofueoicaiganomona dajerie Jusiñamui jofona eruailanona, raite:

—Mare nofici diga finoca. Eo mare ra nainomojiaí ite.

⁶ Jesús llote:

—Birui bie rana ciodomoi; iadedi ico jiairuido nana bie jofomo ite noficiaí oni judaisite.

⁷ Jicanotimaci:

—Jusiñamui jofo judaisillana omo jicanoiacadicaí. ¿Niruido iena suite? Nana o lloga rafue suillena, ¿nie isoide rafue nano suite? Iena caimo llono.

⁸ Uai ote:

—Omoína bie rafuena bu jifueñellena, omoi abina rairui. Ailluena comini cue mamecido billanona: “Cristodicue” raitimaci. “Cristo jai bairede” raitimaci. Naimaci dibeimo iñeno.

⁹ Jobaimiaí illena fidiitomoi; iadedi jaciruiñeno. Iese suite; iadedi abido nia biñeiticue.

¹⁰ Daje nairai jiaie nairai diga jobairite. Daje gobierno jiaie gobierno diga jobairite.

¹¹ Eo aillena ñuisañuaí suite. Diga illanomo cominidi aime gutimaci. Duicuaí eo iite. Monamo comini diga jairede rana cioitimaci.

¹² Bie isoide rafue nia suiñenia, cuena ñnoñedino omoína llogidoitimaci. Omoína gaitatajanona, omoína duere finoitimaci. Naimaci ofiracomo omoína uitimaci. Cárcelmo omoína jonetimaci. Cuemo omoi duilla jira, omoi duere sefuillena, illaicomini dine omoína uitimaci.

13 Naie facaiseconi cue rafuena naimacimo lloit-
omoi.

14 Omoi abina omoi riidoia, omoi lluana uicodo
jarire iñeno.

15 Omoi raise lollena, omoina canoiticue.
Uiñoracina omoimo iiticue. Iemona omoi
dibeimo iñedino o uaina uaitanitimaci.

16 Cuen a ñnotomoi; ia ailluena cuena
ñoñeitimaci. Cuen omoi duilla jira, omoina
enoitimaci. Iemona dajerie mootiai, dajerie
eitiai, dajerie amatiai, dajerie nabaiñiai
omoina llogidoitimaci. Omoimona dajeriena
meineitimaci.

17 Cue cominina omoi illamona, nana
nairai omoina enoitimaci; iadedi cuena
fainonocaiñedimie ja muidomo monamo jaca
iite. Naimiena jillotaiticue.

18 Omoi ille dinori Jusiñamui omoina raise
sedaite.

19 Duere omoi sefuia, cuena fainonocaiñeno jai.
Ja muidomo monamo jaca iitomoi.

20 Jerusalén fuedo ruicabene icaifona soldaduai
ia, ie judaille facaiseconi iairei iite.

21 Naiemona omoi jillobillena, duere omoi se-
fuiñellena, Judeamo omoi illamona, aneduai dine
aisi. Jerusalémo omoi ia, naiemona oni jino omoi
jai. Jino omoi ia, Jerusalémo omoi jaiñeno.

22 Ie facaina lloraini micoraii cufagfuii
suillanona, naie facaiseconi naimiena
ñoñedinomona Jusiñamui ibana oite.

23 Naie rafuemona jillobillena, naie facaise
urueside riño duere sefuite. Uruena nia jirode
riñodi jiai duere sefuite. Naie facaise comini duere
sefuitimaci. Llegi cacaitimaci.

24 Lloebi diga meinecana uitimaci. Jiaie nairai dine naimacina jaiadoitimaci. Judúuaiñedino sedalle facaise dinori, naimaci anamo Jerusalémo itino iitimaci.

Jesús abido ie bille rafue

(Mt 24.29-35, 42-44; Mr 13.24-37)

25 Jesús nia llofue:

—Jitoma nagarui illa isoi iñenamona, fivui nagarui illa isoi iñenamona, ucuai nagarui illa isoi iñenamona, comini jiaie rafue suillena uiñoitimaci. Monailai eo baguamona, comini comeciai eo jarire iitimaci.

26 Nana monamo ite radi jaidisite. Iena raise naimaci uiñoñena jira, nie isoide rafue suillena naimaci uiñoñena jira, jaciruillamona, comini fioidaitimaci isoi iitimaci.

27 Naie facaise uillie motodo cue billena nana comini cioitimaci. Ebire biitícue. Naimacina cue sedallena, illaimana biitícue.

28 Bie isoide rafue suia, omoína cue jilloitajaibillirui iairei illa jira, cue billiruimo raise ocuri.

29 'Iena omoi raise uiñollena, bie rafuena omoimo lloitícue. Higuera railla riaramo omoi comeciaina faca. Nana amenamo comeciaina faca.

30 Bie eniruemo amena firuillamona, fiemona raire illana uiñotomoi.

31 Ie isoide. Bie rafue ico suia, Jusiñamui ie cominina raire sedajana uiñotomoi.

32 Uanaicinona omoimo lloitícue. Nana bie rafue suille facaiseconi bie nairai nia iite.

33 Mona fuite. Enirue jiai fuite; iadedi cue lloga uai jaca suite.

³⁴ Jifaillacinona omoï ebirui raillano, omoï ecimo ite rana ebirui raillano, abina rairuicana jai. Cuenã ñnoñedinona duere finollena, ebena abido biiticue.

³⁵ Cue bia, illaïmana cue illamona, nana cominimo juez isoi lloiticue.

³⁶ Ie jira nagarui abï rairuicana jai. Naie duere sefuelle facaise omoï jilloillena, Jusiñamuimo jïï. Ja muidomo monamo cue diga jaca iitomoï –llote.

³⁷ Jusiñamui jofomo Jesús nagarui llofueuide. Naïona Olivos railla anedumo, nainomo inillena, jaisoide.

³⁸ Nagarui jitiramo naimïena cacareillena, Jusiñamui jofomo cominï bisoidimaci.

22

*Judïuaï illaïcominï Jesúna gaïtallena siadua rafue
(Mt 26.1-5, 14-16; Mr 14.1-2, 10-11; Jn 11.45-53)*

¹ Naie facaise pascua railla rafue iairei ite. Naie facaise llomenico guille rafue jiaï ite. Naie rafue ia, siritate rana jaca guiñedimaci. Egiptomona naimaci jaiagai jillobillana começillena, naie rafue ite.

² Judïuaï illaïcominï Jesúna meineiacadimaci; iadedi cominina jacïruillanona, naimïena nia meineñedimaci.

³ Ie facaiseconi Taife ie anamo Judas Iscariote micorina itatate. Judadi Jesús ie doce llofueoicaigano imïe.

⁴ Jusiñamui diga nanoca ñairainï dine jaide. Jusiñamui jofona sedarainï dine jiaï jaide. Jesúna gaïtatallena, naimaci diga ñaiaide.

5 Iobillanona, naimiemo ucubena fecaa-cadimaci.

6 Judas dinena:

—Jee —raite. Jesús diga ailluena comini iñena facaiseconi naimiëna gaitatallena sedade.

Jesúdi ie fiodaille rafuena llua rafue

(Mt 26.17-29; Mr 14.12-25; Jn 13.21-30; 1 Co 11.23-26)

7 Llomenico guille rafue illanona, judíuai comini toica llauda fauillarui ride.

8 Jesúdi Pedro iaimaiaí Juan diga oretajano, raite:

—Cai rafue guille uicodo finollesa omico jai.

9 Naimiemo jicanotiiaimaiaí:

—¿Ninomo naiena coco finuana jitaidio?

10 Uai ote:

—Ero, Jerusalémo omico ria, nogodo jinuina uitimiëna cioitomico. Naimie jailla jofomo naimiëna raca.

11 Jofo namamo llono: “Coco llofueraíma cocona omo jicanotade: ‘¿Nimai cue guiraco? ¿Ninomo guiticue, cue llofueoicaigano diga?’ ” Iese llono.

12 Ie mei omicomo afebebamo ite aillue cuar-tona acataite. Na raruiaí diga ite. Nainomo cai guille fino.

13 Jaidiaimaiaí. Naimie llua isoi baitiaimaiaí. Pascua rafue guille finodiaimaiaí.

14 Guille facaiseconi ia, Jesús ie llofueoicaigano diga nainomo guisaide.

15 Mesamo guitimacimo, ie llofueoicaiganomo llote:

—Nia cue fiodaiñenia, omoi diga bie rafue guil-lena eo jitaidicue.

16 Ie cominina cue Moo ico sedalle facaise ia, nana bie rafue fuite.

17 Jiroracomo jai totaca vino llinocaida, Jusiñamuimo iobillacinona fecaja mei, raite:

—Mai lino. Biemona nana dajena omoi jiro.

18 Omoina bene dane iese caimare nabaiñeiticue. Cue Moo sedajanomo omoi diga ico cue ia, nainomo omoina dane iese caimare marena nabaiticue. —Iena jirodimaci.

19 Llomeniconna llinuanona, Jusiñamuimo iobil-lacinona fecaja mei, iena tairude. Naimacimo fecajano raite:

—Biedi cue abi facai ie. Omoi facaina fioidaiticue. Cue abimo omoi comecina facajano, iena guño.

20 Naimaci guilla fuilla mei, jiroracomo vino diga dane oruitajanona, naimacina jiroate. Raite:

—Cue fioidaillamona, dama cue diaillamona, jeacino anamona jilloitomo. Jusiñamuidi omoimo jiaie rafue birui itatajanona, omoi jeacino oni dotajana jai llote. Bie vinodi naie rafue facai ie. —Iena jirodimaci.

21 Jesús llote:

—Ero, cuena gaitataitimie cai diga guite.

22 Monamona billanona iimana jaidicue. Jusiñamui jitailla isoi jai jaiocaidicue; iadedi Jusiñamuimona cuena gaitataitimie eo duere sefuite.

23 Iemei: “¿Nimie Jesúsna gaitatalle?” dani coniniri siadoside.

Naimaci moto imiena bu ille rafue

24 Ie facaise coniniri siaduana raitimaci:

—¿Cai moto imiena bu ille?

25 Iena cacajanona, Jesús raite:

—Naimaci jitailla ra finollena, judíuainēdino illaiaiaidi naimaci anamo itinona ocuicabide. “Cai anamo itinona canocabidicaí” raitimaci;

²⁶ iadedi omoimo iese iñede. Omoi moto itimie omoi moto imieñedimiena jailla. Omoimona bu imiena iacania, omoi mullaimana naimie jaicabillasa. Omoimona bu imiena iacania, omoina naimie canocana jaicabillasa.

²⁷ Ero, jiaie rafuedo iena lloiticue. Naimiena ecallena, naimiena canollena, patrón anamo ie mullaiai itimaci. Naimaci baifemo patrón illa-mona, naimacina canollena, ie mullaiai facaina maiñede. Cue anamo itomoi; ia omoina canollena, omoi mullaima isoi iticue.

²⁸ Birui duere cue sefuidicue, cuena faínonocaiñedomoi.

²⁹ Cue Moo cuena illaimana jai itatate. Omoina fetodicue,

³⁰ jiairuido cue illaima illa facaiseconi cue ecimo omoi caimare marena iocire illena. Nainomo omoi judíuai doce nairaiaina sedaitomoi.

*Jesúdi Pedro naimiena januana llua rafue
(Mt 26.31-35; Mr 14.27-31; Jn 13.36-38)*

³¹ Jesús llote:

—Simón Pedro, ero, Taifedi Jusiñamuimo ona jicanote, o ramo faillena;

³² iadedi ori jai jiidicue, cuena nia ñnocana o jaillena. Ico cuena raise o ñnoñena mei, cue dibeimo o comeci iuai dane o meidoia, iemona jiaie creyentiai comeciaina ocuiñotaitio.

³³ Pedro uai ote:

—Nama, cárcelmo o ia, nainomo jiai iiticue. O fiodaia, jiai fiodaiticue. Ona faínonocaiñeiticue.

³⁴ Jesús uai ote:

—Pedro, jítiramo itava nia ñaiñenia, dacaiño amani cuena janoitio.

Jesús fiodailla facaise iairei illa rafue

³⁵ Ie llofueoicaiganomo Jesús llote:

—Omoimo ite rafuena uiñoiacadicue. Cue rafue llollena, navui omoina oredicue. “Ucubena uiñeno, bolsa uiñeno, meidolle zapatos uiñeno” omoimo lloticue. Naie facaiseconi omoi, ¿bue rana jítaidomoi?

Uai otimaci:

—Cai buena jítaiñedicai.

³⁶ Jesús raite:

—Biruímona omoi duere sefuitomoi. Ie jira abina rairuicana jai. Birui ucube omoimo ia, nine omoi jaia, iena uiño. Bolsa bumoi ia, iena uiño. Abina riidollena, omoimo lloebi iñenia, janore iniroina feca, lloebi ollena.

³⁷ Cuena jaie ciegafuiai ja suite. Isaías micori cuena jaie cueba: “Maraiñede rafue finoraíma isoi naimie duere sefuite”.

³⁸ Raitimaci:

—Ero, Nama, mena lloebi caimo birui ite.

Jesús uai ote:

—Mena ia, macaibaite.

Jesúdi Getsemanímo Jusiñamuimo jii rafue

(Mt 26.36-46; Mr 14.32-42)

³⁹ Guille mei, ie llofueoicaigano diga, Jesús jino jaide. Olivos railla anedumo naimie jaisoilla isoi jaide.

⁴⁰ Nainomoi ria, naimacimoi llote:

—Táife omoína ramo fai raillano, iena omoi ñnoñellena, Jusiñamuimo jii —llote.

41 Naimie janorede nofici bai faia ualla dinori bai jaide. Caiñici ifodo ana raíta, Jusiñamuimo jide:

42 —Ore Moo, o jitaia, cue duere sefuillamona cuena jillota. Cue jitailla isoi cuena finoño; iadedi o jitailla isoi cuena fino.

43 Naimie comecina ocuiñotallena, ie facaiseconi monamona Jusiñamui jaienici bite.

44 Jesús comeci jarire illamona, naimie rioci faitemo, difai diruena eniruemo uaide.

45 Jia mei, ie llofueoicaigano dine abido bite. Ocosinaillamona, jai inidimaci.

46 Naimacimo jicanote:

—¿Bue ñellena inidomoi? Mai casi. Taife ramo omoina fai raillano, iena omoi inoñellena, Jusiñamuimo jii.

Jesúna gaitalle rafue

(Mt 26.47-56; Mr 14.43-50; Jn 18.2-11)

47 Nia Jesús lloia, diga comini naimie dine bitimaci. Judas Iscariote micori naimacina ifode. Naimiedi Jesús llofueoicaigamie. Naimiena libanollena. Jesús dine iairei bite.

48 Jesús raite:

—Judas, cuena libanuanona, cuena gaitataiacadio.

49 Ie llofueoicaigano naie rafuena jai ciotimaci. Jicanotimaci:

—Nama, ¿cai atica lloebi diga ona riidoiticaí?

50 Ie facaise naimacimona damiedi Jusiñamui diga nanoca ñairaíma ie mullaíma ie nabei jefona jaíbonote.

51 Jesús dinena raite:

—Dama ite. —Ie jefona naimie jetajamona, naimiena jillotate.

⁵² Diga illaicomini Judas diga Jesús dine bitimaci. Naimacimo Jesús llote:

—Fñiraimadicueta cuena omoi gaitajabilla. Omoi lloebina atidomoi. Omoi butaralluna jiai atidomoi.

⁵³ Nagarui Jusiñamui jofomo omoi motomo llofuecabitue; iadedi cuena gaitañedomoi. Jusiñamui jitailla jira, cuena omoi gaitaja facaise jai ride. Taife anamo jai itomoi.

Pedro di Jesús a janua rafue

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Naimiena gaitaja mei, Jusiñamui diga nanoca ñairaima jofomo uitimaci. Pedro aarena naimaci jinafona racade.

⁵⁵ Nairabiri motomo irai bonua mei, ana raidimaci. Pedro naimaci diga jiai raide.

⁵⁶ Nainomo ite mullañodi irai bouamona, Pedromo eruaillano raite:

—Bimiedi Jesús diga jaisoidimie.

⁵⁷ Pedro abi janote:

—Naimiena uiñoñedicue.

⁵⁸ Dallu illanona, jiaimie Pedrona ciuanona llote:

—Jesús ie llofueoicaigano imiedio.

Pedro dinena uai ote:

—Imieñedicue.

⁵⁹ Daje hora illanona, jiaimie raite:

—Bimie galileo imiena jira, bimiedi Jesús diga ua jaisoidimie.

⁶⁰ Pedro dinena raite:

—O lluana uifioñedicue. —Ieconí naimie ñaitemo, itava ñaite.

⁶¹ Jesús dobaidacaida, Pedromo erodacaide. Iemei Pedro Jesús lluana uibiñote. Jesús naimiemo jaive llote: “Itava nia ñañenia, dacaiño amani cuena janoitio”.

⁶² Pedro jino jaillanona, eo sunaillamona, eo eede.

Jesúna jifanodua rafue

(Mt 26.67-68; Mr 14.65)

⁶³ Ie facaise Jesúna gaitadino naimiena jifanododimaci. Naimiena jiai fatimaci.

⁶⁴ Ie uisina maitimaci. Llotimaci:

—Siño jitodiosa, ¿bu o faja? caimo llono.

⁶⁵ Iese jifanodocana uitimaci.

Jesúdi judíuai illaicomini dine illa rafue

(Mt 26.59-66; Mr 14.55-64; Jn 18.19-24)

⁶⁶ Monaidemo judíuai illaicomini ofidimaci. Jusiñamui diga nanoca ñairaini ofidimaci. Moisés micori llogacino llofueraini ofidimaci. Naimaci dine naimiena gaitadino Jesúna uitimaci. Naie illaicomini dinena raitimaci:

⁶⁷ —Ua Cristodiona, iena caimo llono.

Jesús uai ote:

—Omoimo iena cue lloia, inoñeitomoi.

⁶⁸ Buena omoimo cue jicanoia, cue uaina oñeitomoi.

⁶⁹ Monamona jaie billanona, imana jaidicue. Cuena omoi meiniamona, illaima isoi Jusiñamui ecimo raire iiticue.

⁷⁰ Nana jicanotimaci:

—“¿Jusiñamui Jitodicue” raitio?

Uai ote:

—Raise cacadomoi. Imiedicue.

⁷¹ Iena cacajano, raitimaci:

—Naimie lluana jai cacadicaí. Jiaie comini naimiena llogiduana jai jitaiñedicaí. “Jusiñamui Jitona iticue” naimie llua jira, Jusiñamuina jai jeare ñaite. Naimie Jusiñamui Jitoñede.

23

Pilato dine Jesús illa rafue

(Mt 27.1-2, 11-14; Mr 15.1-5; Jn 18.28-38)

¹ Judíuai illaicomini naidacaillanona, Pilato dine Jesúsna uitimaci.

² Naimiena llogidotimaci:

—Cai cominimo maraiñedifuenta llote. Gobierno ucubena cai fecajana rairuide. Naimie jiaí raite: “Cristodicue. Illaimadicue”.

³ Pilato dinena naimiemo jicanote:

—¿Judíuai comini illaimadio?

Uai ote:

—Jii, judíuai illaimadicue.

⁴ Jusiñamui diga nanoca ñairainimo Pilato llote. Nainomo bite cominimo jiaí llote:

—Nicinodi naimiemo iñede.

⁵ Uai otimaci:

—Gobierno joreño comini comeciaí jeare feidocana naimie uite. Nana Judeamo uite. Galileamona tainede. Bene jai caimo ride.

Herodes dine Jesús illa rafue

⁶ Iena cacajano, naimie llogidotinomo Pilato jicanote:

—¿Naimiedi Galilea imie?

7—Jii —raitimaci. Galilea enirue illaïma Herodes. Naie facaiseconi Jerusalémo naimie illa jira, naimie dine Pilatodi Jesúna orede.

8 Jesúna Herodes cïuanona, iobide. Naimie finoca rafuena naimie fïdia jira, naimiena cioacade. Siño rafuena naimie finuana jïai cioacade.

9 Jesúmo ie finoca rafuena are jïcanote; iadedi Jesús dinena uaina oñede.

10 Ie facaiseconi judïuaï illaïcomini Jesúna riire llogïdotimaci.

11 Herodes ie soldaduaï diga naimiena eo jeare ñaitimaci. Illaïma jïtauiga iniroina jïtatatimaci. Ie mei Pilato dine naimiena abïdo orede.

12 Iemona nairuido Herodes Pilato diga nabairite. Jaie conimana enoidiaïmaïaï.

*Pilatodi Jesús fïdaïllana llua rafue
(Mt 27.15-26; Mr 15.6-15; Jn 18.39-19.16)*

13 Pilatodi judïuaï illaïcominina, nainomo ite comini diga, uaidote.

14 Raite:

—Bimie cue dine atïdomoi. Raitomoi: “Comini começiaï feïdocana naimie uite”. Naimiemo jai jïcanoticue; ia naimiemo nicinodi iñede.

15 Herodes cue dine naimiena como abïdo orede. “Naimiemo nicinodi iñede” jïai raite. Naimiena cue meinatallena, naimie jaca nicinona finoñede.

16 Ie jira naimiena cue sechedotajanona, naimiena oni oretaiticue.

17 Naie rafue facaiseconi naga año cárcelmona damïena jino jamai oretauide.

18 Pilato lluana cacajano, nana comini ado cuiriïdimaci:

—¡Naimiena oni uiño, naimiena meinellena!
¡Barrabás cárcelmona jino oreta!

¹⁹ Gobierno diga jobaimena naimie navui finua jira, naie facaise comena naimie meinia jira, Barrabás cárcelmo ite.

²⁰ Jesúna naimie jamai oretaiacana jira, comini diga Pilato dane ñaite;

²¹ iadedi cuiiriidimaci:

—¡Naimiena corai! ¡Naimiena meine!

²² Pilato dane jicanote:

—¿Ñie isoide maraiñede rafuena finode? Naimiena cai meinellena, naimie jaca nicinona finoñede. Naimiena sechedotaiticue. Ie mei naimiena jamai oretaiticue.

²³ Eo riire cuiiriidimaci:

—¡Naimiena corai! —Ja muidomo Pilato dinena:

—Jee —raite.

²⁴ Naimaci jitailla isoi Pilato fairiote. Jesúna meinellena llote.

²⁵ Ie mei Barrabásna cárcelmona jino oretate, naimiena comini jicaja jira; iadedi Jesúna naimacimo fecade, naimiemo naimaci jitailla ra naimaci finollena.

Jesúna coraia rafue

(Mt 27.32-44; Mr 15.21-32; Jn 19.17-27)

²⁶ Jesúna soldaduai oni uitemo, Simón raillamie diga dafaifidimaci. Naimiedi Cirene railla enirue imie. Jerusalén onifemona bite. Jesús jinafona naimiena cruzna rocaoicaida sonotate.

²⁷ Ailluena comini Jesúna racadimaci. Ailluena riñoniai eo eecana jaisite.

²⁸ Iena cacajano, Jesús naiñaiñuai dine dobaidacaida, naiñaiñuaimo llote:

—Jerusalén itiniñaiñuái, cue facaina eeñeno; iadedi omoi facaina mai omoi ee. Omoi uruiai facaina mai omoi ee.

²⁹ Ero, jiairuido duere sefuillemona comini raitimaci: “Oiniñuái jiaie riñoniai baifemo duere sefuiñena jira, marena itimaci”.

³⁰ Jusiñamui riicaillafuemona jilloiacanamona, comini jiai raitimaci: “Aneduai caimo jaicorillana jitaidicai”.

³¹ Maraiñede rafuena finoñedicue; iadedi jai duere sefuidicue, Maraiñede rafuena finodimaci. Ie jira cue baifemo eo duere sefuitimaci.

³² Naie iaímaiaína meinellena, mena maraiñede iimana jiai uitimaci. Gobierno llogacinona inoñediiaímaiaí.

³³ Ifocoraína eruaílla illanomo naimaci ria, Jesús coraidimaci. Naie maraiñede iaímaiaína jiai coraidimaci. Damie Jesús nabeimo. Jiaímie Jesús jarifebeimo.

³⁴ Jesús ie Moomo llote:

—Ore Moo, naimaci finoca rafuena naimaci raise uiñoñena jira, bie soldaduai cuena duere finua rafuena feita —llote. Bu dajerie uille uiñollena, Jesús iniroina jifanoduanano soldaduai facasite.

³⁵ Ailluena comini eruaídímaci. Judíuai illaicomínidi naimiena jifanoduanona, coniniri raitimaci:

—Naimiedi jiaie comínina duicomona jillotate. ¿Ñiese dama naimie abina birui jillotañede? Naimiedi Jusiñamui oretagamiedena, Jusiñamui fetocamiedena, fiodaillamona dama naimie abina jillotarede.

³⁶ Soldaduaí naimiēna jiaí jifanododimaci. Ie abi isirena cacaiñellena, naimiemo vino fecajanona,

³⁷ raitimaci:

—Judíuaí illaimadiodena, fiodaillamona dama o abina jillota. —Naie vino Jesús jiroñede.

³⁸ Jesús ifogi afeconi rabiçimo Pilato cuetatate: “Bimiedi judíuaí comini illaima”.

³⁹ Jesús diga coraica iaimaiaimona damie naimiēna taigode:

—Jusiñamuimona bitiodena, nia fiodaiñenamona dama o abina jillota. Cocona jiaí jillota.

⁴⁰ Jiaimiedi naimiēna lletade:

—¿Bue ñellena bimiena taigodio? ¿Ñiese jearede rafuena nia finoacadio? Ja fiodaitio. Iemei Jusiñamui uicomo ja iitio. ¿Ñiese Jusiñamui uicomo o illena jaciruiñedio?

⁴¹ Maraiñede rafuena coco finua jira, duere sefuidicoco; iadedi bimie maraiñede rafuena finoñede.

⁴² Iemei Jesús mo llote:

—Illaimana o illa facaise cuena começi.

⁴³ Jesús uai ote:

—Uanaicino lloticue. Birui cue diga cue Moo illanomo iitio.

Jesús fiodailla rafue

(Mt 27.45-56; Mr 15.33-41; Jn 19.28-30)

⁴⁴ Jitoma naidai jai itemo, daje amani horas mona jitibicaide.

⁴⁵ Jitoma raise lligaiñoñede. Jusiñamui jofo ie fetaca iniroife ana anaba jillacimo motodo menafe cuararide.

⁴⁶ Jesús ado llote:

—Ore Moo, cue joreña feiño. —Ie mei naimie jai fiodaite.

⁴⁷ Soldaduai imaci capitán bie rafuena ciuano, Jusiñamuina jaciruillamona, raite:

—Bimie maraiñede rafuena finoñede.

⁴⁸ Ailluena comini Jesús fiodaillana cioidimaci. Ie mei eo sunaillamona, jogobemo fairuanona, jofomo abido jaidimaci.

⁴⁹ Jesús nabaiñiai bie rafuena aarena cioidimaci. Galileamona bite riñoniai bie rafuena aarena jiai cioidimaci.

Jesús raiafomo jonia rafue

(Mt 27.57-61; Mr 15.42-47; Jn 19.38-42)

⁵⁰⁻⁵² Pilato dine José raillamie jaide, Jesús abina jicallena. Naimiedi illaicomini. Maremie. Finogamie. Jesúna meiniana jitaiñede. Arimatea raila nairai imie. Judeamo naie nairai ite. Naimiedi Jusiñamui ie cominina ico sedajanomo illemo ocuride.

⁵³ Pilato:

—Jee —raila mei, Jesús abina cruzmona ana uanona, iena useroi diga ferinote. Nofici ie raiafomo jonete. Nia bu raiafomo jonete.

⁵⁴ Nairui viernes. Sábadorui rille jai iairei illa jira, Jesús abina raiafomo raire jonete.

⁵⁵ Galileamona navui bite riñoniai racaidimaci. Raiafona cioidimaci. Naimie abi finuana cioidimaci.

⁵⁶ Ie jira caimare soride rana finollena, naimie abimo jonellena, jofomo jaidimaci. Naie ra finua mei, ie abina raise finollena, raiafomo abido jaidimaci. Ie mei sábadoruimo jafaici otimaci, Moisés micori jaie lua isoi.

24

Jesús fiodaillamona jillua rafue

(Mt 28.1-10; Mr 16.1-8; Jn 20.1-10)

¹ Domingo jítiramo monaidemo, naie riñoniai raiafomo jaidimaci, iñaiñuai finoca soride rana uillena.

² Raiafo ibailla nofici oni joillana cioidimaci.

³ Fo jaidemo, Jesús abina cioiñedimaci.

⁴ Uainicaidimaci. Ieconí menamie naiñaiñuai ecimo bairediaimaiaí. Iaimaiaí iniroi eo quenirede.

⁵ Iaimaiaina jacinaillamona, ifogi ana jítadacaidimaci. Naie iaimaiaí dinena jicanote:

—¿Bue ñellena fiodaitimie illanomo cajedimiena jenodomoí?

⁶ Galileamo navui naimie omoimo llogacinona comeciñedomoí.

⁷ Naimie raite: “Monamona billanona, imana jaidicue. Jusiñamui jitailla jira, maraiñede rafue finoraini anamo iiticue. Cuená coraitimaci. Darui amani illanona, fiodaillamona jilloiticue” raite.

⁸ Iemona ie llogacinona jai comecitimaci.

⁹ Raiafomona abido jaidimaci. Ie once llofueoicaiganomo naiñaiñuai ciua rafuena llotimaci. Naie llofueoicaigano diga itinomo jiaí llotimaci.

¹⁰ Naie riñoniaimona María Magdalena ite. Juana ite. María ite. Naiñaiñodi Jacobo ei.

¹¹ Naie riñoniaidi iena llotimaci; iadedi ie rafuena cacadinodi iena inoñedimaci.

—Jamaifuenta ñaitomoí —raitimaci.

¹² Iena cacajano, Pedro aisicana raiafomo jaide. Nainomo ria, ana jítadacaida, fo erodate. Useroi

joillana ciode. Iemo ie começina facajano, jofomo abido jaide.

*Mena llofueoicaiganomo Jesús bairia rafue
(Mr 16.12-13)*

¹³ Jesús jilluarui mena llofuega iaïmaiaï Emaús railla nairaimo jaidiaïmaiaï. Jerusalémona nibai once kilómetros ite.

¹⁴ Nana Jesúmo suide rafuena ñaiano jaidiaïmaiaï.

¹⁵ Iaïmaiaï ñaianona, Jesús iaïmaiaï diga dafaïfillanona, iaïmaiaï diga jaide.

¹⁶ Jusiñamuidi iaïmaiaïna naimiena uiñotañena jira, naimiena uiñoñediaïmaiaï.

¹⁷ Iaïmaiaïmo Jesús jïcanote:

—¿Buena ñaitomico? —Ieconï naidadatïiaïmaiaï. Sunaitïiaïmaiaï.

¹⁸ Naie iaïmaiaïmona damiedi Cleofas. Naimie uai ote:

—¿Niese Jerusalémo birui suide rafuena uiñoñedio? Nibai como ridio. Nana jiaï comini iena uiñotimaci.

¹⁹ Uai ote:

—¿Nie isoide rafue suide?

Uai otïiaïmaiaï:

—Nazaret ie Jesús rafue. Naimiedi Jusiñamui facaina lloraima. Diga siño rafuena finode. Cominina raise llofue. Jusiñamuimona naimiedi maremie. Cominimona naimie maremie;

²⁰ iadedi cai illaïcomini naimiena gaitatatimaci. Naimiena cruzmo coraitatimaci.

²¹ Jusiñamui naimie cai dine orecamiemo começina facadicoco. Naimie cai illaïmana illemo ocuiridicoco; ia naimie jai fiodaite. Naimie fiodaillamona darui amani jai ite.

22 Cai cominimona dajerie riñoniaibirui caina jacinaitadimaci. Jitiramo Jesús raiafomo jaidimaci;

23 iadedi naimie abina cioiñedimaci. Abido naimaci bia: “Jusiñamui jaienisaia ciodicaí” raitimaci. Naie jaienisaí naimacimo lote: “Naimiedi caje”.

24 Iemei caimona dajerie raiafomo jaidimaci. Riñoniaí llua isoi ciodimaci. Jesús abina cioiñedimaci.

25 Jesús dinena uai ote:

—Abi uiñoñedomico. Nana Jusiñamui facaina lloraini micoriai ciegafuiaina ñnoiacañedomico.

26 Cristo duere sefuillena cuetimaci. Jusiñamui iena jitaillena cuetimaci. “Naimie nia illaimana jaiñenia, duere sefuite” cuetimaci.

27 Iemei Jesús iaímaiaina llofuate. Moisés micori ciegafuiaina llofuate. Jusiñamui facaina lloraini micoriai ciegafuiaina jiaí llofuate. Nana Cristona ciegafuiaina llofuate.

28 Emaús dine iaírei naimaci ria, Jesús nia jaiacademo,

29 naimiena caididiaímaiaí. Raitiaímaiaí:

—Coco diga fiebi. Jitoma jai ana ite. Jai abi juanide, nia o jaillena. —Ie muidona iaímaiaí diga fiebillena fo jaide.

30 Naillí guitimacimo, llomenicono Jesús llinuano, Jusiñamuimo iobillacinona fecade. Iena tairuano, iaímaiaímo fecade.

31 Jusiñamui jitailla jira, ieconi Jesúsna uiñotiaímaiaí. Iemei iaímaiaímona naimiena jai cioicaiñena.

32 Daímaiaí ñaitiaímaiaí:

—Coco diga naimie ñaia, coco comeci caimare ite.

³³ Naie dacaiño Jerusalémo abido jaidiaimaia. Jesús llofueoicaigano naimaci nabaiñiaia diga danomo illana baitiaimaia.

³⁴ Iaimaiaimo llotimaci:

—Cai Nama fiodaillamona jai jillode. Simón Pedromo jai bairede.

³⁵ Ie mei naisona iaimaia jaiilla rafuena llotiaimaia:

—Cai guiticaimo, naimiena uiñoticoco — llotiaimaia.

Jesús ie llofueoicaiganomo bairia rafue

(Mt 28.16-20; Mr 16.14-18; Jn 20.19-23)

³⁶ “Jesúna ciodicoco” llotiaimaiaimo, ie llofueoicaigano motomo Jesús bairede. Llote:

—Jai biticue. Uri omoi i.

³⁷ Naimiena ciuamona, jacinaitimaci. “Joreña ciodicai” comeciaina facajanona, jiaia jaciruitimaci.

³⁸ Naimacimo Jesús jicanote:

—¿Bue ñellena jaciruitomoi? ¿Bue ñellena cue bene illana ñnoñedomoi?

³⁹ Cue onollimo eruai. Cue eillimo eruai. Jesúsicue. Cuena jeta, raise uiñollena. Cuemo llicisi ite. Cuemo illaici ite. Jamai joreño isoñedicue.

⁴⁰ Iena llua mei, coraiafona naimaci cioillena, ie onolli ie eilli diga acatate.

⁴¹ Iobiacadimaci; iadedi nia raise ñnoñedimaci. Iemo comeciaina nia facadimacimo, naimacimo jicanote:

—¿Bue illa, cue guillena?

⁴² Naimiemo janorede jai ruica lliciaina fecadimaci.

⁴³ Iena feiñuanona, rite. Iena ciodimaci.

44 Naimacimo llote:

—Navui omoi diga cue ia, diga rafue omoimo lloticue. Moisés micori cuena cuete. Jusiñamui facaina lloraini micoriai cuena cuetimaci. Jusiñamui jitailla jira, iena jai suide.

45 Naie facaiseconi naimacina naie cuezafuina raise uifnotade.

46 Naimacimo llote:

—Jusiñamui facaina lloraini micoriai cuena jaie cuetimaci: “Cristo duere sefuite. Fiodaillamona darui amani illanona, jilloite.

47 Naimie muidona comeciai iuai meiduamona, Jusiñamui naimaci jeacinona oni dotaite. Naimie rafue nana nairaimo damierie lloitimaci”. Omoimo biena lloiticue. Cue rafuena lollena, Jerusalémo taineitomi.

48 Bie rafuena ciodomi. Iena lloitomi.

49 Ero, navui naimie llua isoi, cue Moo Joreño omoi dine oretaiticue. Jerusalémo fiebi, naimie Joreño omoi feiñolle dinori. Cue rafuena omoi lollena, naimie Joreño omoi comeciaina ocuiñotaite.

Jesús monamo jalla rafue

(Mr 16.19-20)

50 Betania railla nairai dine Jesús naimacina ifode. Marecinona naimacimo llote.

—Jusiñamui omoina raise marena canoite —llote.

51 Iena naimacimo lluanona, monamo jaide.

52 Jerusalémo eo caimare abido jaidimaci.

53 Jusiñamuimo iobillacino fecajano, Jusiñamui jofomo nagarui itimaci. Mai. Macaibaite. Lucadicue.

**Jusiñamui uai: Jusiñamui jito rafue illa
rabenico**

**New Testament in Huitoto, Murui (PE:huu:Huitoto,
Murui)**

copyright © 2008 Wycliffe Bible Translators, Inc.

Language: Huitoto, Murui

Translation by: Wycliffe Bible Translators, Inc.

Huitoto, Murui [huu], Peru

Copyright Information

© 2008, Bible League International. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Huitoto, Murui

© 2008, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

2014-04-25

PDF generated using Haiola and XeLaTeX on 18 Apr 2025 from source files dated 29 Jan 2022

145a1f66-dca1-5de3-9c00-4e533605e488